

Ì ɔ' Jesús ttekölpa tsá e'pa tö e' pakè

Hechos

Yèkkuö i' dör yèkkuö skà kit Lucas tö Teófilo a e', i' tã ide böt. Itsá kitè ie' a e' dör ì ɔ' Skèkèpa Jesús tö e' pakè. Ie' mine'ka ká jaì a e' ukuökì tã ì kí ɔ' ie' tö ká i' kí ittekölpa tsá e'pa wa Wiköl Batse'r batamik, e' pakè Lucas tö yèkkuö i' kí.

Kam Jesús mi'kane ká jaì a e' yökì ie' tö ittekölpa tsá e'pa patké ttè i' wa: Mik Wiköl Batse'r de a' kí, etã ie' tö diché meraë a' a ye' ttè pakoie. A' miraë ipakök s'tso' kos Jerusalén e'pa a. Nies ipakeraë a' tö s'tso' Judea ká malepa a ena Samaria ena ká wa'ne dò wé íyök erkerö ee. E' tso' kitule yèkkuö i' kí 1.8 ee. E' ukuökì tã ì ɔ' Skèköl tö Pedro wa Jerusalén ena Judea ká malepa ena Samaria e' ttè tso' kitule yèkkuö i' kí.

E' ukuökì tã Pablo tö Jesús ttè buaë paka' ká taië wakpa a e' ttè kit Lucas tö yèkkuö i' kí. Yèkkuö i' wa Lucas tö se' a ikkachè tö Jesús dör sulitane tsatkökwak.

Lucas bak s'kapeyökwakie. Iekkè tã ká kos wé Pablo dè'rö ee Lucas mir ie' tã. E' kuekì Lucas tö isü' iwák wöbla wa tö wes Skèköl kaneblè' Pablo wa. E' ttè tso' kitule yèkkuö i' kí.

Skèköl tö iWiköl patkeraë

1 ¹⁻²A kèkè Teófilo, ì ɔ' Jesús tö ena ì wa s'wöblaɔ'itö kuaë dò mik imineka ká jaì a, e' kos paka' ye' tö be' a yèkkuö tsá kityö e' kí. Kam ie' mi'kane ká jaì a, e' yökì ì kiane ie' kí tö ittekölpa tsá shukitbakitö, e'pa tö iwè, e' uk ie'pa kéitö Wiköl Batse'r wa. ³Ie' kōtewã shkenekane, e' ukuökì tã ie' wák e' kkayène taië ie'pa a dōka ká dabom tkéyök (40) ekkè. Es ie' tö ie'pa a ikkaché tö mokì ie' tso'ne ttsè'ka. Nies ie' tö ì blúie Skèköl tso' e' ttè paké ie'pa a. ⁴Ká et tã ie' tso' ittekölpa tsá e'pa tã, tã ichéitö iarak:

—A' kè kàne e' yöktsã Jerusalén. Ye' Yé kablè' iWiköl patkök a' a yè' ye' tö a' a, e' panú dò mik ide etã. ⁵Juan tö s'wösuk di' a, erè ká kè tkōpa taië tã Skèköl tö a' ierawa iWiköl Batse'r a.

Jesús minekà ká jai a

⁶Mik Jesús ttekölpa tsá ñi dapa'wékà ie' ta, eta e'pa tö ie' a ichaké:
—A Skëkëpa, ÷i' ta be' tö se' wakpa tkekekane se' Israel aleripa, e' wökirpaie?^a

⁷Ie' tö iüté:

—E' këwö kè mène a' a jchënoie. E' këwö tso' ye' Yé wa klöuletke. ⁸Erë mik Wiköl Batse'r de a' kî, eta ie' tö diché meraë a' a ye' tté pakoie. A' miraë ipakök s'tso' kos Jerusalén e'pa a. Ñies ipakeraë a' tö s'tso' Judea ká malepa a ena Samaria ena ká wa'ñie dò wé íyök erkerö ee e'pa a.

⁹Mik ie' tö e' ché one, eta ibutséka mía ká jai a ie'pa wörki ta ichowa mò shua kè wër ta'ia. ¹⁰Ie'pa tso' ká sauk ká jai a kreeré tö wes imichoka, e' dalewa bet wëpa böl datsi' saruruë de iëter ie'pa o'mik. ¹¹E'pa tö iché iarak:

—A Galilea wakpa ÷iök a' iëteria ká sauk ká jai a? Jesús bak a' shua e' mítser Skëköl wa. Wes a' tö isuë tö imía ká jai a, e' suë idörane ká i' kî.

Matías atë Judas skéie

¹²Eta Jesús ttekölpa tsá e'pa tso' Olivo kébata a, ie'pa biteane Jerusalén. E' ñalé dör wekké ulat kawö mène judiowak a shkoie eno diwö a ekkë.^b ¹³Mik ie'pa dene Jerusalén ta ie'pa tkaka u etkuö kî wé ikapökerak ee. Eë itso'rak Pedro, Juan, Santiago, Andrés, Felipe, Tomás, Bartolomé, Mateo, Santiago Alfeo alà, Simón Celote, ñies Judas Santiago alà. ¹⁴Ie'pa ulitane ñi dapa'uke kekraë ttök S'yé ta. Alakölpa welepa ena María, Jesús mì, ena Jesús ëlpa, e'pa tso'ñak ie'pa ta ttök S'yé ta.

¹⁵Jesús mik erblökwakpa e' dapa'uke e'pa döka cien eyök kî dabom böyök ekké ulatök (120). E' këwö ska' ta Pedro e' kékà ie'pa wörki ta ichéitö: ¹⁶“A yamipa, ñma Judas yé' Wiköl Batse'r tö se' blú bak David e' wa, e' wà tka wes itso' kitule Skëköl yëkkuö kî es. Judas wa pé' míne Jesús klö'ukwa. ¹⁷Ta ie' bak Jesús kléie wes se' es, ie' bak kaneblök Jesús ta wes se' es. ¹⁸(Ie' tö ì sulu wamblé', e' ské wa ie' tö ká tué et. E' ukuökî ta ie' anebitü wöwakköt ñawi tskinewa ta inattse yërulune. ¹⁹Mik Jerusalén wakpa tö tté e' ttsé, eta ká e' kiè mékarakitö iwákpa tté wa Hacéldama e' wà kiane chë S'pé Ké). ²⁰Es itso' kitule Skëköl yëkkuö kiè Salmo e' kî e' tö iché i' es:

‘As ie' u weir

ñies as kè yi seriä e' a.’^c

Ñies ichéitö:

^a1.6 *Israel aleripa e' wökirpaie*: Jesús ttekölpa tso'ia ibikeitsök tö ie' e' tkökeka Israel aleripa blúie ie'pa ká kî ta ie'pa tkekeka ie' kayupaie. ^b1.12 *shkoie eno diwö a ekkë*: E' dör kilómetro etk ulatök. ^c1.20 Salmo 69.25

‘O’ka múka iskéie ie' kanè méat e' kanéukne.’ ”^d

Es itso' kitule Skéköl yékkuö k̄i.

²¹ “Wèpa tso' íe e'pa manetw̄a se' t̄a k̄ekraë Jesús bakiã se' shuã et̄a. ²² Mik Juan t̄o Jesús w̄osuk e' k̄os t̄a ie'pa tso'ñak se' t̄a dò mik Jesús mineã k̄á jai a et̄a. Se' k̄awõt̄a wèpa ekkèpa shushtók eköl se' k̄íie as it̄o Jesús shkenekane, e' tté pakò se' t̄a.”

²³ Es ie'pa t̄o wèpa shushté b̄öl. Eköl kiè José, e' kiè Justo ñies. E' k̄kabata d̄ör Barsabás. Iéköl kiè Matías. ²⁴ Et̄a ie'pa t̄o ikié S'yé a i' es: “A Skéköl, be' w̄a sulitane er suule buaë. E' kuek̄i ikkachó sa' a wéne shushté be' t̄o ²⁵ as iat̄ Jesús ttekölpa tsá e' k̄íie Judas skéie. Judas e' wamblé sulu, e' kuek̄i ie' t̄o kanè e' méat t̄a imiã weinuk wé ikawõt̄a weinuk ee.”

²⁶ Et̄a ie'pa iné isuõie t̄o wèpa b̄öl shushtétke ie'pa t̄o e' wéne kiè d̄ömittsa. Et̄a Matías kiè dettsa. Es ie' at̄e Jesús ttekölpa tsá e' k̄íie imalepa dök̄a dabom eyök k̄i eköl (11) e'pa t̄a.

Wiköl Batse'r de Jesús mik erblökwapka k̄i

2 ¹ Mik Pentecostés kéwö^e de, et̄a Jesús mik erblökwapka k̄os tso' dapaule ek ts̄iní ème. ² E' bet t̄a k̄á jai a ì blane taië wes siwã' darërëë es, e' blane u sh̄u k̄os a wé ie'pa tso' ee. ³ Et̄a ie'pa t̄o isué t̄o idebit̄u taië ku'ie b̄ö' wörkua suë, e' ane ie'pa ulitane k̄i et et. ⁴ Et̄a ie'pa a Wiköl Batse'r iënewã t̄a eköl eköl ttémi k̄á bánet wakpa ttò wa kuã'k̄i kuã'k̄i wes Wiköl Batse'r t̄o ie'pa ké ttök es.

⁵ E' kéwö ska' t̄a judiowak t̄o Skéköl dalöietã' datse k̄á ulitane k̄i, esepa tso' taië Jerusalén. ⁶ Mik ie'pa t̄o Jesús mik erblökwapka aláneã taië e' t̄tsé, et̄a ie'pa e' dapa'wéã ik̄i t̄tsök bua'ie. Ie'pa t̄o ittse eköl eköl iwákpa ttò wa kuã'k̄i kuã'k̄i es. E' kuek̄i ie'pa tkinewã taië. ⁷ Ie'pa wökranewã t̄a ichérakitò ñi a:

—¿A'kã ie'pa kè dör Galilea wakpa tso' ttök? ⁸ ¿Wes se' ulitane tso' ittök t̄o ie'pa ttöke se' ulitane ttò kuã'k̄i kuã'k̄i wa? ⁹ Íe se' shuã se' tso' datse Partia, Media, Elam, Mesopotamia, Judea, Capadocia, Ponto, Asia, ¹⁰ Frigia, Panfilia, Egipto ena k̄á tso' Libia at̄e ts̄inet Cirene k̄ke. Ñies pè' datse Roma serke íe esepa tso' íe. ¹¹ Se' welepa dör judiowak chök̄le. Welepa kè dör es, esepa e' yö'bak judiowakie. Ñies se' tso' íe datse Creta ena Arabia. Erè ì k̄os kaneõ' Skéköl t̄o buaë e' chök ie'pa tso' e' ane buaë se' éna se' wákpa ttò kuã'k̄i kuã'k̄i e' wa.

¹² E' kuek̄i ie'pa ulitane wökrarulune taië ik̄ittsök. Ie'pa wöã k̄á chowa. Ie'pa ñi chakérak:

^d 1.20 Salmo 109.8 ^e 2.1 Pentecostés kéwö: Pentecostés wà kiane chè Kã Dabom Skeyök kéwö. Judiowak t̄o Ie'pa Yépa Yërulune Egipto e' kéwö tkò'wé one, e' k̄i k̄á de dabom skeyök, et̄a k̄awò skà tkò'wéke ie'pa t̄o e' kiekerakitò Pentecostés. Ñies e' kéwö kièrakitò Iyiwö Shtök Kéwö. K̄awò e' dör wéstela choie Skéköl a iyiwö kite' e' k̄i. Éxodo 23.16 saü.

—Íyi ikkè, ùima e' wà kiane chè?

¹³Erè wẹlepa tō Jesús mik erblökwakpa wayué sulu t̄a ichérakitō:

—Ie'pa tteke blo' tō.

Pedro tō ttè paké

¹⁴Et̄a Pedro e' duéka shkè'ka Jesús ttekölpa tsá malepa dōka dabom eyök k̄i eköl (11), e'pa t̄a. Ie' tō iché sulitane ā aneule: “A yamipa judiowak, ñies a' ulitane serke Jerusalén. Íyi ikkè e' wà pakekeyō a' a. Ye' ttō t̄sō buaë a' tō. ¹⁵Sa' kè tteku' blo' tō wes a' tō ibikeitsè es. Erpa diwō de sul̄itu (9) bla'mi, diwō ikkè kè yi e' ttōta'ka blo' wa. ¹⁶Erè ì tkōke sa' t̄a, e' dör wes Skèköl tteköl kiè Joel, e' tō iyè'atbak es. Ie' tō iyè'at i' es:

¹⁷‘Skèköl tō ichè tō mik k̄a i' erkewatke,

et̄a ye' tō ye' Wiköl patkeraë sulitane k̄i.

E' kuek̄i a' ala'r, wẹpa ena alakölpa,

ekkèpa k̄os ttōraë wes ye' ttekölpa es.

A duladulapa ā ilè kkayërdaë kabsueie ie'pa kè ku' kapökwa e' dalewa.

Ñies a' kèkèpa ā ilè kkayërdaë kabsuè a.

¹⁸Ñies e' kèwō ska' t̄a ye' Wiköl patkeraëyō

ye' kanè mésopa k̄i, wẹpa ena alakölpa.

Es ie'pa tō ye' ttè pakerane imalepa a.

¹⁹K̄á jaì a ye' tō íyi taië suluë kkacheraë, kè suule a' w̄a ese.

K̄á i' k̄i ñies íyi kkacheraëyō as a' isaù:

s'pé sueraë a' tō, bö' sueraë a' tō, shkle taië sueraë a' tō ñies.

²⁰Diwō ttserdawa. Si'wō iardawa batsè wes s'pé es.

E' k̄os tkōraë kam Skèköl kèwō dò e' yök̄i.

K̄awō e' dör buaë shute, e' olo t̄a taië.

²¹E' kèwō ska' t̄a yi k̄os tō e' tsatkè kié Skèköl a,

esepa ulitane tsatkërdaë.’ ”^f

Es Joel tō iyè'at.

²²“A Israel aleripa, ye' ttō t̄sō. A' w̄a ijcher tō mik Jesús Nazaret wak sene' k̄á i' k̄i, et̄a ì kè or yi ā ese wéitō taië se' shuá Skèköl batamik kkayënoie. Es Skèköl tō se' ā ikkaché tō ie' tō ipatkè'. ²³Erè Jesús menettsa a' a klō'wew̄a wes Skèköl tō isuletè'atbak kuaë es, ñies wes

ie' k̄i ikiane es. A' tō wẹpa sulusipa ké ie' ttökwa wötèulewa krus mik.

²⁴Ie' weine siarè ie' kōtewa, erè Skèköl tō ie' shke'okane. Duewa kè ā ie' wöklöne yès. ²⁵E' kuek̄i k̄á iaiaë blu' David ut Skèköl t̄a ima Jesús ttōmi

e' yè'itō i' es:

‘Ye' w̄a ijcher tō kekraë be' tso' ye' t̄a.

Be' tso' ye' t̄a ye' ulà bua'kka ye' kimuk,

^f2.17-21 Joel 2.28-32

e' kuəkī kè ì a ye' orpa wēs.

26-27 E' kuəkī ye' ttsè'r buaë,

ye' ttsò kaneë.

Be' kè tò ye' mepaat pò a,

e' kuəkī ye' enuraë iwà panuk bèrè.

Ye' dör be' kanè méso batse'r e',

e' kuəkī be' kè tò imepaat as ye' nurwa.

28 Be' tò sene michoë ñalé e' kkayè' ye' a.

Ye' tso' be' wörki, e' kuəkī be' tò ye' ttsè'weraë buaë.'g

Es David tò iyè'at.

29 "A yamipa, ye' tò icheke a' a yësyësë. Se' blú kèkè David bak ká iaiaë, e' du'wabak ta inú wötënewa. Ie' pò tso'ia dò ikkè ta íe. 30 Erë David bak Skëköl ttekölie. E' kuəkī ie' wa ijcher tò Skëköl kablè' ie' a iwák ttò wa ttè i' wa: 'Ye' tò be' aleri tkeraka eköl blu'ie wēs be' es.' 31 E' jcher David wa, e' kuəkī ie' tò Cristo shkenekane e' yè'. Ie' tò iyè' tò inú kè atuk pò a, kè inurpawa. 32 Es iwà tka. Skëköl tò Jesús shkeo'kane, e' sué sa' ulitane tò sa' wákpa wöbla wa. 33 Skëköl tò ie' tsémika ta itkékaitò iulà bua'kka dalöiërta' taië. Ie' Yé tò iWiköl mé ie' a wēs ikablè' imuk es. E' ukuökī ta ie' tò iWiköl Batse'r patké sa' kī. E' sué a' tò, e' ttsé a' tò enia. 34 Erë David kè mine'ka ká jaì a wēs Jesús es. Ie' wák tò iyè'at:

'Skëköl tò ichè ye' Këköl a:

Be' e' tkóka ye' ulà bua'kka,

35 e' dalewa ye' tò be' bolökpa merarö be' klò dikia.'h

Es David tò iyè'.

36 "A Israel aleripa ulitane. Ijchenú buaë a' wa tò ye' tso' Jesús chök. E' kötwa a' tò wötëulewa krus mik, erë e' wák tkéka Skëköl tò se' wökirie ñies se' blúie."

37 Mik ie'pa tò ttè e' ttsé, etä ie'pa erianeka taië. Ie'pa tò Pedro ena imalepa a ichaké:

—A yamipa, ¿wēs sa' e' ùmi?

38 Ie' tò iüté:

—A' er mane'ú Skëköl a ta a' e' wöskuóö eköl eköl Jesucristo ttò wa as a' nuì olo'yar a' kī. A' tò iwé es, e' ta Skëköl tò iWiköl Batse'r meraë a' a.

39 Kablè e' dör a' a ena a' aleripa ulitane a ena sulitane serke ká kamië, esepa a ñies. Kablè e' dör wépa kos kieke Këkè dör Se' Këköl e' tò esepa a.

40 Es ttè e' wa ena ttè skà taië wa Pedro tò iché iarak darërëë, ipatté taië ta ichéitò iarak:

—A' e' tsatkó ì tköraë pè' sulusipa ta e' yöki.

41 Es wépa tò ì ché Pedro tò, e' klö'wé, e'pa wöskuérakitö. E' diwö Skëképa Jesús icha erule e' kī iëne taië doka mil mañayök ulatök (3000).

g 2.25-28 Salmo 16.8-11 h 2.34-35 Salmo 110.1

42 Età ie'pa e' ché ttè wa Jesús ttekölpa tsá e'pa tö s'wöbla'weke, e' ttsök kekraë er bua' wa. Nies ie'pa e' ché ñi kímuk ì tso' ie'pa wà e' wa. Nies kekraë ie'pa e' dapa'uke pan ñuk Jesús kötewà e' kèwö tkò'woie. Nies ie'pa e' ché ttök S'yé ta.

Wes Jesús mik erblökwakpa tsá e'pa ser

43 Età ì kè or yi a ese weke taië Jesús ttekölpa tsá e'pa tö Skököl batamik. E' tö pè' ulitane wökrawé taië. 44 Wépa erblé Jesús mik e'pa qos serke wes wák eköl è es. Ì tso' ie'pa wà ese kakmekerakitö ñi a. 45 Es íyi tso' ie'pa wà, ká ö ilè skà, ese watueke ie'pa tö ta iské batekerakitö imalepa kimè kiane esepa a. 46 Diwö bit ta ie'pa ulitane e' dapa'ukerak Skököl wé a. Nies u a u a ie'pa chköke ñita er bua' wa ttsë'rdak buaë. Jesús kötewà e' kèwö tkò'weke pan ñè wa ñita. 47 Skököl kikekëkë ie'pa tö. Sulitane wa ie'pa wër buaë. Ká bit ekké Skököl tö s'tsatkeke taië, e' kueki ie'pa kí daparke taië.

Pedro tö s'kraulewà eköl e' bua'wéne

3 1 Ká et tsáli diwö de mañat ta Pedro ena Juan míyal ttök Skököl ta iwé a. Diwö e' dör ttoie ie' ta. 2 Età eë wëm tkër eköl kune' klò kraulewà. E' datse iyamipa wà itkekeser kekraë Skököl wé wékkö kiè Wékkö Buaala e' a as inuköl kak kiòitö sulitane dökewà eë esepa a. 3 Mik ie' tö Pedro ena Juan dökewatke e' sué, età inuköl kak kiéitö ie'pa a. 4 Età ie'pa tö ie' suéwà krereë iwö ki ta Pedro tö iché ia:

—Sa' saú.

5 Età ie' tö ie'pa sué ta ibikeitséitö tö ilè kakmekeitö ye' a. 6 Erë Pedro tö iché ia:

—Kè ye' wà inuköl ta!. Kè ye' wà oro ta!. Erë ì tso' ye' wà e' mekeyö be' a. Jesucristo Nazaret wak e' ttò wa, be' e' kóka ta be' shkó.

7 Età Pedro tö iklö'wéwà iulà bua'kka ta ibatséka. E' wöshà ta iklö a idiché iëne 8 ta itunëkà e' duékaie ta ishkémi w'kè io'kè. E' ukuökì ta imíwà Skököl wé a Pedro ena Juan ta iwák klò wa. Ie' turkeka, es Skököl kikekaramiitö. 9 Età pè' tso' qos e'pa tö isué tö ishkórami ta Skököl kikekaramiitö. 10 Ie'pa tö ie' suéwà tö ie' dör wëm e' tköke inuköl kak kiök Skököl wé wékkö kiè Wékkö Buaala e' a e'. E' tö ie'pa tkiwéwà taië. Ie'pa wökranewà iweblök.

Pedro tö s'patté Skököl wé a

11 Skököl wé e' ùle kiè Salomón ùle, eë wëm buanene e' tso'ia Pedro ena Juan paklò'uk. E' dalewa pè' qos datse tuneule wé ie'pa tso' eë ta ie'pa tkinewà taië isauk. 12 Mik e' sué Pedro tö, età ie' tö ie'pa a iché: “A Israel aleripa ì kueki a' tkirke? ì kueki a' tso' sa' sauk krereë wësua sa' wák tö wëm i' bua'wéne shköwéne sa' wák diché wa ö sa' serke yësyësë

Skëköl a e' kuëki? ¹³Erë Skëköl dör Abraham, Isaac, Jacob ena se' yépa malepa bak ká iaiäe, e'pa Këköl, e' tö ie' kanè méso kiè Jesús, e' kíkëka íyi ulitane tsata, e' dör yi me'ttsa ttëwa a' tö e'. Ie' watë'ttsa a' tö Pilato wörki eré e' tö ibikeitsbak iökshka. ¹⁴Jesús dör batse'r ena yësyësë warma a' tö iki' tö e' yóttsa. Erë e' skéie a' tö pë' suluë e' yöktsa ka'. ¹⁵Es sene mukwak e' kótwa a' tö, erë ishkeo'kane Skëköl tö. E' kos su' sa' tö sa' wöbla wa. ¹⁶Wëm i' kraulewa e' suule a' wa buaë. Ie' diché iënëne sa' erblöke Jesús mik e' wa. Jesús mik erblë, e' tö wëm i' bua'wëne buaë a' wörki.

¹⁷“A yamipa, ye' wa ijcher tö mik a' ena a' wökirpa tö Jesús kótwa, etä a' kè wa ijcher mokí tö ì wamblök a' tso'. ¹⁸Erë ì yë'atbak Skëköl tö ittekölpa ulitane kkò wa tö wë pairine'bitü idi' wa s'blúie e' kawõtä ttëwa es, e' wawë Skëköl tö es. ¹⁹E' kuëki ì sulu watóttsa. A' er mane'ú Skëköl a as a' nuí olo'yóitö a' ki. ²⁰Etä es ie' tö a' er pablaraë ta Jesús pairi'bituitö idi' wa s'blúie e' patkeraneitö se' a. ²¹Erë i' ta ie' kawõtä senuk ká jai a dò mik Skëköl tö ì kos yuéne buaë wës kenet es etä. Es Skëköl tö iyë'bak ká iaiäe ittekölpa batse'r e'pa wa. ²²Moisés tö Jesús yé' se' yépa bak ká iaiäe, e'pa a' i' es: ‘A' shua Skëköl tö itteköl keraka eköl wës ye' es. E' ttò kos dalöió a' tö. ²³Wépa kè wa ie' ttò dalöiëne, esepa ulitane skerattsa se' wakpa yöki bánet, ie'pa erdawa seraa.’¹ Es Moisés tö iyë'at.

²⁴“Es ñies Samuel ena Skëköl ttekölpa malepa dë'bitü ie' itöki, e'pa kos tö ì tköke kawö ikkë ta, e' yë'atbak. ²⁵Ì uk Skëköl kablë' ká iaiäe ittekölpa wa, e' wà döraë se' ulä a. Ñies ttè me'atbakitö se' yépa bak ká iaiäe e'pa a, e' wà döraë se' ulä a. Ie' tö iyë'atbak Abraham a' i' es: ‘Be' aleripa batamik ye' er buaë chöraë ká ulitane wakpa a.’ ²⁶E' kuëki mik ie' tö ìlā Jesús shke'wékane, etä ipatkéitö se' a kewe se' a er buaë choie as se' ser sulu ese olo'yösö eköl eköl.”

Pedro ena Juan e' tsatké judiowak wökirpa wörki

4 ¹Etä Pedro ena Juan tso'ia s'pattök, e' shua sacerdotepa bitëshka Skëköl wé shkëkipa wökir ta ena saduceowakpa ta. ²Pedro ena Juan tso' s'wöbla'uk tö Jesús kótëwa e' shkenekane. E' wa iwä kkachéitö tö s'duowa e'pa shkerdakane. E' tö sacerdotepa ena ie'pa malepa uluwéka taië. ³Ie'pa tö Pedro ena Juan klö'wëwa. Ká detke tsáli, e' kuëki imëarakitö s'woto wé a dò bule es. ⁴Erë wépa tso' Pedro ttò ttsök, e'pa shua taië ie'pa tö Jesús tté buaë klö'wé. Es Jesús mik erblök'wakpa wëpa è esepa deka mil skëyök e' ulatök (5000).

⁵Bule es ta judiowak wökirpa ena ikueblupa ena s'wöbla'uk ttè dalöiëno wa wakpa e' dapa'wéka Jerusalén. ⁶Ñies sacerdote kibi kiè Anás e' tso'. Ñies Caifás, Juan, Alejandro ena imalepa dör sacerdote kibi e'

¹ 3.22-23 Deuteronomio 18.15,18-19

ditséwö e'pa kos tso'. 7Ie'pa tö Pedro ena Juan tsuk patké ta iduésarak ie'pa wörki ta iwà chakéraitö:

—¿Yi diché wa, yi ttò wa wëm klò kraulewa e' bua'wéne a' tö?

8Etá Pedro a Wiköl Batse'r iénewa taié ta iütéitö:

—A s'wökirpa, a s'kuéblupa. 9Sa' tö s'kirirke e' kime' er bua' wa, e' chaké a' tö sa' a. A' ki ikiane jchenuk tö wes ibuanene. 10I'ñe ta sa' tö ichè a' wörki, ñies Israel aleripa ulitane e'pa wörki tö wëm i' buanene sulitane wörki Jesucristo Nazaret wak e' ttò wa. E' wák kötwa a' tö krus mik erè Skèköl tö ishkeo'kane. 11Skèköl yèkkuò ki itso' kitule: “Ák watè'ttsa u yuökwakpa tö, e' yönene ák bua'buaie.” Ák e' dör Jesucristo chè. 12Ie' dör S'tsatkòkwak. Skèköl kè wa yi skà patkéule ká i' ki s'tsatkoie. E' kuéki Jesucristo eköl è wa s'tsatkèrmi.

13Mik iwökirpa tö isué tö Pedro ena Juan dör skle siarla, kè wöblaule yèkkuò wa erè ittöke buaè kè suane, etá ie'pa tkinewa. Ie'pa éna ianewa tö ie'pa bak shkòk Jesús ta ittòkatapaie. 14Wëm buanene e' dur Pedro ena Juan ta, e' kuéki ie'pa kè a iyènuq tö e' dör kache. 15Etá ipatkémirakitö u'rkí ta ie'pa ate ileritsök. 16Ie'pa iché ñi a:

—¿Wes sò wèpa i' wèmi? Kos Jerusalén wakpa wa ijcher tö ì kè or yi a ese wé ie'pa tö etk. E' kè yènuq se' a tö e' dör kache. 17Erè ipaunúsò as i'tami Jesús tté i' kè pakòia ie'pa tö yi a, es kè itté bunukka ká wa'ñe.

18Etá ikiéraitö ta iché iarak:

—Kè a' kawò ta'ia Jesús tté pakòk yi a. Ñies a' kè kawò ta'ia yi wöbla'uk tté e' wa.

19Erè Pedro ena Juan tö iütéarak:

—A' wákpa tö ibikeitsó tö Skèköl wöa yi ttò dalòie dör buaè sa' a, a' ttò ö ie' ttò. 20Erè ì su' sa' tö ena ì ttsé' sa' tö, e' pakeraè sa' tö kekraè sulitane a.

21Etá iwökirpa tö ie'pa kí pauné darèrèè ta iémirakitö. Wëm kraulewa buanene e' kuéki pè' kos tso' Skèköl kíkòkka. E' kuéki iwökirpa kè ulà dé'wa Pedro ena Juan we'ikòk. 22Wëm buanene Skèköl diché wa e' ki duas tso' dabom tkèyòk (40) kíta.

Jesús mik erblökwakpa tö ikié Skèköl a

23Etá Pedro ena Juan émirakitö ta imíyal wé imalepa tso' ee. Ì kos yè' sacerdotepa wökirpa ena judiowak kuéblupa e'pa tö e' pakéraitö imalepa a sera. 24Mik e' ttsé ie'pa tö, etá ie'pa ulitane kköché ñita Skèköl a i' es: “A Skèköl, ká jai ena ká i' ena dayè ena ì kos tso' iki, e' yò' be' tö. 25Ká iaiäè be' tö sa' kèkèpa David dör be' kanè méso, e' ka' ttòk Wiköl Batse'r wa. Ie' tö iyè' i' es:

‘Ílók ká malepa wakpa uluneka taié troka taié Skèköl kí?’

¿Íók ie'pa ileritseke ñippök ie' ta? Kè e' wamblènuK ie'pa a.

²⁶ Ká wökirpa ena blu'pa e'pa ulitane ñippakka ie' ta.

Ie'pa ileritseke ñippök ie' ta ena wé pairi'bituütö idi' wa s'blúie e' ta.^k
Es David tö iyé'.

²⁷“Ttè e' dör mokjë. Iwà sué sa' tö tö s'wökirpa kiè Herodes ena Poncio Pilato, e'pa ñi dapa'wéka ká i' a Israel aleripa ta ena pè' kè dör Israel aleripa esepa ta ñita Jesús we'ikök. Ie' dör be' kanè méso batse'r pairi'bitu be' tö idi' wa s'blúie e'. ²⁸Es ì kos wé ie'pa tö ie' ta e' wé ie'pa tö wes be' tö isuletè'atbak es. ²⁹A Skèköl, e' kuèki ie'pa tso' sa' pauñuk darèrèè, e' ttsó. Sa' dör be' kanè mésopa e'pa a diché kí mú Jesús tté pakoie kè suane. ³⁰Be' diché kkachó. S'kirirke bua'úne, ì kè or yi a ese ú iwà kkachoe, ñies íyi ese ú taiè Jesús dör be' kanè méso batse'r e' ttö wa.”

³¹Mik ie'pa tö ikié one, etá wé ie'pa tso' e' ké wötí'ne. Etá ie'pa ulitane a Wiköl Batse'r iènewa ta ie'pa tö Skèköl tté paké kè suane.

Jesús mik erblökwakpa ñi kímé

³²Jesús mik erblökwakpa dör taiè. Ie'pa kabikeitsöke ñikkèè, ulitane er ttsè'r ñittsèè. Kè yi tö icheku' tö ie'pa íyi e' dör ie'pa è icha, e' skéie e' dör ie'pa icha ñikkèè. ³³Jesús ttekölpa tsá e'pa tö Jesús shkenekane, e' tté kí pakeke diché taiè wa. Skèköl tö ie'pa kos kímeke taiè. ³⁴⁻³⁵Yi wa ká tso' ö ilè skà tso'rak iwa, ese watuèkerakitö ta iské mekerakitö Jesús ttekölpa tsá e'pa a blatè wépa dör siarè esepa a wes e'pa kiane kímè eköl eköl es. E' kuèki kè yi weirku' siarè ie'pa shua. ³⁶Ie'pa shua wém tso' eköl dör Leví aleri datse ká kiè Chipre, e' kiè José. Jesús ttekölpa tsá tö ikiè méka Bernabé (e' kiane yèno s'pablökwak). ³⁷Wém e' wa ká tso'. E' watuèitö ta iské méitö Jesús ttekölpa tsá a as ie'pa tö s'siarépa kímù iwa.

Ì sulu wamblé Ananías ena Safira e'pa tö e' pakè

5 ¹Erè wém bak eköl kiè Ananías, e' tayè kiè Safira. E'pa tö ká watuéttsa. ²Etá wém e' tö iká ské tsá yétttsa iwákpa a ta ièyök méitö Jesús ttekölpa tsá a wes ká ské seraa es. E' jcher ilaköl wa seraa. ³Etá Pedro tö iché ie' a:

—A Ananías, ¿íók be' e' mettsa Satanás a kítö'wè ta be' kéitö kachök Wiköl Batse'r a? Ká watuébö e' ské kak tséatbö. ⁴Kam be' tö iwataüttsa etá be' icha idir. Ta be' tö iwatuéttsa, etá iské dör be' icha. ¿Íók be' ibikeitsé wamblé es? Be' kè kayène s'ditsö a. Be' kaché Skèköl a.

⁵Mik e' ttsé Ananías tö etá ianewa duowaie. Etá ie'pa kos wa ijchenewa, e'pa suane taiè. ⁶Etá duladulapa wélepa debitu ta inú patrèwarakitö tsémi blèwa.

^k 4.25-26 Salmo 2.1-2

7 Hora tka mañat e' ulatök, etä Ananías tayè dewa Pedro ska'. Wēs iwēm de e' kè jcher ie' wā. 8 Ta Pedro tō ie' a ichaké:

—Ichó ña. ¿Mokī a' tō ká watuē kōs a' tō iché ekkè?

Safira tō iiyté:

—Tó, ekkè je'.

9 Pedro tō iché ia: ¿Iók a' tō kawō mé ñi a Skèköl Wiköl wötsiriuk? Wēpa wā be' wēm nu mí blèwā, sē e' wakpa doyalne tã író ie'pa wā be' nu michoë blèwā ñies.

10 E' bet tã Safira anewa tã iduowa Pedro klò ska'. Mik duladulapa dewa tã Safira nu tēr tã ie'pa wā inú mítser blèwā iwēm o'mik. 11 Etã Skèkëpa Jesús icha erule ulitane ena sulitane wā ijchenewa, e'pa suanerak taië.

Ì kè or yi a ese wé taië Jesús ttekölpa tsá tō

12 Jesús ttekölpa tsá e'pa tō ì kè or yi a, ese weke taië pè' shuā iwā kkachoie. Jesús mik erblökwakpa ulitane e' dapa'uke Salomón ùle a.

13 Pè' èltëpa tō ie'pa dalöieta' erè kè diché dè'kã e' tiukwā ie'pa shuā.

14 Erè wēpa erblé Jesús mik, wēpa ena alakölpã, esepã kī iërkerak taië kekraë. 15 Pè' tō s'kirirke tsémirak katã shuélur ñala kkömik as Pedro tkò tã ilo mú ar esepã wele kī as ibuarne. 16 Ñies kã tso' kōs Jerusalén pamik, e' wakpa de taië s'kirirke wëttsë. Ñies wimblupa sulusi s'tteke esepã wëttsë. Etã e'pa ulitane buanene seraã.

Jesús ttekölpa tsá wötënewã s'wöto wé a

17 Etã sacerdote kibi ena iklépa kiè saduceowakpa, e'pa ukyënekã taië Jesús ttekölpa tsá e'pa kī. 18 E' kuëkī iklö'wëwarakitö wötëwã s'wöto wé a. 19 Erè nañewe tã Skèköl biyöchökwak eköl tō s'wöto wékkö ppée tã iyéttsarak tã iché ia: 20 “A' yúne Skèköl wé a. Eë a' e' duókã sene pa'alī Jesús tã, e' tté pakök sulitane a.” 21 Bule es bla'mi tã idewarak Skèköl wé a tã ie' kékarak s'wöbla'uk wēs ie'pa a iyëne es.

Etã sacerdote kibi ena iklépa tō Israel aleripa wökirpa ulitane kiéttsã e' dapa'ukkã ie'pa tã. Etã Jesús ttekölpa tsá e'pa tsuk patkërakitö. 22 Erè mik ishkëkipa demirak s'wöto wé a, etã kè iwã ikunerak. Tã idebiturak ibiyó mukne 23 tã ichërakitö:

—Sa' tō s'wöto wékkö kué wötëule buaë. Ñies shkëkipa tso'rak iwékkö kkö'nuk. Erè mik sa' tō iwékkö ppée, etã kè sa' wā yi kune eë.

24 Mik Skèköl wé shkëkipa wökir ena sacerdote wökir kibipa, e'pa tō ttë e' ttsé etã ie'pa éna kã chowa tã ñni chakërak: “¿Wēs iwã dötsami?” 25 E' ukuökī tã bet eköl de ibiyó muk tã iché iarak:

—Wēpa wötë'wã a' tō s'wöto wé a, e'pa tso'ne Skèköl wé a s'wöbla'uk.

26 Etã shkëkipa wökir mía iyulök ishkëkipa tã. Iklö'wëwarak erè ie'pa suane dö' pè' tō s'tè ák wa, e' kuëkī ie'pa kè wā iweineia. 27 Mik ideminerak etã itsémirakitö judiowak wökirpa wörki. Etã sacerdote kibi tō iché ie'pa a:

28—Sa' tò a' a iyè' etkème tò wèm e' tté kè pakar yès. Età ùì wamblé a' tò? A' tò Jerusalén wakpa ulitane wöbla'weke ttè e' wa. Nies a' tso' ichök tò wèm e' kötewā, e' nuí tkënewā sa' mik.

29Erè Pedro ena Jesús ttekölpa tsá malepa tò iütérak:

—Sa' kawöta Skëköl ttò dalöiök s'ditsò ttò tsata. 30A' tò Jesús ttökwa ka' wötëulewā krus mik. Erè se' wakpa bak iaiaë e' Këköl e' wák tò Jesús shkeo'kane. 31Skëköl tò ibatsékami e' ska' tkésér iulà bua'kka s'wökirie ena s'tsätökwakie as Israel aleripa er mane'ù tã ie'pa kï ie'pa nuí olo'yarmi. 32Íyi ikkë kos su' sa' tò e' pakök sa' tso' a' a. Nies Wiköl Batse'r mène wépa tò Skëköl ttò dalöieke esepa a, e' tso' a' a ipakök.

33Mik ie'pa tò e' tsé età ie'pa uluneka taië Jesús ttekölpa tsá e'pa kï. Ie'pa éna ittakulur. 34Erè ie'pa shuā wèm tso' eköl e' dör fariseowak kiè Gamaliel. Ie' dör s'wöbla'uk ttè dalöiëno wa wakpa ese eköl. Sulitane tò ie' dalöieke taië. Ie' e' duéka tã iché: “Jesús klépa yólur kañika ekuölö.” Etã ie'pa tò iyélur.

35E' ukuökï tã ichéitö imalepa a:

—A yamipa Israel aleripa. A' isaú bua'ie tò ì weke a' tò wépa wíkképa tã. 36A' éna ianú tò barbane wèm kiè Teudas e' e' ka'ka' ichök tò e' dör wèm taië ese. Wépa dòka cien tkëyök (400) e'pa e' yué ie' klépaie. Ie' du'wā kötulewā tã iklépa pone'mi wì a dià a. Es ilone!. 37E' ukuökï tã mik s'wökirpa s'kiè shtök patké!, e' këwö ska' tã wèm skà eköl kiè Judas Galilea wak e' e' ka'ka'. Pé' wélepa e' yué ie' klépaie. Erè nies ie' kötewā tã iklépa pone'mi sèraa wì a dià a tã ee ilone!. 38E' kuekï ye' tò ichè a' a tò wépa wì múat bèrè. Kè ì sulu wamblar ie'pa tã. Ì aleritseke ie'pa tò ena ì weke ie'pa tò e' dör ttè ësè, e' tã bet tã kè ita'ia. 39Erè Skëköl ttè idir, e' tã kè a' e' alòpakā ikï. A' isaú buaë dö' a' tso' nippök Skëköl tã.

Ie'pa tò Gamaliel ttò iüté. 40Ie'pa tò Jesús ttekölpa tsá e'pa tsuk patkéne tã ippök patkérakitö tã iché iarak: “Kè a' a kawö ta'ia Jesús tté pakök.” E' ukuökï tã iémirakitö. 41Es Jesús ttekölpa tsá e'pa e' yélur judiowak wökirpa wé a. Skëköl tò ie'pa mé weinuk Jesús tté kuekï, e' tò ie'pa tsé'wé buaë. 42Es kekraë ká bit ekkè Skëköl wé a nies u a u a ie'pa tò s'wöbla'weke s'patteke Jesús dör wé pairine'bitu idi' wa s'blúie e' tté buaë wa.

Wépa kul shushtérakitö Jesús ttekölpa tsá kimoie

6 1E' këwö ska' tã Jesús ttókatapa kï daparke taië e'pa dör judiowak. Ie'pa wélepa ttöke griegoie, esepa tò imalepa ttöke iwakpaie e'pa cheke suluë. Ie'pa tò icheke:

—Mik chkè blatérke kekraë, età sa' tayépa schó, esepa kè a imène kos imalepa ttöke judioie esepa a imène ekkè.

2E' kuekï Jesús ttekölpa tsá dabom eyök kï böl (12), e'pa tò Jesús ttókatapa ulitane kié e' dapa'uk tã ichéitörak:

—A yamipa, kè idör buaë sa' a s'wöbla'weke sa' tö Skëköl ttè wa e' kané mukat íyí watioie e' è kuëkí. ³E' kuëkí a' shüa wëpa yuló kul as kané e' ù ie'pa tö. Wëpa suule sulitane wä tö ie'pa a Wiköl Batse'r tso' tajë ena ikabikeitsö buaë, esepa shushtë tã sa' tö ie'pa mekekã kané ñe' uk. ⁴Etã sa' e' ché kekraë ttök Skëköl tã ena s'wöbla'uk ie' ttè wa.

⁵E' wër buaë ie'pa ulitane wa. Ie'pa tö Esteban shushtë. E' erblé buaë Skëköl mik ñies ie' a Wiköl Batse'r tso' tajë. Ñies Felipe, Prócoro, Nicanor, Timón, Pármenas ena Nicolás e'pa shushtë ie'pa tö. Nicolás dör Antioquía wak, e' e' yö'bak judiowakie. ⁶Etã itsémirakitö wé Jesús ttekölpa tsá e'pa tso' ee. Etã ie'pa ulã mékã wëpa ñekkëpa kí tã ie'pa tö ikíé S'yé a tö ikimú.

⁷Es Skëköl ttè kí pakanemi tajë. Ñies Jesús ttökataka kí daparke tajë Jerusalén. Ñies judiowak sacerdotepa tajë tö ttè mik se' erblöke e' wã klö'wé.

Esteban klönewa

⁸Etã Skëköl er buaë ché Esteban a tajë tã diché méitö iã tajë. E' wa ì kè or yí a ese wekeitö tajë pè' shüa iwã kkachioie tö Jesús tté dör mokí. ⁹Erë wëpa wëlepa tö Esteban chémi suluë. Ie'pa wëlepa dör judiowak ñi dapa'wo wé kiè Kané Mésopa Auleshka Esepa Wé e' wakpa. (Ie'pa bak klöulewã kanëblök erë iyërulunëbak.) Ñies judiowak wëlepa tso' datse Cirene, Alejandría, Cilicia ena Asia, e'pa kos wöñarke Esteban kí. ¹⁰Erë Wiköl Batse'r tö Esteban a ttè mé ttoie buaë, e' kuëkí ie'pa kè a e' alirkã ie' kí. ¹¹E' kuëkí ie'pa tö wëpa wëlepa patué kachök: “Sa' ittsé tö Esteban tso' Moisés ena Skëköl chök suluë.” ¹²E' wa ie'pa tö pè' uluwéka tajë Esteban kí. Ñies judiowak kuëblupa ena s'wöbla'uk ttè dalöiëno wa wakpa uluwékarakitö Esteban kí. E' kuëkí ie'pa de Esteban ska' tã iklö'wëwarakitö tsémirakitö judiowak wökirpa ska'. ¹³Ñies wëpa yulérakitö kachioie, e'pa tö iché:

—Këkraë wëm wí tö Skëköl wé dör batse'r i' ena Moisés ttè dalöiëno e' cheke suluë. ¹⁴Ñies sa' tö ie' ttsé ichök tö Jesús Nazaret wak e' tö Skëköl wé tskerawã ena sene me'at Moisés tö se' a e' mane'wekettsaitö.

¹⁵Etã judiowak wökirpa kos tultur ee, e'pa tö isuë tö Esteban wö wër dalölöë wës Skëköl biyöchökwak wö wër es.

Esteban e' tsatké

7 ¹Sacerdote kibi, e' tö Esteban a ichaké:
—Ì kí be' kkatërke íe' dör mokí?

²Ie' iituté: “A yamipa, a yépa, ye' ttò ttsó. Mik se' kékëpa Abraham bak iãiaë Mesopotamia, kam imi' senuk Harán, etã ee se' Këköl olo tã' tajë, e' e' kkayë' ie' a. ³Etã ichéitö iã: ‘Be' kã ena be' yamipa, e' múat tã be' yúshka senuk, kã kkachekeyö be' a ee.’ ⁴Es Abraham e' yé'ttsã Caldea ate

Mesopotamia ee, ta imía senuk Harán. Iyé blénewa e' ukuöki ta Skéköl tö ie' patké' senuk íe, wé se' serke i'ñe ta ee. ⁵Kuaë Skéköl kè wa ká i' mène ie' a yès, elkela wè'ia è kè ie' a imène. Eré e' kèwö ska' ta ie' kè ala'r ta', erè Skéköl kablè' ie' a ttè i' wa: 'Ká i' meraëyö be' aleripa a be' blénewa e' ukuöki ta.' ⁶Ñies Skéköl tö iché ie' a: 'Be' aleripa serdaë ká kua'ki kī wes ká kua'ki wakpa es. Ee ie'pa klördawa kanè mésoie kè patueta' ese. Iweirdarak siarè dōka duas cien tkëyök (400).' ⁷Erè Skéköl tö iché ia: 'Ká wé wakpa tö ie'pa we'ikera, esepa ské we'ikerayö siarè. E' ukuöki ta ie'pa e' yörattsä ká e' a as ye' dalöiorakitö ká i' kī.' ⁸Etä Skéköl tö iché ia: 'A' ala'r wèpa kurke kōs esepa tottola kkuölitla tōō tsir. E' ú kekraë iwà kkachöie tö ye' tö ttè me' be' a.' E' kueki mik ie' alà kiè Isaac kī ká de pākōl, etä itōtola kkuölitla téeitö tsir. Es ñies Isaac tö iwé ilà Jacob' ta. E' sū Jacob tö iwé ila'rla dabom eyök kī bōl (12), e'pa ta. Ie'pa dör se' dör Israel aleripa ditséwōpa dabom eyök kī bōl e' yépa tsá.

⁹"Erè se' yépa tsá, e'pa ukyëne iël tsirla kiè José e' ta. E' kueki ie'pa tö iwato'ttsa ta yi tö itué e' wa imítser Egipto. Erè Skéköl tso' ie' ta. ¹⁰Ie' tö itsatké kekraë kōs iweirke e' shua. Ñies kabikeitsè buaë méitö ia. Ñies ie' tö Faraón ké isaük er bua' wa (Egipto wakpa tö iblupa kōs kiè Faraón). E' kueki Faraón tö ie' tkéka Egipto íyi kōs e' wōkirie ñies ie' wák u wōkirie.

¹¹"E' ukuöki ta ketba aneka Egipto ena Canaán, e' kōs a. E' wakpa weine siarè. Se' yépa tsá kè wa ì kune ñanoie katanoie. ¹²Erè mik Jacob wa ijchenewa tö iyiwō tso' Egipto, etä ie' tö ila'r dör se' yépa tsá, e'pa patkemi iyiwō tauk ee, e' dör ie'pa tsá dè'rō. ¹³Mik ie'pa skà dè'rō etä José tö ie'pa a iché: 'ye' dör a' èl.' Es Faraón wa ijchenewa tö yi ditséwō José dör. ¹⁴E' ukuöki ta ie' tö iyé Jacob ena iyamipa kōs tsuk patké as idōbitu Egipto. E'pa dōka dabom kuryök kī skel (75). ¹⁵Es Jacob minea senuk Egipto. Ee iblénewa. Ee ie' ala'r dör se' yépa tsá, e'pa blèrulune ñies. ¹⁶Ie'pa nu minene Siquem wötéwa iwakpa pō a. Ká e' wato' Hamor ala'r tö Abraham a pöie.

¹⁷"Erè Skéköl kablè' Abraham a ttè i' wa: 'Be' aleripa yerattsane ye' tö Egipto.' Mik e' kèwö dökewatke, etä se' yépa kī alōne taië. ¹⁸E' kèwö ska' ta Egipto blú ské tkéneka, e' kè wa José pakè jcher. ¹⁹Blu' e' tö se' yépa kitō'wé we'iké siarè. Ie' tö ie'pa ké kēsik wa ila'rla wèpa kune erpa esepa kōs watōktsa as iduölur. ²⁰E' kèwö ska' ta Moisés kune', e' dör buaala shute. Iyé ena imì tö ikkō'né u a dōka sí mañat. ²¹E' ukuöki ta ie'pa kawōta iwatōktsa as iduōwa erè Egipto blú alà busi tö ikuéwa tsémi u a tala'wé wes iwák alà es. ²²Es Moisés yöne taië íyi jcher Egipto wakpa wa, kōs e' wa. Ittō è kī ittšēnewa, ñies ì wēkeitö e' è kī iwēnewa tö ie' dör wēm taië ese.

²³"Mik ie' kī duas de dabom tkëyök, (40) etä ibikeitséitö: 'Ye' mía ye' yamipa dör Israel aleripa e' weblök.' ²⁴Etä ie' isué tö egiptowak eköl

¹7.8 Jacob: E' kiè ñies Israel.

tso' Israel aleri eköl we'ikök. E' kueki ie' mishka itsatkök ta egiptowak ttéwãitö iskéie. ²⁵E' ibikeitsé tö iyamipa Israel aleripa éna iarmi tö Skököl tö ie' patké ie'pa tsatkök. Erë kè iwà ane ie'pa éna. ²⁶Bule es ta ie' tö Israel aleripa kué böl ñippök. Ie' ki ikiane tö ie'pa mú er buarne ñi ki, e' kueki ichéitö iarak: 'A dör ñi yamipa. ¿Iók a' ñi we'ikò?' ²⁷Etã eköl tö iyami we'ikeke, e' tö Moisés patkéumi ta ichéitö ia: '¿Yi tö be' tkéka sa' wökirie sa' shulökwakie?' ²⁸¿Be' éna ye' ttakwã wes chki be' tö egiptowak kötwa es?' ²⁹E' ttséwã Moisés tö ta itkashkar kã bánet kiè Madián ee. Ee isené wes kã kuã'ki wak es. Ee ila'rla kéka böl.

³⁰“Ee ie' sené dò duas dabom tkëyök (40). Kã et ta Skököl biyöchökwak eköl e' kkaché ie' a Sinaí kébata a tsinet kã sir poë wé kè yi serku' ese ska'. Ie' e' kkaché ia kal tsir wõnarke bö'ie e' shuã. ³¹Moisés wökranewã iweblök. Erë mik ie' e' skéwã isauk bua'iewã ta Skököl ttò ttséitö, e' tö iché ia: ³²'Ye' dör be' yépa bak iaiaë kiè Abraham, Isaac ena Jacob e'pa Këköl.' Etã Moisés painéka taië suane kueki. Ie' kè diché dë'kaia isauk. ³³Etã Skököl tö iché ia: 'Wé be' dur, e' ké dör batse'r, e' kueki be' klökkuö yóttã. ³⁴Moki ye' isué tö wépa dör ye' icha tso' Egipto e'pa weirke. Ie'pa kköchöke e' ttséyö. E' kueki ye' dë'ttsã ie'pa tsatkök. E' kueki ittso': Ye' tö be' patkerami Egipto.'

³⁵“Israel aleripa tö iyè' Moisés a: '¿Yi tö be' tkéka sa' wökirie sa' shulökwakie?' Eré ie'pa tö ie' watë'ttsã, eré Skököl tö patké' ie'pa wökirie ena ie'pa tsatkökwakie. E' bak mik Skököl biyöchökwak e' kkayë'wã ie' a kal tsitsirla shuã etã. ³⁶Es Moisés tö se' yépa yë'ttsã Egipto a. Egipto ena dayë kiè Dayë Mat ee ie' tö ì kè or yi a ese wé taië. Nies e' wéitö duas dabom tkëyök ekké kã sir poë wé kè yi serku' ee. ³⁷Ie' wák tö iché ie'pa a: 'Skököl tö itteköl kerakã eköl a' shuã wes ye' es.' ³⁸Mik Israel aleripa tso'rak echkaie kã sir poë wé kè yi serku' ee, etã Moisés tso' ie'pa shuã. Nies Skököl biyöchökwak tté ie' ta Sinaí kébata a. Skököl tté tö sene meke sia e' yëne ie' a ee, e' pakéne ie' tö se' a.

³⁹“Eré se' yépa kè wã ie' tté dalöiëne'. Ie'pa tö ie' tté watë'ttsã. Ie'pa shkakne Egipto. ⁴⁰E' kueki ie'pa tö iché Aarón a: 'Moisés tö se' yë'ttsã Egipto a. Kè sa' wã ijcher ì tka ie' ta. E' kueki íyi diököl yuó se' a böt mañat dalöie skökölie as e' mi' se' wëttsuk.' ⁴¹Es ie'pa tö baka pupula diököl yué dalöie. Ta iyiwak jchérakitö mè baka diököl a idalöioie. Ie'pa tö e' kéwö tkó'wé taië, baka diököl yuérakitö iwákpa ulà wa, e' dalöioie. ⁴²E' kueki Skököl e' skéttã ie'pa yöki. Ie' tö ie'pa méat as bëkwö dalöiörakitö ie' skéie. Es Skököl ttekölpa tö ikit iyëkkuö ki. Ie'pa tö ichè:

'A Israel aleripa,

mik a' sene' kã sir poë wé kè yi serku' ee duas dabom tkëyök (40)
ekké,

etã a' tö iyiwak jchë' eré e' kè dör ye' dalöioie.

⁴³Wé dalöieke pë' tö skökölie kiè Moloc, e' diököl wéla dami a' wã.

Ñies wé dalöieke pè' tò skèkölíe kiè Refán e' diököl bëkwöie, e' dami a' wà.

E' kòs diököl yué a' wákpa tò, esepa dami a' wà dalöie.

E' kuekì ye' tò a' patkeraë kãmíe weinuk siarë Babilonia wì'kie.'^m

Es ikiteat.

⁴⁴“Es mik se' yépa bak senuk ká sir poë wé kè yi serku' ee, età ie'pa wa datsi'kuö dami e' shukuekear Skèköl wéie. E' a ie' bak e' kkachök ie'pa a. U e' yöne wes ie' tò Moisés ka' iyuök es, wes ie' tò ikkayè' ia es. ⁴⁵E' ukuökì tã u e' méat se' yépa bak e'pa tò ileripa a. Mik ie'pa demi Josué tã pè' kuà'kì wakpa ká klò'ukwã, etã u e' mirwarak iwã. Skèköl tò pè' kuà'kì wakpa uyéttsã ie'pa yöki. E' ukuökì ká taië tã David tkènekã blu'ie. E' kèwö ska' tã u yöne iaiã datsi'kuö wa, e' tso'ia. ⁴⁶David wër buaë Skèköl wa tã ie' a David tò kawö kié ie' dalöio wé yuoie Israel aleripa a. ⁴⁷Erë David alà kiè Salomón, e' tò Skèköl wé e' yué. ⁴⁸Erë Skèköl dör íyi ulitane tsãtã e' kè ser u yué s'ditsö tò ese a. Es itteköl eköl tò iyè'at, e' tò ichè: ⁴⁹⁻⁵⁰ ‘Skèköl tò ichè:

Ká jai e' dör ye' e' tkoie.

ká i' dör ye' klò tkoser.

Ye' wák tò íyi kòs yö',

e' kuekì ¿wes a' tò u yuèmi ye' a?

¿Wes a' tò ká mèmi ye' a enoie?''

Es ikiteat.

⁵¹“Erë a' kè tò Skèköl dalöieta'. A' er darërë. A' kukuöña darërëë. Kèkraë Wiköl Batse'r wöklò'wè a' tò. A' dör wes a' yépa bak ká iaiã es. ⁵²Ie'pa tò Skèköl ttekölpa kòs we'ik. Es ñies ittekölpa bak ichök tò yi dör Yësyësë Chökle e' datse, e'pa kòtuluk ie'pa tò. I'ñe tã yi dör Yësyësë Chökle ñe' detke, erë iwatuéttsã a' tò ttèwã. ⁵³A' ulã a Skèköl ttè dalöiëno dè' ibiyöchökwakpa wa. Erë a' kè tò idalöie.”

Esteban ttéwã ie'pa tò

⁵⁴Mik iwökirpa tò ì pakè Esteban tò e' ttsé, etã ie'pa ulunekã ikì taië. Ie'pa kà wötéwã ulune è kuekì. ⁵⁵Erë Esteban kì Wiköl Batse'r kì de taië tã iwö kéká ká jai a tã Skèköl olo taië e' suéitö. Ñies ie' tò Jesús sué dur Skèköl ulã bua'kka. ⁵⁶Ie' tò iché:

—Iisáú! Ye' tso' isaúk tò ká jai wékkö àr áie. Ñies Jesús dör S'ditsö Alà e' saúk ye' tso' tò idur Skèköl ulã bua'kka.

⁵⁷Erë ie'pa e' kukuöña wötéwã as kè iwattsér. Etã iãnekarak taië tã imishkarak sèraã Esteban kì. ⁵⁸Tã iyéttsarakitö Jerusalén a mítser u'rki ee, tã ie'pa tò ie' témi ák wa ittowaie. Esteban kkatökwakpa tso' itök, e'pa datsi' me'itörak duladula kiè Saulo e' a blè.

^m 7.42-43 Amós 5.25-27 ⁿ 7.49-50 Isaías 66.1-2

⁵⁹Ie'pa tso' Esteban tök ák wa, e' dalewa ie' tó ikié Skéköl a i' es: “A Skékëpa Jesús, ye' wiköl tsúmi be' ska'.” ⁶⁰E' ukuókí tã ie' e' tkéwã kuchë kí tã ianekã taië: “A Skékëpa, ì sulu wamblök itso'rak, e' nuí olo'yó ie'pa kí.”

Mik e' chéitö tã iduowã.

8

¹Esteban ttéwã ie'pa tó e' tó Saulo ttsë'wé buaë.

Saulo tó Jesús mik erblökwakpa we'ikémitke

E' diwö shà tã Skékëpa Jesús icha erule tso' Jerusalén e'pa we'ikémitke pè' tó. Ie'pa kos tkayalmi dò Judea ena Samaria. Erë Jesús ttekölpa tsá e'pa kè mineyal. ²Wëpa wëlepa tó Skéköl dalöieke taië, esepa tó Esteban nu bléwã tã ie' iëitsérakitö taië. ³Erë Saulo tó Skékëpa Jesús icha erule e'pa we'ikémi siarë. Ie' mirwã u a u a ie'pa yöktsã kuulemi patkëmi wötèwã s'wóto wé a wëpa ena alakölpã ñies.

Jesús tté pakane Samaria wakpa a

⁴Erë wépa bakyalmi Jerusalén, e'pa tó Jesús tté buaë pakémir kã wa'ñe wé imirwarak ee. ⁵Es Felipe míã Samaria. Eë ie' tó wé pairine'bitü idi' wa s'blúie e' tté pakémi kã e' wakpa a. ⁶Mik ie'pa tó ie' ttöke e' ttsé ñies ì kè or yi a ese wëkeitö, e' suérakitö etã ie'pa tó ittò kïttseke bua'iewã. ⁷Es pè' a wimblupa sulusi tso', esepa bua'wéneitö taië. Wimblupa sulusi yërulune arkekarak taië. Es ñies s'kraulewã taië ena s'bachiulewã taië, esepa buanene buaë. ⁸E' kuëkí kã e' wakpa kos ttsé'ne buaë.

⁹Etã kã e' a wëm tso' eköl kiè Simón. Ie' kanëblë'mi iaiãë wës awá es. E' wa ie' tó Samaria wakpa kítë' taië. Es ie' e' kkeö tó ie' dör imalepa tsatã. ¹⁰Kã e' wakpa ulitane, siarëpa ñies inuköl blúpa, e'pa tó ie' ttò klöo' buaë. Ie'pa tó iyë': “Skéköl kiè Diché Taië, e' e' yué Simónie.”

¹¹Bànet ie' tó ie'pa kítë'bitü ikanè wa. E' kuëkí ie'pa tó ie' ttò iütë' buaë. ¹²Erë mik Felipe tó ì blúie Skéköl tso' e' tté buaë paké ñies Jesucristo tté buaë paké, etã ie'pa tó iklö'wé tã ie' wöskuëlor wëpa ena alakölpã. ¹³Ñies Simón wák erblé Jesús mik tã iwöskué. Ie' michoë Felipe tã këkraë. Es ie' isué tó ì kè or yi a ese wëke Felipe tó taië, e' tó ie' tkiwéwã.

¹⁴Mik Jesús ttekölpa tsá tso' Jerusalén, e'pa wã ijchenewã tó Samaria wakpa tó Skéköl tté klö'wé, etã ie'pa tó Pedro ena Juan patkëmi ee. ¹⁵Mik idemirak, etã ikiérakitö S'yé a Samaria wakpa tó iklö'wé, e'pa kí as Wiköl Batse'r dò ie'pa kí. ¹⁶Kãm Wiköl Batse'r döbitü ie'pa ulitane kí. Ie'pa wösuule Skékëpa Jesús ttò wa, e' è o' ie'pa tó. ¹⁷E' kuëkí Pedro ena Juan ulà mékã ie'pa kí tã Wiköl Batse'r de ie'pa kí.

¹⁸Simón tó isué tó mik Jesús ttekölpa tsá ulà mékã ie'pa kí etã Wiköl Batse'r debitü iki. E' kuëkí ie' tó inuköl watké Pedro ena Juan a, ¹⁹tã ie' tó iché iarak:

—A' wā diché tso' sē, e' mú ye' a as yi kī ye' ulà mèkà t̄a ese kī Wikōl Batse'r dōbitū wēs a' tō iweke es.

²⁰Pedro tō iūté:

—Be' tō ibikeitsè tō ì kakkè Skèkōl tō e' t̄ormi inukōl wa, e' kuekī be' inukōl weinú kekraë be' wák t̄a. ²¹Be' er kè dōr yēsēsè Skèkōl wōā, e' kuekī diché i' kè menuk be' a. ²²Be' er mane'ú ì sulu wamblekebō i', e' yōkī. Skèkōl a ikió as ì bikeitsébō suluë isalema e' nuí olo'yèmiitō be' kī. ²³Ye' tō isuë tō be' er dōr suluë kēsik ème. E' wā be' wák kōs tso' klōulewā.

²⁴Simón tō iūté:

—Skèkōl a ikió as ì kōs ché a' tō e' kè tkò ye' t̄a.

²⁵Etā ì o' Skèkōl tō ie'pa t̄a e' ttè paké Pedro ena Juan tō. Nies s'pattérakitō Skèkēpa Jesús tté wa. E' ukuōkī t̄a ie'pa míyalne Jerusalén. T̄a ñalā wa Samaria shūā k̄a tso' tajē, e' wakpa a ie'pa tō Jesús tté buaë pakerami wēs imirdak es.

Felipe tō Etiopía wák ekōl wōbla'wé

²⁶E' ukuōkī t̄a Skèkōl biyōchōkwak ekōl tō iché Felipe a: “Be' yúshka dayè ñak kke Jerusalén ñalé wa dō Gaza.” Ñalā e' tkōkemi k̄a sir poë wé kè yi serku' e' kke. ²⁷Etā Felipe míā t̄a ñalā e' kī wēm kuëitō ekōl, e' dōr Etiopía wak. Ie' dōr ik̄a wōkirpa e' ekōl. Ie' dōr alakōl tso' Etiopía blúie, e' inukōl blök wōkir. Ie' dare Jerusalén Skèkōl dalōiök. ²⁸Ie' mirwane ik̄aska' karreta kī, e' a itkēr yēkkuō kit Skèkōl ttekōl kiè Isaiás tō, e' sauk.

²⁹Etā Wikōl Batse'r tō iché Felipe a: “Be' yú, be' e' skōwā karreta sē o'mik.” ³⁰Mik Felipe e' skéwā karreta o'mik, etā ie' tō ittés tō Etiopía wak tō Skèkōl yēkkuō kit Isaiás tō, e' aritserami. Felipe tō ie' a ichaké:

—Yēkkuō sē aritseke be' tō ¿e' wà ane be' éna?

³¹Ie' tō iūté:

—Kè yi ku' ye' wōbla'uk t̄a ¿wēs ye' a iwā armi?

Ie' tō Felipe kié e' tkōkkā ie' o'mik. ³²Ie' tō aritserami wé ichéitō:

“Ie' dōr wēs obeja urula tsèmi ttèwā es.

Wēs obeja pupula kè artā' mik ikōyök tērke etā, es ñies kè ie' wā ì yēne.

³³Ie'pa tō ijaëwé siarè t̄a ikichatéttsarakitō,

erè ì kī ikichatēnettsā e' kè dōr moki.

Ie' ttéwarakitō as kè iseriā k̄a i' kī,

e' kuekī kè ie' alà atē.”^o

³⁴Etiopía wak tō Felipe a ichaké:

—Be' we'ikèyō, ichó ña, ¿yi cheke Skèkōl ttekōl Isaiás tō ttè i' wa? ¿Ie' wák e' chōke o'ka chekeitō?

^o 8.32-33 Isaiás 53.7-8

35 Etā ttè aritsétkeitō, e' wa Felipe tō ie' a Jesús tté buaë pakémi. 36-37 Es ittōramirak ñalā wa tā eē di' kuérakitō. Etā Etiopía wak tō iché Felipe a: —Īē di' tso'. Ā̀i kuekī be' kè tō ye' wōskuè?ʳ

38 Etā Etiopía wak tō iché karreta ñākōkwak a tō karreta wōklō'ūwā. Tā ie'pa e' éwa tā imíyal bölē di' a. Eē Felipe tō Etiopía wak wōskuée. 39 Mik iē' yélune di' a etā Skēkōl Wikōl tō Felipe batsékami bet ká bánet a, Etiopía wak kè wā isunēiā yēs, erē imía ttsè'ne buaë kaneē. 40 Etā Felipe tō isuē tō ie' demi dur ká kiè Azoto eē. Etā ie' mía Jesús tté buaë pakōk ká tso' ñalā kī ese wakpa a dōmi Cesarea.

Saulo er mane'wé Jesús a

9 1-2 E' dalewa Saulo tso'ia Skēkēpa ttōkatapa pauñuk ttēwā. E' kuekī ie' mía sacerdote kibi ska' yēkkuō kiōk shkōwāie judiowak ñi dapa'wo wé tso' Damasco eē. Yēkkuō e' kī kawō mēne iā s'tso' ttè kiè Jesús dōr Ñalā Pa'alī e' dikīa esepa yulōk klō'wōwā tsēmi Jerusalén, kè tkine tō alakōlpa ō wēpa idir. 3 Erē mik Saulo dōkemitke tsinet Damasco e' bet ibiteshka ká jaī a bō'wōie e' olo bune taiē ipamik. 4 Tā ie' anere iskī. Etā ttō ttséitō tō iché iā: “A Saulo, a Saulo, Ā̀iōk be' tō ye' we'ikeke?”

5 Saulo tō ie' a ichaké: “A Skēkēpa, Ā̀be' dōr yi?” Etā iūténéitō: “Ye' dōr Jesús we'ikeke be' tō e'. 6 Erē be' e' kōkā. Be' yú Damasco. Eē be' a iyērmi tō ì uk be' ké.”

7 Etā Saulo wapiepa tkirulune taiē. Ie'pa tō yile ttō ttsé, erē kè ie'pa wā yi sune. 8 E' ukuōkī tā Saulo e' kēkā tā iwōbla shuppée, erē kè iwawēr. E' kuekī itsémirakitō ulā iērule dō Damasco. 9 Eē ie' sené ká mañat kè wōbla wawēne, kè wā ì ñane, kè wā ì yane yēs.

10 Jesús ttōkata ekōl kiè Ananías serke Damasco e' a Skēkēpa Jesús e' kkachéwā kabsueie tā iché iā: “iA Ananías!” Ie' iūté: “A Skēkēpa Jesús, ichó ña.”

11 Skēkēpa tō iché iā: “Be' yú ñalā kiè Yēsyesē e' kī dō Judas u a. Eē wēm tso' kiè Saulo datse Tarso, e' yuló. Ie' tso' ttōk S'yé tā. 12 Ie' tō isuē kabsueie tō wēm kiè Ananías dewā ie' ska' iulā mékā ikī as iwōbla wawērne, e' dōr be'.”

13 Ie' iūté: “A Skēkēpa Jesús, erē ye' a iyēule taiē ie'pa wā tō wēm e' tō be' icha batse'r tso' Jerusalén e'pa we'ikeke siarē. 14 I'ñe tā e' de ĩē. Sacerdotepa wōkirpa tō kawō mé ie' a as wépa tō be' a e' tsatkè kié esepa kos klō'uluritō.”

15 Erē Skēkēpa Jesús tō iché iā: “Be' yú. Ye' tō wēm e' shukitbak as ie' tō ye' tté pakō pē' kè dōr Israel aleripa esepa a ena iblúpa a ñies Israel

ʳ 8.37 Yēkkuō kitule ká iaiāē keweie imalepa yōkī esepa kè wā 8.37 kitekā. Ttè e' tō iché: *Felipe tō ie' a iché: —Be' tō ttè i' klō'wé mokīē e' tā be' wōsurmi. Etā wēm tō iūté: —Ye' tō iklō'wé tō Jesucristo dōr Skēkōl Alā e'.*

aleripa a. ¹⁶Ye' wák tò ikkacheraë ie' a tò ie' kawöta weinuk ye' tté kuëki."

¹⁷Etä Ananías demi Saulo ska' ta iulà méka iki ta iché ia:

—A yami Saulo, Skëképa Jesús e' kkayë'wa be' a ñala ki be' dë'bitu' e' wa, e' tò ye' patké as be' wöbla wawërne ñies as Wiköl Batse'r iërwa be' a.

¹⁸E' bet ta ì tso' Saulo wöbla mik nima kkuö sù, e' darolone ta iwöbla wawënëne. Etä ie' e' kéka ta imía ta ie' e' wöskuée. ¹⁹E' ukuöki ta ichkéne ta idiché iënëne. Etä ie' e' tséat Jesús ttökatapa welepa tso' Damasco e'pa ta ká elke ulatök.

Saulo tö Jesús tté paké Damasco

²⁰E' ukuöki ta bet Saulo tö Jesús tté pakémi judiowak a ie'pa ñi dapa'wo wé kos a. Ie'pa a ichekeitö tö Jesús dör Skëköl Alà chökle.

²¹Wépa kos tò ie' ttò ttsé, e'pa wökrarulune ittök ta ñni chakérak:

—¿Ie' wí kè dör wépa tò e' tsatké kié Jesús a tso' Jerusalén esepa we'ik siarë? ¿Kè ie' wëbi wí dë'bitu' ie'pa esepa tso' íe e'pa kló'ukwa wömëttsa sacerdotepa wökirpa ulà a?

²²Erë Saulo tö Jesús tté pakéwaie kíta kíta, kè suane. Ie' tò ikkaché judiowak serke Damasco e'pa a tò mokí Jesús dör wé pairine'bitu' idi' wa s'blúie e'. Ttè e' wa ie'pa siwa'blöwélur ie' tò.

Saulo tkashkar judiowak yöki

²³Ká taië ukuöki ta judiowak tté ñita Saulo ttowa. ²⁴Erë e' jchenewa ie' wa. Ñië nañë ie'pa tso' ipanuk ttéwa ká wékkö dökettsa ese ska'. ²⁵Erë nañewe iklépa tò ie' iéka kkó blublu a ta iíemi ká tso' kköiëule shkit kakkëë e' mik enaena. Es ie' tkashkar.

Saulo dene Jerusalén

²⁶Mik ie' demi Jerusalén, etä ie' dapa'wak Jesús ttökatapa ta. Erë ie'pa kè wa iklöone tò mokí ie' erblé Jesús mik. Ie'pa suane iyöki. ²⁷Erë Bernabé wa ie' mítser kkaché Jesús ttekölpa tsá e'pa a. Bernabé tò ipaké ie'pa a tò Saulo tö Skëképa Jesús su' ñala ki ta eë itté ie' ta. Ñies ichéitö tö Saulo kapakétke Damasco Jesús ttò wa kè suane. ²⁸Es Saulo e' tséat Jerusalén dami Jesús ttekölpa tsá e'pa ta. Këkraë ie' tö Skëképa Jesús tté pakeke kè suane. ²⁹Ñies ie' tò itté pakeke judiowak ttöke griegoie esepa a. Erë ie'pa ñi iütéka taië ie' ta. E' kuëki ie'pa tò ima'wé ttéwa. ³⁰Mik e' jchenewa iyamipa wa, etä ie'pa wa imítser Cesarea, eë ta ipatkémi dö Tarso.

³¹E' ukuöki ta Skëképa Jesús icha erule erule kos tso' Judea ena Galilea ena Samaria e'pa atene bèrë, kè yi tò ie'pa we'ikéia. Ie'pa yörike buaë Skëköl tté dikia. Ñies ie'pa tö Skëköl dalöieke taië. Wiköl Batse'r tò ie'pa kimeke as ikí iërdak taië këkraë.

Eneas buanene

³²Pedro shkōke ká wa'ñe ie'pa kōs pakōk wé ie'pa tso' ese ska'. Etā ide ñies ká kiè Lida s'batse'rpa serke eē e'pa pakōk. ³³Etā eē wēm ekōl kuéitō kiè Eneas e' kraulewā me'r ka' kī e' kī duas de pākōl (8). ³⁴Pedro tō iché iā:

—Jesucristo tō be' bua'wéne. Be' e' kōkā tā be' ka' pashuó.

E' bet tā ie' e' kéka. ³⁵E' ukuōkī tā pē' tso' Lida ena Sarón, e'pa ulitane tō ie' sué. E' kuekī ie'pa er mane'wé Skékēpa Jesús a.

Dorcas shkēnekāne

³⁶E' kēwō ska' tā ká kiè Jope eē alakōl serke ekōl dōr Jesús ttōkata, e' kiè Tabitá (griegoie ikiè e' dōr Dorcas⁹). Kēkraē ie' bak ì buaē uk ena s'siārēpa kīmuk. ³⁷Ká e' ulatōk tā ie' kirinewā tā iduowā. Inú pasunetke tā imékā úshu kākke ese a. ³⁸Jope atē Lida o'mik wé Pedro tso' eē. Jesús ttōkatapa serke Jope, e'pa wā ijcher tō ie' tso' Lida, e' kuekī ie'pa tō wēpa patké bōl ichōk ie' a: “Be' shkō bet Jope.”

³⁹Es ie' mīā ie'pa tā. Mik idemirak, etā ie' tsēmi u shūā wé Dorcas nu me'r eē. Alakōlpa schó' kōs iūke taiē. E'pa iēnewā ie' pamik. Etā ie'pa tō paio ena datsī' yō' Dorcas tō mik ibak ttsē'ka etā, e' kkaché Pedro a. ⁴⁰Etā Pedro tō ie'pa ké e' yōkulur tā ie' e' tkēwā kuchē kī tā itté S'yé tā. E' ukuōkī tā ie' tō inú sué tā iché:

—A Tabitá, be' e' kōkā.

Etā ie' wōbla shuppée. Mik Pedro suéitō etā ie' e' tkésēr. ⁴¹Pedro tō ikló'wēwā iulà a duéka. E' ukuōkī tā ie' tō alakōlpa schó' ena s'batse'r malepa kié tā Tabitá kkachéitō ie'pa a ttsē'ka. ⁴²E' jchenewā Jope wakpa kōs wā tā ie'pa taiē erblé Skékēpa Jesús mik. ⁴³Tā Pedro e' tséat taiē Jope wēm kiè Simón e' ska'. Wēm e' dōr iyiwak kkuōlit kanéukwak.

Pedro tō Jesús tté buaē paké Cornelio a

10 ¹Ká kiè Cesarea eē wēm serke ekōl kiè Cornelio, e' dōr Roma ñippōkwakpa eruleē kiè Italiano e' capitán. ²Ie' kè dōr judiowak erē ie' dōr wēm yēsýēsē Skékōl wōa. Ie' ena iyamipa ekka, e'pa tō Skékōl dalōieke taiē. Ñies ie' tō inukōl kakmeke taiē judiowak kīmoie. Kēkraē ie' ttōke Skékōl tā. ³Ká et tsālī tā diwō de mañat, etā ie' tō isué buaē kabsueie tō Skékōl biyōchōkwak ekōl dewā wé ie' tso' eē tā ichéitō iā: “A Cornelio.” ⁴Ie' tkinewā tā Skékōl biyōchōkwak suéwāitō krereē tā ie' tō iché iā: “A kēkē, ¿ì kiane be' kī?” Etā Skékōl biyōchōkwak tō ie' iūté: “Be' ttōke Skékōl tā ena s'siārēpa kīmeke, e' wēr buaē ie' wa. ⁵E' kuekī yile

⁹9.36 Dorcas: S'kiè e' wà kiane chèsulī. ^r9.39 schó': E' dōr alakōlpa wēm blēulewā kam serwane ese.

patkómi Jope. Eë wëm tso' kiè Simón, kiè ñies Pedro e' kiök patkó. ⁶Ie' tso' wëm eköl kiè ñies Simón dör iyiwak kkuölit kanéukwak, e' ska', ie' u me'r dayë kkömik.”

⁷Mik Skëköl biyöchökwak ttè one Cornelio tã e' mía etã Cornelio tö ikanè mésopa kiè böl ena ñippökwak kiéitö eköl ñies. Ñippökwak e' tö Skëköl dalöieke tajë. Ie' dör Cornelio kímukwak bua'ie. ⁸Cornelio tö ì kôs tka ie' tã e' paké ie'pa a. E' ukuöki tã ie'pa patkémiiitö dò Jope.

⁹Bule es diwö de bata a tã Cornelio kanè mésopa dami ñala wa döketke tsjinet Jope. E' dalewa Pedro tkaka u bata ki ttök Skëköl tã. ¹⁰Pedro dúé bli wa erë ulirkeia ie' a, e' dalewa isuéitö kabsueie. ¹¹Ie' tö isué tö ká jaì kköbunane tã datsi' ukuö bërie suë iklöulewa ibata tkël a, e' bitëwa dò iski. ¹²Datsi' ukuö e' shua iyiwak klöka, e' sköke ibatsi' ki ena dù dör ñá judiowak a esepa tkërkí tsakjé. ¹³Etã ie' tö ttò ttsé tã ichéitö ia: “A Pedro, be' e' kóka. Iyiwak se ttó tã ikató.”

¹⁴Erë ie' tö iüté: “Au. A Skëköl, iyiwak dör ñá ese kè kataule ye' wa yës.” ¹⁵Tã ttò e' tö ichéne Pedro a: “Í batse'wétke Skëköl tö e' kè kiaría ñá.”

¹⁶E' tka mañatökicha tã datsi' ukuö míkane ká jaì a. ¹⁷Pedro tso'ia ibikeitsök tajë ì suéyö kabsueie çima e' wà kiane chë? E' wöshaë tã wëpa patkë' Cornelio tö, e'pa tö Simón u kué tã iëter Simón ukkò a. ¹⁸Ie'pa tö ichaké: “¿Íe wëm kiè Simón kiekerakitö ñies Pedro, e' tso'?”

¹⁹Pedro tso'ia ì suéitö kabsueie e' bikeitsök, etã Wiköl Batse'r tö iché ia: “Ittsó. Wëpa mañal tso' be' yulök. ²⁰Be' e' ówa tã be' yú ie'pa tã. Kè ibikeitsar bötböt. Ye' tö ie'pa patkébitu be' tsukmi.”

²¹Etã Pedro e' éwa tã iché ie'pa a:

—Yi yuleke a' tö, e' dör ye'. ¿Í dör iwà?

²²Ie'pa iüté:

—Wëm kiè Cornelio dör Roma ñippökwakpa capitán eköl, e' tö sa' patkë' be' yulök. Ie' dör wëm yësyësë. Skëköl dalöiekeitö tajë. Judiowak ulitane ki ie' kiar tajë. Skëköl biyöchökwak batse'r e' eköl tö iyë' ie' a: “Pedro kió as ie' bitu be' u a. Ì kôs cheke ie' tö be' a, e' ttsó.”

²³Etã Pedro tö ie'pa kiéwa weshkë. Eë ie'pa kapére. Bule es tã ie' mía ie'pa tã. Ñies s'yamipa serke Jope e'pa wëlepa mía ie' wapieie. ²⁴Bökkí es tã idemirak Cesarea. Eë Cornelio tö iyamipa ena pë' suule iwa buaë e'pa ki' e' dapa'ukka Pedro ttò ttsök. E'pa kôs de ie' panuk. ²⁵Mik ie' de Cornelio u a etã Cornelio dettsa ishke'uk tã ie' e' tkéwa kuchë ki ie' wöshaë idalöioie. ²⁶Erë ie' tö iké e' duökka tã iché ia:

—Be' e' duóka. Ye' dör s'ditsö ñies wes be' es.

²⁷Pedro ttöramiia Cornelio tã etã idewarak weshkë tã ie' isué tö tajë pë' dapanewa. ²⁸Ie' tö iché ie'pa a:

—A' wa ijcher tö sa' judiowak kè a kawö ta' pë' kè dör judiowak esepa pakök ena shkök pë' esepa tã. Erë Skëköl tö ikkaché ye' a tö kè ye' kawö

ta'ia ichök tö yile dör ñá. ²⁹E' kuëkj̄ mik ye' kine, e' bet ta ye' bitea, kè wà ì chakine. Ye' tö a' a ichakè ñíók a' tö ye' kié?

³⁰Cornelio tö iüté:

—Tkali ikëkkè ta ye' tkër ttök Skëköl ta ye' u a wës ye' wöblar ká bit ekkè diwö de mañat eta. E' bet ta wëm eköl de dur ye' wörkj̄, e' datsi' dör dalölöë. ³¹E' tö ye' a iché: 'A Cornelio, be' ttöke Skëköl ta e' ttsé ie' tö. Be' tö s'siarëpa kimeke e' wër buaë ie' wa. ³²Yile patkómi Jope Simón kiè ñies Pedro, e' kiökbitu. Ie' tso' wëm skà kiè Simón dör iyiwak kkuölit kanëukwak e' u a. E' u me'r dayë kkömik.' ³³E' bet ta ye' tö be' tsuk patké ta be' debitu er bua' wa. Es sa' ulitane e' dapa'wé íe Skëköl wöa ì chök ie' tö be' ké sa' a e' ttsök.

Pedro tö Skëköl tté buaë paké Cornelio ska'

³⁴Eta Pedro ttémi ta ichéitö ie'pa a:

—Íñe ta ye' éna iane tö mokj̄ sulitane dör ñies ème Skëköl a. ³⁵E' kuëkj̄ ká wa'ñe wépa tö ie' dalöieke ta iserke yësyësë esepa kiar ie' kj̄. ³⁶Ie' er buarmine se' kj̄ Jesucristo dör sulitane Këköl e' batamik, e' tté buaë pakane sa' dör Israel aleripa e'pa a. E' jcher a' wá. ³⁷Ñies ì bak judiowak ké kos a e' jcher buaë a' wá. Juan tö iyé' tö s'kawöta e' wöskuök. E' ukuökj̄ ta Jesús tö s'pattémi Galilea. ³⁸Ñies a' wá ijcher buaë tö Skëköl tö iWiköl Batse'r patké Jesús Nazaret wak e' kj̄ idiché taië. Ie' shkë kekraë pé' ulitane shua iyi buaë kanëuk. Ñies s'we'ikeke bé tö esepa bua'wéneitö Skëköl tso' ie' ta e' kuëkj̄. ³⁹Í wé ie' tö Jerusalén ena judiowak ká malepa a, e' kos sué sa' tö. E' ukuökj̄ ta ittéwarakitö wötëulewa krus mik. ⁴⁰Erë e' kj̄ ká de mañat ta Skëköl tö ishke'wékane ta ikkachéitö sa' a. ⁴¹Ie' kè e' kkayëne sulitane a. Sa' è a ie' e' kkaché. Skëköl tö sa' shukitbak as sa' tö Jesús saù sa' wák wöbla wa. Ie' shkënekane e' ukuökj̄ ta sa' chké sa' di'yé ie' ta. ⁴²Ie' tö sa' patké ittè buaë pakök sulitane a ñies ichök iarak tö ie' tkéka Skëköl tö s'ttsé'ka ena s'duulewa, e'pa shulökwakie. ⁴³Ká iaiaë Skëköl ttekölpa ulitane tö Jesús paka'atbak ta iyé'atratikö tö yi erblé ie' mik esepa nuì olordaë ie'pa kj̄ ie' batamik.

Pé' kè dör judiowak esepa kj̄ Wiköl Batse'r de

⁴⁴Pedro tso'ia ipakök ie'pa a ta e' shua Wiköl Batse'r debitu ie'pa kos tso' ie' tö kittsök, e'pa kj̄. ⁴⁵⁻⁴⁶Eta Jesús mik erblökwakpa dör judiowak dë'bitu Pedro ta e'pa tö isué tö wës Wiköl Batse'r debitu pé' kè dör judiowak, esepa kj̄ ñies. Ie'pa tö ittsé tö ittökerak ttö kuá'kj̄ kuá'kj̄ wa. Ñies Skëköl kíkökka itso'rak. E' tö ie'pa tkiwéwa. ⁴⁷Eta Pedro tö iché:

—Wiköl Batse'r debitu ie'pa kj̄ wës sa' kj̄ itsá dë'bitu es. E' kuëkj̄ kè yi a iwöklönuk tö kè ie'pa wöskuar di' a.

⁴⁸Ie' tö ikérah e' wöskuök Jesucristo ttö wa. E' ukuökj̄ ta ie'pa tö ie' a ikié taië: "Be' e' tsúat sa' ta ká böt mañat."

Pedro tō Cornelio tté paké Jerusalén

11 ¹Jesús ttekōlpa tsá ena s'yamipa malepa tso' Judea, e'pa tō ittse tō pè' kè dör judiowak, ñies esepa tō Skèköl ttè klö'wë. ²Mik Pedro dene Jerusalén, etā Jesús mik erblökwakpa dör judiowak, esepa welepa tō ie' ché suluë. ³Ie'pa tō ie' a ichaké:

—Ílók be' dare pè' kè dör judiowak esepa pakök ena chkök ie'pa ta?

⁴Ie' tō ì kōs tka e' paké ie'pa a seraa ta iché ia:

⁵—Ye' bak Jope ta ye' ttöke Skèköl ta, e' shua ye' tō ì sué kabsueie. Ì suéyö e' dör datsi' ukuö bérie suë klöulewā ibata tkël a. E' bitewā ká jai a dō wé ye' tso' ee. ⁶Etā ye' tō isué bua'iewā isuoie tō ì tso' ishua. Ye' tō iyiwak klōka, iyiwak kañiru, iyiwak e' sköke ibatsi' kī ena dù, esepa sué. ⁷Etā ye' tō ttō ttsé e' tō iché ye' a: 'A Pedro, be' e' kōka. Iyiwak se ttō ta ikatō.' ⁸Ye' iüté: 'Au. A Skèköl, ye' kè wā iyiwak dör ñá ese kataule yës.' ⁹Tā ttō datse ká jai a, e' tō ichéne ye' a: 'Í batse'wétke Skèköl tō ese kè kiariā ñá.' ¹⁰E' tka mañatökicha ta imíkane sekka ká jai a. ¹¹E' wōshäe ta, wēpa mañal patkēule datse Cesarea ye' yulök, e'pa debitu wé ye' tkēr e' wé a. ¹²Wiköl Batse'r tō ye' a iché: 'Kè ibikeitsar bötböt. Be' yú ie'pa ta.' Ñies s'yamipa teröl i' dare ye' ta. Sa' kōs dewā Cornelio u a. ¹³Ie' tō sa' a ipaké tō wes ie' tō Skèköl biyöchökwak sué dur eköl ie' u a. E' tō iché ia: 'Yile patkómi dō Jope ee wēm tso' kiè Simón, e' kiè ñies Pedro, e' kióbitu. ¹⁴Ie' tō icheraë be' a wes be' ena be' yamipa kōs e'pa tsatkermi.' ¹⁵Mik ye' tō Jesús tté pakémi ie'pa a, etā Wiköl Batse'r debitu ie'pa kī wes idë'bitu sa' kī kuaë es. ¹⁶Etā ì yè' Skèkēpa Jesús tō ye' a, e' ane ye' éna. Ie' tō ye' a iyé: 'Juan tō s'wōskué di' a, eré a' iërdawā Wiköl Batse'r a.' ¹⁷Iwēnewa tō Skèköl tō iWiköl mé ie'pa a wes imenebak se' a kuaë mik se' erblé' Skèkēpa Jesucristo mik etā es. E' kuëkī çye' dör yi Skèköl wöklö'woie?

¹⁸Mik ì ché Pedro tō e' ttsé ie'pa tō, etā isiwa'bléwarak ta Skèköl kīkēkarakitō. Ie'pa tō iché:

—E' wa se' wā ijcher tō pè' kè dör judiowak, esepa a ñies Skèköl tō imé as ie'pa er mane'ù ie' a senoie michoë.

Skèkēpa Jesús icha eruleë tso' Antioquía e' paké

¹⁹Esteban kötwarakitō e' ukuökī ta Jesús mik erblökwakpa we'ikémitke taië pè' tō. E' yökī ie'pa welepa tkayal. Welepa míyal dō Fenicia. Welepa míyal dō Chipre. Iskà mírak dō Antioquía. Ká ekkēpa a ie'pa tō Jesús tté buaë pakeke judiowak è a. ²⁰Eré Jesús mik erblökwakpa datse Chipre ena Cirene, ese welepa míyal Antioquía. Eë Skèkēpa Jesús tté buaë pakéraitō pè' kè dör judiowak esepa a. ²¹Etā Skèkēpa tō ie'pa kímé taië. E' kuëkī taië ká e' wakpa erblé' Skèkēpa Jesús mik ta ier mane'wérak ie' a.

²²Mik Skèkēpa Jesús icha erule tso' Jerusalén, e'pa tō tté e' ttsé, etā Bernabé patkémirakitō tkörö Antioquía. ²³Mik ie' demi, etā ie' tō isué

wes Skëköl er buaë ché ie'pa a. E' tö ie' ttsë'wé buaë. Ie' tö ie'pa kí patté as ie'pa e' tkòwā darërë kekraë ier kos wa ie'pa erblò Skëkëpa mik e' a. ²⁴Ie' dör wëm yësyesë. Ie' a taijè Wiköl Batse'r tso'. Ie' tö Jesús bikeitseke bua'iewā. Es taijè pè' kí de erblök Skëkëpa mik.

²⁵E' ukuöki ta ie' mía Tarso Saulo yulök. ²⁶Mik ikuéitö, etā itsémi Antioquia e' ta. Ee ie' tséarak duas ek. Ie'pa e' dapa'uke Skëkëpa Jesús icha erule e'pa ta. Ká e' wakpa taijè wöbla'wëkerakitö. Ká e' a Jesús ttökatapa tsá kine Cristo wakpa.

²⁷E' kéwö ska' ta Skëköl ttekölpa welepa tso' Jerusalén míyal Antioquia. ²⁸E'pa shūa eköl kiè Agabo, e' e' duéka ta ichéitö Wiköl Batse'r wa tö bli datse ká wa'ñie ki. E' debitu mik Claudio bak Roma wökir kibi e' kéwö ska'. ²⁹Etā Jesús ttökatapa tso' Antioquia e'pa tö iché ñi a: “Mishka inuköl shtök patké se' yamipa serke Judea, e'pa kimoie kos se' a imer ekké.” ³⁰Es ie'pa tö iwé. Etā ipatkémirakitö Bernabé ena Saulo ulā a as ie'pa tö imù Skëkëpa Jesús icha wökir kibipa tso' Judea e'pa ulā a.

Pedro wötéwarakitö s'wöto wé a

12 ¹E' kéwö ska' ta blu' kiè Herodes, e' tö Skëkëpa Jesús icha welepa klò'wéwā we'ikè. ²Ie' tö Santiago dör Juan ël, e' ttökwa patké tabé wa. ³Mik ie' isué tö e' wër buaë judiowak wa, etā ie' tö Pedro klò'ukwā patké. E' wéitö mik judiowak tö Pan Kè Yöule Iwölöwōkā Wa e' kéwö tkò'wëkerakitö etā. ⁴Mik Pedro klönewa, etā Herodes tö iwötéwā s'wöto wé a. Ee ñippökwakpa dōkā dabom eyök ki teröl (16) e'pa tö ikkò'neke tkël tkël. E'pa mane'wëke tkël tkël kukur kukur. Herodes tö ibikeitsé tö kawö tkò'wëkerakitö, e' ukuöki ta iyekettsaneyö shulè sulitane wōa. ⁵E' dalewa Pedro tso' s'wöto wé a. Erë Skëkëpa Jesús icha erule e'pa tso' ikiök Skëköl a darërëe ie' ki kekraë.

Skëköl biyöchökwak tö Pedro yétsa s'wöto wé a

⁶Herodes tö Pedro yeketsa shulè, e' nañewe Pedro kapötër ñippökwakpa böl shushā moulewā tabechka kichaie bötö wa. Ñies ñippökwakpa böl tso' s'wöto wé ukkò kkò'nuk. ⁷E' bet Skëköl biyöchökwak de dur ie' ska' ta bö'wö olo bunekā dalölöë s'wöto wé a. Etā ikéwāitö ichane a as itirka ta iché ia: “Ie' e' kóka bet!” E' bet ta imoulewā tabechka kichaie wa e' wöyërulune. ⁸Etā Skëköl biyöchökwak tö iché ia: “Be' datsi' ióka, be' klökkuó ióka.” Ta ie' tö iwé es. Skëköl biyöchökwak ikí ché ia: “Be' paio kikkuó ióka ta be' shkó ye' itöki.”

⁹Etā Pedro mía itöki, erë ie' kè éna iane tö ì wëke Skëköl biyöchökwak tö e' dör mokí. Ie' tö ibikeitsé tö ie' tso' kabsauk. ¹⁰Etā ie'pa tkami wé ñippökwakpa iëter ukkò kkò'nuk ee. E' ukuöki ta wé ñippökwakpa skā iëter ee itkamirak ñies. Mik ie'pa demi ukkò kibi a yöule tabechka wa ate ñalā kke, etā e' kköbunane er wa. Etā ie'pa deyal urki shkémirak ekuölö ta Skëköl biyöchökwak tö iméat eköl.

¹¹Ekkë tã ie' éna iãne tō ì suéitō e' dör mokì. Ie' ibikeitsè: “I'ñe tã yō isué tō mokì Skëköl tō ibiyöchökwak patké ye' tsatkök Herodes ulà a ena ì qos wamblak judiowak éna ye' kì, e' ulà a ñies.”

¹²Mik ie' éna iãnewã bua'iewã tã imía María u a. María dör Juan mì. Juan kiè ñies Marcos. Eë ie'pa daparke taië ttök Skëköl tã. ¹³Mik Pedro de dur ukkō a ie'pa chakök, etã busi eköl dör kanè méso kiè Rode e' mía iweblök tō yi idir. ¹⁴Mik ie' ttō tséwã Rode tō, etã ittse'nekã buaë kè deia ukkō ppök tã itunemine weshke ichök tō Pedro de dur ukkō a. ¹⁵Ie'pa tō iché ia:

—iBe' alineka!

Erë ie' iuté:

—Mokì ye' ttöke.

Ie'pa ie' a iché:

—Au, e' kè dör ie'. E' dör Skëköl biyöchökwak patkéule ikkō'nuk e'.

¹⁶E' dalewa Pedro tso'ia ichakök ukkō a. Mik ukkō kkoppéerakitō, etã isuérakitō tō ie' e' idir tã itkinewarak taië. ¹⁷Erë ie' tō ikkaché ulà wa tō a' siwa'bló. E' ukuökì tã ie' tō ipaké ie'pa a tō wes Skëköl tō iyéttsã s'wöto wé a tã ichéitō:

—Ttè e' pakó Santiago a ena s'yamipa malepa a.

E' ukuökì tã ie' e' yéttsã mía bánet.

¹⁸Mik kã ñine etã s'wöto wé a ñippökwapka shutineka taië Pedro kè ku' e' kueki. ¹⁹Herodes tō Pedro yulök patké. Erë mik ie'pa kè wã ikune, etã ie' tō inuí tkéwã ñippökwapka mik tã ie' tō ie'pa ttökwa patké.

E' ukuökì tã ie' e' yéttsã Judea mía senuk Cesarea.

Herodes du'wã

²⁰E' kéwö ska' tã blu' Herodes ulurke taië Tiro ena Sidón wakpa kì. E' kueki ie'pa kawö mé ñi a shkowaie ie' ska' ttök ie' tã. Ie'pa tō wëm kiè Blasto e' pablé'bak as ie' mi' ie'pa ttekölie ttök Herodes tã. Ie' kaneblöke Herodes a iu kuebluie. Ie' ttō wa ie'pa tō kawö kié Herodes a tō ie'pa múat bèrè, ie'pa tō chkewö tuëke Herodes kã a e' kueki.

²¹Kã etã Herodes tō ie'pa kiéttsã. Mik e' kéwö de, etã ie' tō blu' datsí iéka tã ie' e' tkéka s'shulo kulé tso' iwé a e' kì tã eë ikapaké ie'pa tã. ²²Ie'pa tō Herodes ché aneule i' es: “I'ttöke i', e' kè dör s'ditsö, e' dör kéköl wele ttöke!” ²³E' ttsër buaë ie' kukua tã ie' e' kíkékã taië, kè wã Skëköl kikanekã. E' kueki e' wöshã tã Skëköl biyöchökwak eköl tō dué méka iki. Ie' katéwa öña tō tã iduowã.

²⁴E' dalewa tã Skëköl ttè pakarke ème kã wa'ñe.

²⁵Mik Bernabé ena Saulo e'pa tō ì uk ie'pa dé' Jerusalén e' wawé one, etã ie'pa míyalne Antioquia. Ie'pa wã Juan kiè ñies Marcos, e' mitserñak.

Wiköl Batse'r tō Bernabé ena Saulo patké Jesús tté buaë pakök

13 ¹Skëképa Jesús icha erule tso' Antioquia, e'pa shuã Skëköl ttekölpa ena s'wöbla'ukwapka tso'rak eë. E'pa dör Bernabé ena

Simón (Simón e' kiè ñies Daló'riwak), ena Lucio dör Cirene wak, ena Menahem (Menahem e' talane Galilea blú kiè Herodes e' tã ñita), ñies Saulo tso'ñak. ²Ká et tã ie'pa tso' Skëköl dalöiök batsè wa tã e' shuã Wiköl Batsè'r tó iché ie'pa a: “Kanè kuã'kí tso' ye' wã Bernabé ena Saulo a. Ie'pa shushtëtkeyö iwakanéwoie e' kuëkí ie'pa böl yóttsa ye' a kanè e' woie.”

³Ie'pa batsé ena tté S'yé tã one, tã iulà mékarak ie'pa böl kí e' dalewa ikié S'yé a iki. E' ukuökí tã ipatkémirakitö iwakanéuk.

Bernabé ena Saulo tö Jesús tté paké Chipre wakpa a

⁴Es Bernabé ena Saulo míyal Seleucia patkéule Wiköl Batsè'r wã. Tã ee ie'pa e' iéka kanò a míyal ká kiè Chipre ee. ⁵Idemirak Chipre wé kanò irirke ee, e' ké kiè Salamina. Mik idemirak ee, etã ie'pa tö Skëköl tté pakémi judiowak a ñi dapa'wo wé kos a. Juan mirwã ie'pa tã ie'pa kímuk. ⁶⁻⁸Chipre kos a itkarak demirak ká kiè Pafos ee. Ee ie'pa tö judiowak kué eköl kiè Barjesús (e' kiè griegoie Elimas). E' dör ie'pa awá eköl. Ie' e' chò tö ie' dör Skëköl tteköl. Ie' yè'arie kekraé ká e' wökir kiè Sergio Paulo, e' ska'. Sergio Paulo kabikeitsò buaé, ie' kí Skëköl tté kiane ttsé. E' kuëkí ie' tö Bernabé ena Saulo tsuk patké. Erè awá ñe' kè kí ikiane tö Sergio Paulo tö tté mik se' erblöke e' klö'wè. E' kuëkí ie' tö Bernabé ena Saulo ma'wé wöklö'wè. ⁹Etã Saulo, e' kiè ñies Pablo, e' kí Wiköl Batsè'r debitu tajë. Etã Elimas suéwaitö krereé ¹⁰tã iché ia:

—Be' kachò. Be' e' wamblò sulué. Be' dör wes bé es. Sene yésyèsé kos, e' bolök be' dör. ¿Kos be' tö Skëköl ñalé yésyèsé e' shkulí'wèmirö? ¹¹I' tã Skëköl tö be' we'ikeraé. Be' wöbla kè wawërpaia. Ká tköraé tajë be' kí tã be' kè tö diwö olo suepaia.

E' bet tã Elimas wöã ká mía ttsettseé, iwöbla kè wawëneia, e' kuëkí yile yulekeitö as tö iulaiö. ¹²Mik ká e' wökir tö e' sué, etã ie' erblé Jesús mik. Ie' wökranewã wes Skëképa tté dör e' kíttsök.

Pablo ena Bernabé tö Jesús tté paké Antioquia atë Pisidia ee

¹³Pablo ena ishköwapa e' iékarak kanò a Pafos tã imíyal Perge atë Panfilia ee. Etã Juan tö ie'pa méat ee, tã imíane Jerusalén. ¹⁴E' ukuökí tã imíyal Antioquia atë Pisidia ee. Etã ee judiowak eno diwö tã ie'pa dewã judiowak ñi dapa'wo wé a e' tulésér. ¹⁵Etã wele tö ì kit Moisés ena Skëköl ttekölpa tö yëkuö kí, e' arítsé dò ekuölö. E' ukuökí tã ñi dapa'wo wé wökirpa tö ichök patké Pablo ena Bernabé a:

—A yamipa, a' wã ilè tso' sa' pattoie, e' tã sa' pattó.

¹⁶Etã Pablo e' kékã tã ikkaché ulà wa tö a' siwã'bló tã ichéitö:

—A Israel aleripa ñies ká kuã'kí wakpa tö Skëköl dalöieta', a' tö ye' ttó ttsó. ¹⁷Skëköl dör Israel aleripa e' Këköl, kuaé e' tö se' bak ká iaiaé, e'pa shukitbak iwák a. Ie'pa sene' Egipto wes ká kuã'kí wakpa es. Ee ie' tö

ie'pa kímé taië alóne taië. E' ukuökí tã ie' tò ie'pa yéttsã kã e' kí idiché wa. ¹⁸ Ie' tò ie'pa dalé'ttsé kã sir poë wé kè yi serkũ' e' a dökã duas dabom tkëyök (40). ¹⁹ Pè' ditséwöpa dökã kul bak senuk Canaán e'pa eo'waitö kã mè se' yépa bak kã iaiãë, e'pa a. ²⁰ E' kos kí duas bak cien tkëyök kí dabom skeyök (450) ekkë.

'E' ukuökí tã Skëköl tò ie'pa shũ kékã eköl eköl imalepa wëttsöie dò itteköl Samuel e' k'éwö ska'. ²¹ E' ukuökí tã ie'pa tò Samuel a blu' kié eköl. Es Skëköl tò Saúl mékã ie'pa blúie, e' dör Quis aladulaköl. Ie' dör Benjamín ditséwö. Saúl sené ie'pa blúie dökã duas dabom tkëyök (40). ²² E' ukuökí tã Skëköl tò Saúl uyéttsã tã David mékãitö blu'ie iskéie. David ché Skëköl tò i' es: 'Ye' tò David dör Jesé alà, e' sué. Ie' wër buaë ye' wa, ie' erbikò wës ye' erbikò es. Ì kiane ye' kí wè, e' wakaneweraëitö.' ²³ David aleri eköl dör Jesús, e' patké Skëköl tò se' dör Israel aleripa e'pa tsãtkök wës ie' kablè' es. ²⁴ Erë kam Jesús döbitũ' e' yökí Juan S'wöskuökwak tò se' Israel aleripa ulitane patté tò se' kawõtã er mane'uk Skëköl a. Nies se' kawõtã e' wöskuöklor di' a. ²⁵ Mik Juan kanè erkewatke tã ie' tò iché: 'Wëm datse eköl e' kınuk a' tso', e' kè dör ye'. Ie' datsejã ye' itökí. Ie' dör ye' tsatã, e' kuëkí ie' klökkuö kicha è kè wötsënanuk ye' siãrla e' a.'

²⁶ "A s'yamipa, Abraham aleripa, ñies a' wépa kè dör ie' aleripa erë Skëköl dalöietã' esepa, se' ulitane a s'tsãtkè tté e' patkënetke. ²⁷ Jerusalén wakpa ena iwökirpa e'pa kè wã ijcher tò Jesús dör S'tsãtkök'wak. Nies eno diwö bit tã ie'pa tò ie' tté kitule yëkkuö kí Skëköl ttekölpa wã, e' aritseke, erë e' kè wã ane ie'pa éna. Mik ie'pa tò Jesús wöméttsã ttëwã etã e' wa ie'pa tò ie' tté tso' kitule Skëköl yëkkuö kí e' wã tkö'wé. ²⁸ Ie'pa kè wã ì sulu kune ikí ittowã erë ikkatérakitö Pilato a as ittök'wã patkòitö krus mik. ²⁹ Es Jesús ttéwarakitö. Mik ie'pa tò ì kos kitule Skëköl yëkkuö kí, e' wawé one, etã inú éwarakitö krus mik tã iwötéwarakitö pö a. ³⁰ Erë Skëköl tò ie' shké'wékane. ³¹ E' ukuökí tã ie' e' kkachéne kã taië wépa manetwã ie' wapie Galilea dò Jerusalén, e'pa a. Ì'ñe tã e'pa kos dör ie' ttekölpa judiowak ulitane wörkí.

³² "Es sa' tso' tté buaë i' pakök a' a. E' dör ì uk Skëköl kablè' sa' yépa bak kã iaiãë e'pa a ³³ e' wã tka sa' dör ie'pa aleripa e' wörkí. Itka mik Skëköl tò Jesús shké'wékane etã. Itka wës itso' kitule Salmo böt kí es wé ichéitö: 'Be' dör ye' alà. Ì'ñe yö ikkachétke tò ye' dör be' yé.'^s ³⁴ Nies Jesús yé'at Skëköl tò iyëkkuö kí: 'Wës ye' tò ye' tté yësyësë batse'r taië e' me' David a tò ye' er buaë chöraë ie' a, es ye' er buaë chöraë be' a.'^t E' wã dör tò Skëköl tò ie' shké'wërane as kè ichkã nurwã. ³⁵ E' kuëkí ñies itso' kitule: 'Be' kanè méso batse'r, e' kè mepaatbö as ichkã nurwã.'^u ³⁶ Es David, se' blú bak iaiãë, e' tò imalepa bak e' k'éwö ska', e'pa wëttsé

^s 13.33 Salmo 2.7 ^t 13.34 Isaías 55.3 ^u 13.35 Salmo 16.10

wes Skëköl tō iyë'ia es. E' ukuöki tã idu'wã tã itöbinewã iyëpa pö a tã inunewã. ³⁷Erë wë shkeo'kãne Skëköl tō e' chkà kè nune'wã. ³⁸A yamipa, a' wã ijchenü tō se' nuü olo'yarmi se' kï Jesús batamik, e' ttë pakeke sa' tō a' a. ³⁹Ttë méat Moisés tō dalöiëno, e' kè a se' nuü olonuk. Erë wëpa erblé Jesús mik esepa nuü olordaë ie'pa kï. ⁴⁰A' tso' erki as a' kè tã itkò wes Skëköl ttekölpa tō ikit es wë Skëköl tō ichè:

⁴¹ 'A ye' wayuökwakpa, ye' ttò tso'.

Ì weraëyö a' këwö ska' tã, e' dör taië kè klöonuk a' a ekkë.

Eré a' a ipakarmi erë kè a' tō iklö'wëpa.

E' kueki a' tkinú. A' enúwa.' ”v

⁴² Etã Pablo ena Bernabé e' yélur ñi dapa'wö wé a. Etã pë' tō iché ie'pa a a' kiéne ttë ekkëpa skà pakökne sa' a eno diwö ëtö wa. ⁴³ Mik ie' dapa'wérak e' one, etã judiowak, ñies pë' e' yué judiowakie esepa taië míyal Pablo ena Bernabé tã. Pablo ena Bernabé tō ie'pa patté tō a' e' tköwã darërëë Skëköl er buaë chöke se' a e' a.

⁴⁴ Eno diwö ëtö wa etã ká e' wakpa iekkë tã idettsarak seraã Skëköl ttë kïttsök. ⁴⁵ Erë mik judiowak tō isuë tō pë' dapane taië Pablo ttò kïttsök, etã ie'pa yöki isulune tã ie' kékarak ichök tō ì cheke ie' tō e' dör kache. Ie'pa tō ie' ché suluë. ⁴⁶ Erë ie' ena Bernabé kè suane tã iché iarak:

—Sa' kawötã a' dör judiowak e'pa pattoie kewe Skëköl ttë wa, erë a' kè wã iklöne. Wësua a' ibikeitseke tō sene michoë kè mène a' kï. E' kueki sa' míyal ipakök pë' kè dör judiowak esepa a. ⁴⁷ Es Skëköl tō sa' patké. Ie' yëkkuö tō ichè:

'Be' tkékayö wes bö'wö wöñar stui a es.

Es ye' tō be' patkeraë ká ulitane wakpa pattök,

Ie'pa tsatké e' ttë pakeraëbö ká wa'ñie dö wë ká i' erkerö ee.'w

⁴⁸ Mik pë' kè dör judiowak e'pa tō ttë e' ttsé etã ie'pa ttsënekarak buaë. Ie'pa e' kékarak Skëképa Jesús tté kïkökka. Wëpa kos suletëneat senuk michoë, esepa erblé Jesús mik. ⁴⁹ Es Skëképa Jesús tté pakane ká e' wa'ñie a. ⁵⁰ Erë alakölpa dalöiërta' taië ká e' kï esepa tō judiowak ttë dalöieke buaë, ñies wëpa dalöiërta' taië ká e' kï, esepa shutiwéka judiowak tō as Pablo ena Bernabé we'ikörakitö as ie' yötttsarak ká e' kï. ⁵¹ Etã Pablo ena Bernabé tō iklö po ppée ikkachoie ie'pa a tō ie'pa kï inuí ane tã imíyal Iconio. ⁵² Erë Jesús ttökatapa atë e'pa ttsë'ne buaë ñies ie'pa a Wiköl Batse'r tso' taië.

Pablo ena Bernabé tō Jesús tté paké Iconio wakpa a

14 ¹ Mik Pablo ena Bernabé demi Iconio, etã ie'pa dewã judiowak ñi dapa'wö wé a wes ie'pa wöblar es. Ie'pa tō Jesús tté paké buaë. Es judiowak ñies pë' kè dör judiowak, esepa taië erblé Jesús mik. ² Erë

v 13.41 Habacuc 1.5 w 13.47 Isaías 49.6

judiowak kè erblène imik, e'pa tò pè' kè dör judiowak, esepa shutiwéka ena iluwéka tajè s'yamipa kî as iwe'ikörakitö. ³Erè Pablo ena Bernabé e' tséat ká tajè ee. Ie'pa tò Skèkèpa ttè pakeke kè suane. Skèköl tò diché mé ie'pa a ì kè or yi a ese woie iwà kkachöie tò ie' er buaè chöke siä e' ttè dör mokî. ⁴Erè ká e' wakpa ñi blabatsélor, shäbötspa wa judiowak ttè wër buaè, shäbötspa wa Jesús ttekölpa tsá e'pa ttè wër buaè. ⁵Judiowak ena pè' kè dör judiowak, e'pa tò kawö mé ñi a iwökirpa tã Pablo ena Bernabé we'ikoie, tè ák wa ittowaie. ^{6,7}Erè mik Pablo ena Bernabé, e'pa wa ijchenewa, etã ie'pa tkayalmi dòmi ká kiè Licaonia ee. Ká kiè Listra ena ká kiè Derbe atè ee. Ká e' wa'ñe ie'pa tò Jesús ttè buaè paké.

Pablo tëne ák wa ittowaie ká kiè Listra ee

^{8,9}Etã wëm tso' eköl Listra, e' kune' klò bachiulewã. Ie' kè shko. Ie' tkër Pablo ttöke e' ttsök. Pablo tò isuéwã krereë. Ie' wa ijcher tò wè' ierblé Jesús mik as ibuarne. ¹⁰Etã ie' tò iché iã aneule:

—iBe' e' kóka, be' e' duóka!

Etã wëm e' kéka tunekã tsut tã ishkémi. ¹¹Mik pè' tò, ì wé Pablo tò e' sué, etã ie'pa tò ichémi aneule ie'pa Licaonia ttò wa:

—iWépa dalöiekeso skèkölíe e'pa dettsã se' shüã s'ditsöie!

¹²Pablo kapaké kibiie, e' kuëkî ie'pa tò ie' klò'wé ie'pa kèköl kiè Hermes e' skéie. Bernabé klò'wérakitö ie'pa kèköl kiè Zeus e' skéie.*

¹³Zeus wé merkä ká e' ñalé ukuó o'mik tsinet. Zeus sacerdote wã baka wè'ñe ena ma'ma wörkua debitu tajè. Ie' ena pè' ulitane éna baka wè'ñe jchak mè Pablo ena Bernabé a idalöioie ikèkölpaie. ¹⁴Erè mik Bernabé ena Pablo wã ijchenewa, etã ie'pa e' datsi' jchéé ikkachöie tò e' dör sulué ie'pa a. Tã ie'pa mía pè' shüã tã ichéraitö aneule:

¹⁵—A kèkèpa, ì uk a' tso'? Sa' dör s'ditsö wës a' es. Sa' debitu ttè buaè pakök a' a as a' tò íyi ikkè kè wà tã' ese kos watöttsã tã a' er mane'ü Skèköl chók e' a. Ie' tò ká jai ena ká i' ena dayë ena ì kos tso' ikî e' yö'at. ¹⁶Ká iaiäè dò ikkè tã sulitane serke wës iwák kî ikiane es, e' dalé'ttsé'bitu Skèköl tò. ¹⁷Eré e' dör es, eré ie' dör buaè se' tã kekraë, e' wa ie' tò iwà kkaché siä tò ie' dör Skèköl chók. Ie' tò kalî patkeke a' a. Ie' tò iyiwö wëke a' a. Ie' tò chkè meke a' a ñanoie a' ttsé'woie buaè.

¹⁸Eré ie'pa tò ì kos ché iarak, eré iekkè tã baka wè'ñe jchéraitö Pablo ena Bernabé dalöioie wës Zeus ena Hermes es.

¹⁹E' shã tã judiowak wëlepa datse Antioquia ena Iconio, e'pa debitu tã Listra wakpa dakiñéraitö Pablo ttökwa. Iklò'wéwarakitö tã itéraitö tajè ák wa. Ibikeitséraitö tò iduowa, e' kuëkî ie'pa tò ikuémi méat tär Listra

* **14.12** Zeus ena Hermes: E'pa dalöiök griegowak bak skèkölíe ká iaiäè. Ie'pa a Zeus dör skèköl bua'ie imalepa tsatã. Ie'pa tò iklò'wé tò Hermes dör Zeus tteköl. Romawak tò Zeus kiè méka Júpiter ena Hermes kiè mékarakitö Mercurio.

ké kkò a wi'kie. ²⁰Erè mik Jesús ttòkatapa malepa e' dapa'wéka ipamik, età ie' e' kéka míane Lистра. E' bule es ta ie' mía Bernabé ta dò ká kiè Derbe ee.

²¹Ie'pa demi Derbe ta Jesús tté buaé pakéraitò ká e' wakpa a. Taiè ie'pa e' yué Jesús ttòkataie. E' ukuòki ta ie'pa debitune Lистра ena Iconio ena Antioquia. ²²Ká ekké kos a ie'pa tò Jesús ttòkatapa er diché ié ena ipablérakitò as ie' tkòwarak darèrèè ttè mik se' erblòke e' a. Ie'pa tò iché iarak: “Se' wake' weirdaè ká i' ki dowaiè aishkuò ta ì blúie Skèkòl tso' e' a.” ²³Nies ká kos e' ki ie'pa tò wèpa shushtë kaneblòk Skèkèpa Jesús icha erule erule e'pa wòkirpaie. E'pa ki ie'pa ikié S'yé a ena batsé, e' ukuòki ta iméarakitò Skèkèpa mik ie'pa erblòke e' ulà a.

Pablo ena Bernabé dene Antioquia atè Siria ee

²⁴E' ukuòki ta Pablo ena Bernabé tkami ká kiè Pisidia demirak Panfilia. ²⁵Ie'pa tò Jesús tté buaé paké ká kiè Perge e' wakpa a. E' ukuòki ta ie'pa mía ká kiè Atalía ee. ²⁶Ee ta ie'pa e' iéka kand a míane Antioquia iyamipa tò ie'pa patké'mi Jesús tté pakòk e'pa ska'. Ee iyamipa tò ie'pa me' Skèkòl er buaé chòke se' a e' ulà a ì kanèuk ie'pa dare e' wòie. ²⁷Mik ie'pa demine Antioquia, età Skèkèpa Jesús icha erule e' dapa'wékarakitò. Ta ì kos wé Skèkòl tò ie'pa ta, ñies wes ie' tò ikkayè' pè' kè dör judiowak, esepa a tò ie'pa erblòmi ie' mik wes judiowak es, e' kos pakéraitò iyamipa a. ²⁸Età ie'pa e' tséat ká taiè Jesús ttòkatapa tso' Antioquia, e'pa ta.

Skèkèpa Jesús icha e'pa wòkir kibipa ñi dapa'wé Jerusalén

15 ¹E' kéwö ta, wèpa wèlepa e' yéttsa Judea demi Antioquia. Ie'pa tò s'yamipa wòbla'wémi ttè i' wa: “A' wèpa kos kawòta tottola kkuòlit tè tsir wes Moisés ikitat es. E' kè kaneone a' wa, e' ta kè a' tsatkèrpa.” ²E' kuèki Pablo ena Bernabé ñi iutékà darèrèè ie'pa ta. E' kuèki iyamipa tò Pablo ena Bernabé ena wèlepa skà, e'pa shushtë as imi'yal Jerusalén ttè ñe' shulòk Skèkèpa Jesús icha wòkir kibipa ena Jesús ttekòlpa tsá, e'pa ta.

³Es Skèkèpa Jesús icha erule tso' Antioquia, e'pa tò Pablo ena imalepa patkémi Jerusalén. Ie'pa tkami Fenicia ena Samaria. Età ipakeramirakitò iyamipa a tò wes pè' kè dör judiowak, esepa er mane'wé Skèkòl a. Ttè e' tò ie'pa ttsè'wé buaè.

⁴Mik Pablo ena Bernabé demirak Jerusalén, età ee Skèkèpa Jesús icha eruleè e'pa kos ena iwòkirpa ena Jesús ttekòlpa tsá, e'pa tò ie'pa kiéwa buaè. Età ì kos o' Skèkòl tò ie'pa wa e' pakéraitò imalepa a. ⁵Erè Jesús mik erblòkwakpa dör fariseowakpa, esepa wèlepa e' kéka ta ichéitòrak: —S'yamipa kè dör judiowak esepa wèpa kawòta itóttola kkuòlit tè tsir. Nies ie'pa a ikawòta chè tò Moisés ttè kitulebak e' dalöiök ie'pa kawòta.

⁶Etā Skëkëpa Jesús icha wökir kibipa ena Jesús ttekölpa tsá, e'pa ñi dapa'wëkä ttè e' bikeitsök bua'iewa. ⁷Ie'pa tö ipaké taië, e' ukuökí ta Pedro e' kéka ta ichéitö:

—A yamipa, a' wā ijcher tö ká iaiaë Skëköl tö ye' shukitbak a' shua Jesús ttè buaë pakök, pë' kè dör judiowak, esepa a as ie'pa erblò imik. ⁸Ie' wā se' er suule buaë, ie' tö Wiköl Batse'r mé ie'pa a wes se' a ime'itö es. Es ie' tö se' a ikkaché tö ñies ie' tö ie'pa klö'wé ie' ichaie. ⁹Ie' tö ie'pa er paiklé ie'pa erblé Jesús mik e' wa. Es se' wā ijcher tö ie'pa ena se' dör ñies ème ie' wōa. ¹⁰A' tö ie'pa ké Moisés ttè darërëë e' dalöiök, erë e' kè dalöiëne' se' a, ñies se' bak ká iaiaë e'pa kè a idalöiëne'. I'ñe ta ñiök a' tso' Skëköl wōñatkök es? ¹¹E' kè dör es. Se' tö iklö'wé tö se' tsatkëne Skëkëpa Jesús er buaë chöke sia e' è wa. E' suë ie'pa tsatkëne ñies.

¹²E' ukuökí ta ie'pa ulitane siwa' blélur tso' Bernabé ena Pablo e'pa kapaköke e' ttsök. Ie'pa tso' ipakök tö wes ì kè or yi a ese wérakitö Skëköl batamik pë' kè dör judiowak, esepa shua Skëköl diché kkachöie. ¹³Ie'pa kapaké one etā Santiago tö iché:

—A yamipa, ye' ttò ttsó. ¹⁴Simón tö se' a ipaké wes Skëköl tö, pë' kè dör judiowak, esepa tsá kimé er bua' wa as ie'pa welepa dò ie' wák ichaie. ¹⁵Ñies e' sini'kué Skëköl ttekölpa bak ká iaiaë e'pa tö. Ie'pa tö iyë':

¹⁶Skëköl tö ichè: 'Aishkuö ta ye' datsene.

Etā David jchúlipa kerakayö iwák suë.

Ie'pa dörane diché ta' taië wes iaiaë es

¹⁷as pë' malepa kè dör judiowak dör ye' icha esepa tö ye' yulö.

¹⁸Es ye' tö ttè i' chétke.

Ká iaiaë ttè i' me'atbakyo a' a.'y

¹⁹“Ttè i' kueki ye' ibikeitsè tö, pë' kè dör judiowak er mane'wé Skëköl a, esepa kè tsiriuk s'kàne judiowak ser ese wa. ^{20,21}E' kueki yëkkuö patkómisö ie'pa a e' kì ichösö tö íyi meule íyi diököl tso' dalöie skëkölíe ese a, ese kè kar, ese kè katar. Ñies ie'pa kè kàne trënu. Iyiwak ttéwa kuli' siuleka ese chkà kè katar ñies ipé kè katar. Ká iaiaë ttè i' pakanemi ká wa'ñe se' ñi dapa'wo wé a eno diwö bit ekké. E' kueki íyi ekké è shtómisö ie'pa a.”

Yëkkuö patkëne s'yamipa kè dör judiowak, esepa a

²²Skëkëpa Jesús icha eruleë e'pa qos ena iwökir kibipa ena Jesús ttekölpa tsá, e'pa wa iwër buaë tö wëpa welepa shushtë ie'pa shua as imi'rak Pablo ena Bernabé ta dòmi Antioquía. Es ie'pa tö Judas kiè ñies Barsabás ena Silas, e'pa shushtë. Wëpa e'pa dalöieke taië s'yamipa ulitane tö. ²³Etā yëkkuö shtë iwökirpa tö e' mé ie'pa a as iwa imi'rak. Yëkkuö e' tö iché i' es:

✓ 15.16-18 Amós 9.11-12

“Sa' dör Skëképa Jesús icha eruleë e'pa wökir kibipa ena Jesús ttekölpa tsá, sa' dör a' yamipa. Sa' tso' yëkkuö i' shtök a' dör sa' yamipa erë kè dör judiowak serke Antioquía ena Siria ena Cilicia e'pa a. A' shkë'wémi sa' tö. ²⁴Sa' wá ijchënewá tö sa' yamipa welepa e' yë'ttsá sa' shúa, e'pa dë'mi a' ska'. Ie'pa tö a' tsiriö' iwákpa ttë wa. E' tö taijë a' wökir tsiriwéka. Kè sa' wá kawö mène ie'pa a a' wöbla'woie ì wa. ²⁵E' kuekì sa' ulitane wa iwër buaë wëpa welepa shushtök sa' shúa as imi' a' sauk Bernabé ena Pablo ta. Sa' yami e'pa dalër taijë sa' éna. ²⁶Ie'pa e' me'ttsá weinuk taijë. Ie'pa kè suane ttëwá Skëképa Jesucristo tté kuekì. ²⁷Sa' tö Judas ena Silas patkëmi ttök a' ta. Ie'pa tö ipakeraë a' wöshaë yësyësë wes yëkkuö i' kì ikitule es. ²⁸⁻²⁹Buaë idir Wiköl Batse'r a, ñies sa' a, tö a' kè kawötá judiowak ser e' blök seraa. I' è blök a' ké: Chkè meule íyi diököl tso' dalöie ese a, e' kè katar. Ñies ipé kè katar ena iyiwak ttëwá kuli' siuleká ese chkà kè katar. Kè a' kàne trënuK. Íyi ekkè è kawötá blè a' tö. A' tö iwé es, e' ta e' dör buaë. Skëköl tö a' kímè.”

³⁰Etá ie'pa e' chéat ta imíyal Antioquía. Mik ie'pa demi eë ta ie'pa iyamipa dapa'wéka, e'pa a yëkkuö mirdak iwá e' méitö. ³¹Mik iyamipa tö yëkkuö aritsé, etá e' tö ie'pa er pablé taijë, e' kuekì ittsë'nerak buaë. ³²Judas ena Silas, e'pa dör Skëköl ttekölpa ñies, e' kuekì ie'pa tö iyamipa patté taijë. E' tö iyamipa er pablé taijë, ikímé taijë. ³³⁻³⁴Ie'pa sené eë kukuie. Mik ie'pa mitkene itö wane etá iyamipa tö iché iarak a' shkó wöbla wa. ³⁵Erë Pablo ena Bernabé e' tséat Antioquía. Ie'pa ena imalepa taijë e'pa tso'rak Skëképa Jesús tté buaë pakök. Ñies tté e' wa s'wöbla'uk ie'pa tso'.

Pablo ena Bernabé kè kanëblöku'ia nita

³⁶Kawö tka taijë, e' ukuökì ta Pablo tö iché Bernabé a:
—Mishkane etökichane ká qos kì se' bak Skëképa Jesús tté pakök e' ane s'yamipa sauk tö is ie'pa tso'.

³⁷Bernabé kì Juan kiane tsëmi ie'pa ta. Juan e' kiè ñies Marcos. ³⁸Erë Marcos tö ie'pa me'at ká kiè Panfilia eë. Ie' kè kanëblëniá ie'pa ta. E' kuekì Pablo kè éna ie' tsakmi ie'pa ta. ³⁹Ini iutérak darërëë erë kè ishulíne. E' kuekì ie'pa ñi blabatsélor. Bernabé wá Marcos mítser e' ta ta ie'pa míyal kanò kì dò Chipre. ⁴⁰Pablo tö wëm kiè Silas e' kiémi e' wapie. Iyamipa tö ie'pa méat Skëköl er buaë chò siá e' ulá a. Etá ie'pa e' yétsá eë ⁴¹tkamirak Siria ena Cilicia. Ie'pa tso' Skëképa Jesús icha erule erule tso' ká e' kì e'pa diché kì iök Jesús tté wa.

Timoteo míá Pablo ena Silas wapie

16 ¹E' ukuökì ta Pablo ena Silas demi Derbe ta imíyal Listra. Eë wëm kiè Timoteo e' serke, ie' dör Jesús ttökata. Ie' mì dör

judiowak e' dör Jesús ttökata ñies. Erë iyé dör griegowak. ²S'yamipa serke Lистра ena Iconio, e'pa tö icheke tö Timoteo dör pè' buaë. ³Pablo kî ie' kiane tsëmi e' wapie. Erë judiowak serke ká e' kî e'pa ulitane wá ijcher tö Timoteo yé e' dör griegowak. E' kuekî Pablo tö ie' ké itóttola kkuölit tök tsir as judiowak kè ulurkâ iki. ⁴Kâ kos wé ie'pa dami ee ì uk patkè' Skëképa icha erule tso' Jerusalén e'pa wökirpa ena Jesús ttekölpa tsá e'pa tö, e' wà paké ie'pa tö s'yamipa ulitane a. ⁵Es Skëképa Jesús icha erule erule e'pa kos diché kî iène Jesús tté a. Nies pè' kî iërke taië kekraë.

Pablo tö wëm dör Macedonia wak e' sué kabsueje

⁶Etâ Wiköl Batse'r kè wá kawö mène ie'pa a Jesús tté buaë pakök ká kiè Asia ee. E' kuekî ie'pa tkami ká kiè Frigia ena Galacia ⁷demi ká kiè Misia e' kköröwâ ee. Etâ ie'pa tö ima'wé shkökwa ká kiè Bitinia e' a, erë Jesús Wiköl kè wá kawö mène ie'pa a. ⁸E' kuekî ie'pa tkami yësyësë Misia kker demi ká kiè Tróade dayë kkö a wé kanò irirke ee. ⁹Etâ nañewe Pablo tö ì sué kabsueje. Ie' tö wëm sué eköl, e' dör ká kiè Macedonia e' wak. E' dur shkè'ka tã ikköché ia: “Be' shkótkö Macedonia sa' kîmuk.” ¹⁰Pablo tö e' sué one tã bet sa' dalì iémi mitke Macedonia. Sa' wá ijcher buaë tö Skëköl kî ikiane tö sa' tö Jesús tté buaë paké ká e' kî.

Alaköl kiè Lidia e' erblé Jesús mik

¹¹Etâ sa' e' iéka kanò a Tróade, míyal yësyësë ká kiè Samotracia ee. Bule es tã sa' demi ká kiè Neápolis ee. ¹²Ee tã sa' míyal klò kî dò ká kiè Filipos ee. Ká e' a romawak tso' taië. E' dör ká bua'buwa atë Macedonia. Ee sa' sené ká tkël ká skel ulatök. ¹³Judiowak eno diwò tã sa' e' yélur míyal di' kkömik wé sa' tö ibikeitsè isalema judiowak wá ká tso' ttoie Skëköl tã ee. Mik sa' tö ikué, etâ ee sa' e' tuléser Jesús tté buaë pakök alakölpa ñi dapa'wéka e'pa a. ¹⁴Ie'pa eköl kiè Lidia, e' dör ká kiè Tiatira e' wak. Ie' dör datsi' bua'buwa daloshdalosh ese wataukwak. Ie' tö Skëköl dalöieke taië. Skëképa tö ie' er ñi'wé as Pablo ttöke kos e' klö'ütö mokijë. ¹⁵Etâ ie' e' wöskué iyamipa tso' ie' u a e'pa tã. E' ukuökî tã ie' tö sa' a iché kröröe:
—A' ibikeitsè tö mokijë ye' dör Jesús mik erblökwak, e' tã a' klönüia ye' ska'.

Es ie' tö sa' ké klönukia ie' ska'.

Pablo ena Silas wötënewâ s'wöto wé a Filipos

¹⁶Ká et tã sa' mirwane wé s'ttöke S'yé tã ee. Sa' mirwaia tã pè' busi kuéwa sa' tö eköl, e' a wimblu sulusi tso' eköl, e' wa íyi tötkkeitö. Wëpa wëlepa tö ie' tö'ttsa' ie'pa a kanëblök íyi tötkök, e' ské klö'wëke ie'pa tö taië e' a. ¹⁷Busi e' shkëmi Pablo ena sa' itökî. Ie' ardatse:

—Wëpa ikképa dör Skëköl íyi ulitane tsatã e' kanè mësopa. Ie'pa tö s'tsatkè ñalé e' tté pakeke a' a.

18 E' wambléitō ká taië, bata ekkē tā Pablo uluneka taië. Ie' e' wotréene tā ichéitō wimblu sulusi tso' busi a e' a:

—Jesucristo tō wa ye' tō be' a ichè be' e' yóttsa ie' a.

E' wōshāë tā wimblu sulusi e' yéttsa ia.

19 Mik busi wōkirpa tō isué tō inukōl kè dē'ia ie'pa ulā a busi batamik, etā ie'pa tō Pablo ena Silas klō'wéwā tsémirak wé ttè shulōkwakpa tso' ee. 20 Ie'pa tō ikkatérak ttè shulōkwakpa a tā ichérakitō:

—Wēpa ikképa dōr judiowak. Taië ie'pa tso' sa' shutiuk. 21 Sa' dōr romawak, e' kuëkī kè sa' a kawō mène ie'pa tō s'wōbla'weke sene wa e' klō'uk ena e' wā uk.

22 Etā ká e' wakpa bitëshka Pablo ena Silas kī. Etā ishulōkwakpa tō idatsi' yóttsa ké ikī tā ippök ké darërëë kal wa. 23 Ibunerak siarë wötewarakitō s'wōto wé a. Tā ichérakitō s'wōto wé wōkir a tō ikkō'nú bua'iewā as kè itkōyal. 24 Mik ie' a kawō e' mène, etā ie' tō Pablo ena Silas wōtewā iwé wötëulewā bua'iewā, ese a. Ie' tō ie'pa klō' tiéwā kaltak wōbiule s'klō' wōtowā ese a. Es iméarakitō.

25 Ká de ká shabōts etā Pablo ena Silas tso' ttök Skékōl tā ena ittseittsök. Imalepa tso' ittök. 26 E' wōshā tā í tka darërëë. S'wōto wé wōppéitō darërëë. E' wōshāë tā ukkō ulitane kkōburoalone. Í kos wa ie'pa tso' moulewā, e' wōtsérolone. 27 S'wōto wé wōkir ti'nekā. Mik ie' isué tō ukkō kos tso' áie tā ibikeitséitō s'tso' wötëule e' kos tkayal. E' kuëkī itabè kuéttisaitō e' ttowāie. 28 Erë Pablo anekā:

—iKè be' e' ttökwa! Sa' tso'ia ulitane.

29 Etā s'wōto wé wōkir tō bō'wō kié tā itunewā Pablo ena Silas ska'. Eë ie' e' tkéwā kuchē kī ie'pa wōā painéka suane taië. 30 Etā ie' tō ie'pa yéttsa u'rkī tā ie'pa a ichaké:

—A kéképa, ù uk ye' kawōtā e' tsatkoie?

31 Ie'pa ie' iüté:

—Skéképa Jesús mik be' erbló etā be' tsatkërdaë ñies be' yamipa tsatkërmi es.

32 Etā ie'pa tō Skéképa tté paké ie' a ena iyamipa kos tso' iu a, e'pa a. 33 Etā e' nañewe ulatök s'wōto wé wōkir tō ie'pa tsémi e' tā. Ie'pa shkā'ule taië e' kapeyéitō. Etā ie' ena iyamipa kos e' wōskuélor. 34 E' ukuökī tā ie' tō itsémirak iu a tā itíarakitō. Ie' ena iyamipa e'pa erblé Skékōl mik, e' kuëkī ie'pa kos ttsé'ne buaë.

35 Ká ñine tā ishulōkwakpa tō ishkékīpa patkémī ichök s'wōto wé wōkir a tō Pablo ena Silas ómine. 36 S'wōto wé wōkir tō iché Pablo a:

—Sa' shulōkwakpa tō ye' a kawō mé a' ökmīne. E' kuëkī a' yúne bèrè.

37 Erë Pablo tō iché ia:

—Sa' dōr romawak^z Ie'pa tō sa' buk sulitane wōshāë kam sa' shulir e' yökī. Sa' wötë'waitō s'wōto wé a. I'ñe tā ie'pa kī sa' kiane èmine akir. Ie'pa kè a kawō tā' iwoie es. As ie'pa wákpa bitu sa' ökmīne.

^z 16.37 Romawak: Pablo ditséwō dōr judiowak erë ie' yami bak e' wele e' yó' romawakie, e' kuëkī ñies ie' dōr romawak.

³⁸Etā shkēkīpa tō ttè e' chéne ishulōkwakpa a. Mik ie'pa ittsé tō Pablo ena Silas dōr romawak, etā taië ie'pa suane. ³⁹Etā ie'pa míyal Pablo ena Silas ska' t̄a ichérakitō:

—Ī sulu wamblé sa' tō a' kī e' olo'yó sa' kī.

Etā iémine t̄a ikkōchéra*k* iā: “A' e' yólur sa' ká kī.” ⁴⁰Etā Pablo ena Silas yēnettsa s'wōto wé a míyal Lidia u a iyamīpa weblōk. Ie'pa pablérakitō etā imíyal.

Tesalónica wakpa tsirine*k*a Jesús tté kuē*k*i

17 ¹Pablo ena Silas tkami ká kiè Anfípolis ena ká kiè Apolonia demirak ká kiè Tesalónica wé judiowak wā ñi dapa'wō wé tso' ee. ²Etā Pablo dewā e' wé a eno diwō wa wēs ie' wōblar es. Eē ie' kapaké ie'pa t̄a Skēkōl yēkkuō wa eno diwō mañat. ³Ie' tō ikkaché ie'pa a tō itso' kitule Skēkōl yēkkuō kī tō wé pairine'bitū idi' wa s'blúie e' tterawā t̄a ishkerdakane. Ie' tō iché ie'pa a:

—Jesús pakōk ye' tso' a' a, e' wák dōr wé pairine'bitū idi' wa s'blúie e'.

⁴Judiowak welepa erblé Jesús mik, t̄a ie'pa de Pablo ena Silas kīie. Ñies griegowak tō Skēkōl dalōieke wēs judiowak es, esepa taië erblé Jesús mik ena alakōlpa dalōiērtā' esepa taië erblé imik ñies. ⁵Erè e' tō judiowak malepa uluwēkā taië. Etā wēpa sulusīpa tso' éme ñala kī, esepa kíerakitō pē' dapa'uk taië, e'pa kī uluwérakitō t̄a imíyal kēsik wa pē' malepa uluukā. Etā itkawarak kēsik wa Jasón u a Pablo ena Silas yulōk yēttsa mè imalepa ulurke taië e'pa ulā a. ⁶Erè kè iwā ikunerak ee. E' kuē*k*i Jasón ena iyamīpa welepa e'pa kuémirakitō ká e' wōkirpa wōa t̄a ichéitōrak a*n*eule:

—Wēpa ikképa tō ká ulitane wakpa tsiriō', e'pa de íe ñies. ⁷Jasón tō ie'pa kiéwā iu a. Ie'pa ulitane tso' ichök tō se' blú kibi dōr kuā'kī, e' kiè Jesús. Ie'pa tō sa' blú kibi e' ttè dalōsewéwā.

⁸Mik pē' ulitane ena iwōkirpa tō ttè e' ttsé, etā ie'pa shūtine*k*a taië. ⁹Erè Jasón ena iyamīpa kérakitō inukōl mukat iwà kkachōie tō ie'pa datskene ishulōk t̄a iéminerakitō.

Pablo ena Silas tō Jesús tté paké Berea wakpa a

¹⁰Ká tuinetke etā bet iyamīpa tso' Tesalónica e'pa tō Pablo ena Silas patkēmi ká kiè Berea ee. Ie'pa demi Berea etā imíyal judiowak ñi dapa'wō wé a. ¹¹Judiowak e'pa er dōr buaē judiowak tso' Tesalónica e'pa tsatā. Ie'pa tō Jesús tté kī t̄tsé er bua' wa. Kēkraë ie'pa tō Skēkōl yēkkuō suēkewā bua'iewā isuōie tō ì ché Pablo tō e' yēne ö kè iyēne. ¹²Es taië ie'pa erblé Jesús mik. Ñies taië griegowak erblé imik alakōlpa dalōiērtā' ena wēpa ñies. ¹³Erè mik judiowak serke Tesalónica e'pa wā ijchenewā tō Pablo tso' ñies Berea Skēkōl ttè pakōk, etā imíyal ee. Ie'pa tō Berea wakpa dapa'wēmi shūtīwēmi Pablo kī. ¹⁴Erè s'yamīpa tso' Berea, e'pa

tö Pablo ké e' yöktsā t̄ā ipatkémi dayë kkömik. Erë Silas ena Timoteo e' tséat Berea. ¹⁵Wépa w̄ā Pablo mirw̄a, e'pa w̄ā imí dò̄ ká̄ kiè Atenas eē. E' ukuökj̄ t̄ā ie'pa biteyalne. Pablo tö ie'pa ka' ichök Silas ena Timoteo ā tö “a' kié bet.”

Pablo tö Jesús tté paké Atenas wakpa a

¹⁶Pablo tso' Silas ena Timoteo k̄inuk Atenas, e' dalewa ie' tö isuë tö ká̄ e' wakpa w̄ā íyi diököl tso' dalöie, ese tso' taië. E' tö ie' tsiriwékā taië. ¹⁷E' kuek̄i judiowak ñi dapa'wō wé ā ie' kapaköke judiowak t̄ā ena pè' kè̄ dör judiowak erë Skéköl dalöietā ešepa t̄ā. Ñies ie' kapaköke kekraë Atenas wakpa t̄ā wé ie'pa döke taië íyi tauk eē. ¹⁸Ñies ie'pa wöbla'ukwakpa welepa kiekerakitö epicúreo wakpa^a ena estoico wakpa^b, e'pa ñi iutémi Pablo t̄ā. Ie'pa welepa tö ie' cheke i' es:

—¿Ì kabeweke s'ñeñe dió̄ tö?

Ie'pa welepa skà tö icheke:

—Ttséskua e' dör kékölpa tsakjé dalöieke ká̄ bár wakpa tö e'pa tté pakökwak.

Pablo tso' Jesús kótew̄a shkenekane e' tté buaë pakök e' kuek̄i ie'pa tö ie' ché es. ¹⁹E' kuek̄i ie' tsémirakitö wé ie'pa e' dapa'uke tté tsakjé pakarke ese ttsök eē. Ká̄ e' kiè Areópago. T̄ā ichakérakitö:

—Ttè pa'alí pakeke be' tö, ¿e' pakémibö sa' a? ²⁰Ttè pakeke be' tö, e' kè̄ ttséule sa' w̄a, e' kuek̄i e' kiane jchenukw̄a sa' k̄i ¿ima e' wà dör?

²¹Atenas wakpa k̄os ena ká̄ kuá'k̄i wakpa serke Atenas, e'pa ulitane tö tté pa'alí ttseke ese è̄ pakeke ñi ā kekraë.

²²Et̄ā Pablo e' duékā ie'pa shuā Areópago wé ā t̄ā ichéitö:

“A Atenas wakpa, ì k̄os suéyö, e' wa ye' w̄ā ijcher tö a' tö kékölpa tsakjé dalöieke. ²³Mik ye' tkami a' ká̄ shuā, et̄ā wé a' tö kékölpa ñe' dalöieke ese ké suéyö taië. E' shuā ye' tö ká' tso' idalöioie ese kué et e' k̄i itso' kitule i' es: ‘Skéköl eköl kè̄ jcher se' w̄ā tö yi idir, e' dalöioie’. Ie' dalöieke a' tö, erë a' kè̄ w̄ā ijcher tö yi idir. Skéköl e' pakeke ye' tö a' ā.

²⁴“Ie' tö ká̄ ulitane ena íyi ulitane tso' ik̄i e' yö'at. Ie' dör ká̄ jai ena ká̄ i' e' k̄os wák. Ie' kè̄ serku! Skéköl wé yöule s'ditsö wa ese ā. ²⁵Sulitane serke ie' mik. Ñies íyi ulitane kiane se' k̄i senoie, e' mekeitö se' ā kekraë. E' kuek̄i ie' kè̄ k̄i ikiar tö se' ie' k̄imè ì wa.

²⁶“Wëm eköl è̄ wa ie' tö se' ditsöwö ulitane alöwé. Ie' tö se' ké senuk ká̄ wa'ñe. Mik ie' tö ká̄ i' yö', et̄ā ie' tö se' katatè'atbak tö mik se' sermi, wé se' sermi ditséwö wa ditséwö wa. ²⁷Ie' tö se' katatè'at es as se' tö ima'ù yulè isalema sö ikuèmi. Erë mok̄i ie' kè̄ ku' kamië se' yöki. ²⁸E' dör wes

^a 17.18 *epicúreo wakpa*: E' wakpa tö iklö'wé tö s'ser e' wà bua'ie dör ttsé'ne buaë. Ttè e' wa s'wöbla'weke ie'pa tö. ^b 17.18 *estoico wakpa*: E' wakpa tö iklö'wé tö s'ser e' wà bua'ie dör se' e' kkö'nù ì sulu k̄os e' yöki. Ttè e' wa s'wöbla'weke ie'pa tö.

yile tö iché es, e' tö iché: 'Skököl mik se' serke se' shköke, ie' wa se' tso.' Nies e' dör wes a' wákpa ttsököl eköl tö iyé'at es, e' tö iché: 'Sulitane dör Skököl aleripa.' ²⁹Se' dör Skököl ditséwö, e' kuekí kè se' kàne ibikeitsök tö ie' dör wes íyí diököl yöule se' wá orochka wa ö inukölchka wa ö ákchka wa es. E' kos yuésö wes se' ibikeitsè es wes se' wákpa a iyör es. Erè Skököl kè dör es. ³⁰Iaiäe ta kè se' wá ijcher tö wes ie' dör, e' kuekí e' nuí tköo'atbak ie' tö ie'pa kí, Erè i'ñe ta ie' tso' ichök ká ulitane wakpa a tö a' kawöta er mane'uk. ³¹Skököl tö idiwö me'atbak wekkè alè ta ie' tö sulitane shuleraè yèsyèsè wëm eköl tkè'kaitö e' wa. Wëm e' kötewá erè ishkeo'kane Skököl tö, e' wa ie' tö iwà kkaché sulitane a tö mokiè wëm ñe' tkè'kaitö."

³²Erè mik Atenas wakpa tö ittsé tö Pablo tö s'du'wá shkenekane e' ché, etá ie'pa welepa tö ie' wayué, erè welepa skà tö iché:

—Í pakeke be' tö, e' skà ttsèmi sa' tö iëtökichane.

³³Etá Pablo mía. ³⁴Erè wëpa welepa míyal Pablo ta, ta e'pa erblé Jesús mik. Ie'pa e' shuá Dionisio tso'ñak, e' dör Areópago wökirpa eköl. Nies alaköl eköl kiè Dámaris ena pè' skà tso'ñak ishüa.

Pablo mía Corinto

18 ¹E' ukuökí ta Pablo e' yéttsa Atenas mía Corinto. ²Eë wëm kuéwaitö eköl dör judiowak kiè Áquila, e' dör ká kiè Ponto e' wak. Ie' alaköl kiè Priscila. Ie'pa bak senuk Roma atë Italia eë. Ie'pa dë'bitü erpa Corinto. Ká tso' tseè romawak ttè dikia e' wökir kibi kiè Claudio, ie' tö judiowak kos serke Roma e' yökulur patké. E' kuekí Áquila ena ilaköl e' yé'lur Roma demi Corinto. Pablo mía ie'pa pakök. ³Ie' kanè dör ie'pa kanè ese è, e' kuekí ie' e' tséat ie'pa ta kaneblök. Kanè e' dör iyiwak kkuölit yueke üie tsèmi ese kané. ⁴Eno diwö bit ekkè Pablo mi'ke judiowak ñi dapa'wö wé a. Eë ie' tö Jesús tté pakeke ie'pa ulitane a. Ie' tö judiowak ena pè' kè dör judiowak e'pa ulitane pableke as ie'pa erblö Jesús mik.

⁵Mik Silas ena Timoteo tso' Macedonia, e'pa demirak Corinto, etá Pablo kè kanebléneia Áquila ta. E' skéie ie' e' mé Jesús tté buae e' è pakök kekraë. Nies ie' tö judiowak pablé kekraë tö Jesús dör wé pairine'bitü idi' wa s'blúie e'. ⁶Erè ie'pa wötkémi Pablo ta ta iché suluë. E' kuekí ie' datsi' wöppée iwà kkachöie tö ie' kè kí inuí ku' ta iché iarak:

—A' weirdaë siarè, e' wiie a' wákpa iane. E' kè wëneia ye' wöki. I'tami ye' mía pè' kè dör judiowak esepa pattök.

⁷Etá Pablo e' yéttsa judiowak ñi dapa'wö wé a mía wëm kiè Ticio Justo, e' u a senuk. Wëm e' tö Skököl dalöieke taië. Ie' serke judiowak ñi dapa'wö wé o'mik. ⁸Wëm kiè Crispo, e' dör judiowak ñi dapa'wö wé, e' wökir. Ie' erblé Skékëpa Jesús mik iyamipa kos e' ta. Es ñies taië Corinto wakpa tö Jesús tté tse ta ierblérak imik ta ie' wöskuélor. ⁹Ká et nañewe

Skëképa Jesús tō Pablo a iché kabsueje: “Kè be' suanuk. Ye' tté kí pakó kékraë. Kè be' siwá'blök. ¹⁰Ye' tso' be' tã. Kè yi a ì sulu wamblënuK be' kí yës. Ye' wã pè' tso' tajë kã i' kí.” ¹¹Es Pablo atë duas ek kí shãbõts Corinto ie'pa wöbla'uk Skëköl ttè wa.

¹²Mik Galión bak Acaya wökirie, etã judiowak serke Corinto e'pa ñi dapa'wëka Pablo naméie ie' tsëmi ttè shulo wé a. ¹³Ie'pa tō Pablo kkaté Galión a tã iché ia:

—Wëm i' tso' sa' pablök tō Skëköl dalöiö sa' tō, erë kè dör wës ttè dalöiëno meneat sa' a e' tō ichè es.

¹⁴Pablo ttémitke tã Galión tō iché judiowak a:

—Mokì ì sulu wamblöpaítö, e'ma ye' tō a' ttò ttsëmi. ¹⁵Erë a' tso' ñi wõnatkök ttè kí ena wëpa welepa kiè kí, ena a' wákpa ttè dalöiëno e' kí, e' kuëki e' shuló a' wákpa tō. Ye' kè tō ttè ese shulë.

¹⁶Etã Galión tō ie'pa uyéttsã ttè shulo wé a. ¹⁷Etã pè' tso' tajë e'pa tō wëm kiè Sóstenes dör judiowak ñi dapa'wo wé wökir, e' klö'wëwã pperakitö ttè shulo wé wöshãë. Erë e' kí Galión kè tkine yës.

Pablo dene Antioquía

¹⁸Pablo e' tséatiã tajë Corinto. E' ukuökì tã ie' e' chéat iyamipa a tã imía kã kiè Cencreas wé kanò irirke eë. Etã eë ie' e' iéka kanò mi'ke Siria ese a. Áquila ena Priscila mitke ie' tã ñies. Kam ie' e' iökã kanò a, etã ie' tsã téé manene. E' wëitö ittè me'itö Skëköl a e' blóie wës iyë'itö es. ¹⁹⁻²¹Mik ie'pa demi kã kiè Éfeso eë, etã Pablo mía judiowak ñi dapa'wo wé a Jesús tté buaë pakök judiowak ñi dapa'uke eë, e'pa a. Ie'pa tō iché ia tajë: “Be' e' tsúatiã sa' tã.” Erë kè ie' e' tsakat. Ie' e' chéat ie'pa a tã ichéitö: “Skëköl kí ikiane, e'ma ye' skà dörane a' pakök.” Áquila ena Priscila e' tséat senuk Éfeso.

E' ukuökì tã Pablo e' iéka kanò a tã imía. ²²Mik idemi Cesarea tã imía Jerusalén Skëképa Jesús icha erule e'pa shke'uk. E' ukuökì tã imía Antioquía. ²³Eë ie' sené ekuölö. E' ukuökì tã iskà míane Galacia ena Frigia, kã e' kos a Jesús ttókatapa er diché kí iök.

Apolo tō Jesús tté paké Éfeso wakpa a

²⁴E' kéwö ska' tã wëm eköl kiè Apolo dör judiowak, e' de Éfeso. Ie' datse kã kiè Alejandría eë. Ie' dör wëm ttò buaë ese. Ie' wã Skëköl yëkkuö sũule buaë. ²⁵Ie' yöule buaë Skëköl ñalé tté wa. Ie' tō s'wöbla'wëke kaneë yësyesë Jesús tté wa. Erë ie' kè wã Jesús tté jcher seraã. Ie' wã Juan S'wöskuökwak, e' ttè è sũule. ²⁶Ie' ttémi judiowak ñi dapa'wo wé a, kè suane. Etã mik Priscila ena Áquila tō ie' kapaköke e' ttsé, etã ikiémirakitö iu a. Tã eë ie'pa tō ie' kí wöbla'wé buaë Skëköl ñalé tté wa. ^{27,28}E' ukuökì tã ie' shkak kã kiè Acaya eë. E' kuëki iyamipa serke Éfeso, e'pa tō ie' kímé. Yëkkuö shtérakitö Jesús ttókatapa tso' Acaya, e'pa a as ie'pa tō ie' kiöwã buaë. Mik ie' demi

Acaya tã wépa erblè'bak Jesús mik Skèköl er buaë ché ie'pa a e' kuèki, esepa kímé taië ie' tò. Ie' e' alòke judiowak kì ie' ttè wa sulitane wòrkì. Ie' tò ie'pa siwà'blòweke. Ie' tò ikkacheke yësyësè Skèköl yèkkuò wa tò moki Jesús dör wé pairine'bitù idi' wa s'blúie e'. Es ie' tò iyamipa kímé.

Pablo tò Jesús tté buaë paké Éfeso wakpa a

19 ¹Apolo tso'ia Corinto e' dalewa Pablo tkami kabata wa demi Éfeso. Ee ie' tò Jesús ttókatapa welepa kué. ²Ie' tò ie'pa a ichaké: Mik a' erblè' Jesús mik etã ¿Wiköl Batse'r dè' a' kì?

Ie'pa tò iüté:

—Kè sa' wã ittsèule tò Wiköl Batse'r tso'.

³Pablo tò ie'pa a ichaké:

—Etã ¿wòskuè wése wa a' wòsune?

Ie'pa iüté:

—Juan s'wòskuè e' wa.

⁴Ie' tò iché iarak:

—Wépa er mane'wé Skèköl a, esepa wòsuk Juan tò. Erè ie' tò iyè' ie'pa a tò wém datse ie' itòkì e' mik ie'pa ké erblök.

⁵Ttè e' ttsérakitò tã iwòskuélör Skèképa Jesús ttò wa. ⁶Pablo ulà méka ie'pa kì tã Wiköl Batse'r debitu ie'pa kì tã ie'pa ttémi ttò kua'kì kua'kì wa. Nies ì mé Skèköl tò ie'pa a chè, e' ché ie'pa tò. ⁷Seraã ie'pa dòka dabom eyök kì bøl (12) wépa.

⁸Si' mañat Pablo shkére judiowak ñi dapa'wo wé a, ee Jesús tté pakéitò kè suane. Ie' tò ie'pa pableke taië as ie'pa e' tiùwã ì blúie Skèköl tso' e' tté dikia. ⁹Erè ie'pa welepa wòkir darèrèè, e' kuèki ie'pa kè wã ttè e' klöne. Ie'pa tò Jesús dör se' ñalã e' tté ché suluë sulitane kukua. Etã Pablo e' skéttsã ie'pa yòkì. Wépa detke Jesús ttókatapaie e'pa tsémi e' tã dò wé wém kiè Tirano e' wã u tso' s'wöbla'woie ee. Ee Jesús tté pakeke Pablo tò kekraë. ¹⁰Es iwéitò dò duas bök. Sulitane serke Asia, judiowak ena pé' kè dör judiowak, e'pa tò Skèképa Jesús tté ttsé. ^{11,12}Ì kè or yi a ese wé Skèköl tò kibiie Pablo wa tkòka imalepa tsatã dò tsamo ena datsi' done ie' mik ese mi'kerak iwã wépa kirirke esepa ska' tã ibuanene tã wimblupa sulusi e' yélur ie'pa a.

¹³Erè judiowak welepa shkòrami ñalã kì wimblupa sulusi yökulur pé' a. E'pa tò iché 'ima'ùsò Skèképa Jesús ttò wa.' Ie'pa ichémi wimblupa sulusi a i' es: "iA' e' yólur Jesús pakeke Pablo tò, e' ttò wa!"

¹⁴Es wém kiè Esceva e' ala'r dòka kul e'pa tò ima'wémi ñies. Esceva dör judiowak sacerdotepa wòkirpa e' eköl. ¹⁵Erè etókicha tã wimblu sulusi tò ie'pa iüté: "Yi dör Jesús e' jcher ye' wã. Nies yi dör Pablo e' jcher ye' wã. Erè ¿a' dör yi?"

¹⁶E' wòshaë wém a wimblu sulusi tso', e' unekã ie'pa kì. Ie' e' aléka ie'pa kì idiché taië wa. Ie'pa ppéitò siarè. Ie'pa e' yélur tkayal sume

shka'ule taijē. ¹⁷Éfeso wakpa kōs, judiowak ena kē judiowak, e'pa wā ijchēnewā. Taijē ie'pa suane. Es Skēkēpa Jesús tté kī bunekā taijē.

¹⁸Taijē pē' erblē Jesús mik esepa debitū ì kōs wamblē'raitō suluē e' chōkkā sulitane kukua. ¹⁹E'pa shuā taijē ie'pa awāpa tso'ñak. E'pa kōs wā iyēkkuō tso'rak iwā wakanewē, ese debitū tā iñā'wēwa sulitane wōshāē. Ie'pa tō iyéttsā kōs yēkkuō e' ské dōr tā idettsā inukōl taijē. E' dōr ie'pa inukōl dōkā 50.000 ekkē. ²⁰Es Skēkēpa Jesús tté kī bunekā taijē. Sulitane tō isuē tō ttē e' diché tā' taijē.

²¹E' ukuōkī tā Pablo ibikeitsé: “Ye' mi'ke ká kiè Macedonia ena Acaya e' wakpa pakōk. E' ukuōkī tā ye' michoē dō Jerusalén. Eē tā ye' kawōtā shkōk dō Roma ñies.”

²²E' ukuōkī tā ie' kīmukwakpa bōl, Timoteo ena Erasto, e'pa patkēmiitō dō Macedonia, e' dalewa ie' atēiā Asia ekuölō.

Éfeso wakpa shūtinekā taijē

²³E' kēwō ska' Éfeso wakpa shūtinekā taijē Jesús dōr Se' ñalā e' tté kuekī. ²⁴Wēm tso' ekōl kiè Demetrio e' dōr íyi diōkōl yuōk inukōlchka wa e' sté. E' tō Éfeso wakpa Kēkōl kiè Artemisa wak dōr alakōlie, e' wé diōkōl yueke inukōlchka wa. Kanē e' wa ie' ena ikanē mēsopa inukōl klō'uke taijē. ²⁵Ikanē mēsopa dapa'wēkāitō imalepa kanēblōke kanē ese è ā e'pa tā, tā ichéitō: “A kēkēpa, a' wā ijchēr tō kanē i' wa se' inukōl klō'uke. ²⁶Erē a' isuē, a' ittésē tō Pablo e' tso' ichōk tō íyi diōkōl yuekesō dalōiē skēkōlie, e' kē dōr skēkōl moki. Taijē pē' tō ttē e' klō'wētke íē Éfeso ñies Asia kōs e' a. ²⁷E' dōr suluē. E' tō se' kanē sulu'wēmiwā. Ñies Artemisa, se' kēkōl taijē, e' wé dalōsewēwamiitō. Se' kēkōl taijē dalōiērtā' taijē Asia ena ká wa'ñe, e' dalōsewēwaraitō.”

²⁸Mik ttē e' ttsérakitō, etā ilunekarak taijē. Etā ianekarak: “Artemisa dōr Éfeso wakpa kēkōl, e' dōr kēkōl taijē.”

²⁹Etā Éfeso wakpa kōs alánekā taijē. Wēpa datse bōl Macedonia. Ekōl kiè Gayo iēkōl kiè Aristarco, e'pa dōr Pablo wapiepa, e'pa tso'ñak eē. Éfeso wakpa tō ie'pa bōl klō'wēwā kuēmi dō wé ie'pa ñi dapa'uke e' wé ā. ³⁰Etā Pablo shkakwā eē ttōk ie'pa tā, erē Jesús ttōkatapa malepa kē wā ianemi. ³¹Ñies Asia wōkirpa wēlepa éna Pablo dalēr taijē, e'pa tō ttē patké Pablo ā: “Kē be' minukwā eē.” ³²E' dalewa Éfeso wakpa daparke e'pa shūtinekā taijē. Ie'pa arkekarak taijē. Ikiibiiepa kē éna iwā ane iók iē' dapa'wérak. E' kuekī ekōltēpa arke kuā'kī, iēkōltēpa arke kuā'kī. ³³Etā judiowak tō wēm kiè Alejandro e' tsémi patkēule duēsēr sulitane wōrkī, e' kuekī pē' wēlepa tō ibikeitsé tō ie' wōkī iwērke. Etā ie' tō ikkaché ulā wa tō “A' siwā'bló. Ye' ttōke judiowak tsatkoie.” ³⁴Erē mik ie'pa wā ijchēnewā tō ie' dōr judiowak, etā ie'pa skā e' kékane anuk: “Artemisa dōr Éfeso kēkōl. E' dōr kēkōl taijē.” Es ie'pa arkerak dō hora bōt.

³⁵E' ukuōkī tā ká wōkirpa yēkkuō shtōkwak, e' tō pē' ké siwā'blōkwā. Ie' tō iché ie'pa ā: “A Éfeso wakpa, ká ulitane wakpa wā ijchēr tō se' dōr Éfeso

wakpa e'pa dör se' kéköl tajë Artemisa e' wé kkö'nukwakpa, ñies ie' diököl anebitü ká jaì a, e' kkö'nukwakpa. ³⁶Kè yi a iyërpa tò kè idör es. E' kuekì a' siwa'blólur. Kè ì wamblar kè bikeitsule buaë. ³⁷Wëpa i' debitü a' wa, e'pa kè wà ì blëulewà se' kéköl wé a. Ie'pa kè wà se' kéköl yëule suluë. ³⁸E' kuekì Demetrio ena ikanè mësopa, ie'pa éna yile kkatak, e' ta' as imi'rak ikkatök ttè shulökwakpa a ena s'wökirpa a. E'pa tso' kanëblök ttè shulo wé a. Ee ie' tsatkömirak ñi wöshaë. ³⁹Erë ì skà kianeia a' kì yënoie, e' ta' e' choie a' kawötà mik se' daparke wes ikanewekesö es età. ⁴⁰Ì tka ìrè ì'ñe, e' kì s'wökirpa tò se' kkatèmi. Kè iwà ta' mokië, e' kuekì ie'pa tò se' kkaté iki, e' ta' kè se' a e' tsatkënuik iyöki." ⁴¹Ie' tté one ta' ichéitö ie'pa a, "A' yúshka."

Pablo mía Macedonia ena Grecia

20 ¹Éfeso wakpa shutineka, e' olone ta' Pablo tò Jesús ttökatapa kiéttsa pattè. E' ukuökì ta' ie' e' chéat ie'pa a ta' imía Macedonia. ²Ie' tkami ká e' wa'ñe iyamipa pattök, e' tò ie'pa er kuwé tajë. E' ukuökì ta' ie' mía Grecia. ³Ee ie' sené si' mañat. Ie' tso'tke kanò klö'uk shkomi dò Siria, e' shua ta' ie' wà ijchenewà tò judiowak ileritsétke ie' ttowà. E' kuekì ie' míane klò wa tkamine Macedonia. ⁴Ie' wapiepa dör kul. Eköl kiè Sópatro, e' dör Berea wak, iyé kiè Pirro. Ièköl kiè Aristarco. Ièköl kiè Segundo, e' dör Tesalónica wak. Ièköl kiè Gayo, e' dör Derbe wak. Ièköl kiè Timoteo. Ñies wëpa bøl dör Asia wakpa, e'pa kiè Tíquico ena Trófimo. ⁵Wëpa ekkëpa mía kewe sa' yökì sa' kìnuk ká kiè Tróade ee. ⁶Pan Kè Yöule Iwölöwoka Wa e' kèwö tka, età sa' e' yélur Filipos mía kanò kì dò Tróade. Ká skel ukuökì ta' sa' demi Tróade, età ie'pa kué sa' tò ee. Ee sa' e' tséat ká kul.

Pablo tò ttè bata paké Skékëpa Jesús icha erule tso' Tróade, e'pa a

⁷Eno diwö tuinetke ta' sa' e' dapa'wéka ñita Jesús kötewà e' kèwö tkö'uk. Pablo tso' iyamipa ta' kapakök. Ie' kawötà e' yöktsa bule es, e' kuekì ie' kapaké dò ká shaböts. ⁸Sa' dapanekà u kakkeë e' a. Tajë bö'wö tso' wötskiulekà ee. ⁹Duladula tkër eköl ukkö tsitsir kì, e' kiè Eutico. Pablo tso' kapakök tajë e' dalewa Eutico shtrinewatke kapakwatke. Bata ekkè ta' ikapowà ta' ibrutanemi döttsa iski. Età ikékà ie'pa tò erë iduowaie. ¹⁰Età Pablo dur kákke, e' e' éwa ta' ie' e' méka duladula bata kì, ipaklö'wéwaitö ta' ichéitö:

—Kè a' tkinukia. Itso' ttsé'ka.

¹¹E' ukuökì ta' Pablo tkakane kákke ta' Jesús kötewà e' kèwö tkö'wéitö ie'pa ta. Età ie' kapakéia dò ká ñine ekkè ta' imía. ¹²Età duladula tsémirakitö ttsé'ka iu a. E' tò ie'pa ulitane kì ttsé'wéka buaë.

Pablo e' yéttsa Tróade mía Mileto

¹³Sa' míyal kewe Pablo yökì kanò kì dò ká kiè Aso ee. Pablo wák shkak klò wa dò ee, e' kuekì sa' kawö me'attke ie' ta' ñi kìnuk ee. ¹⁴Mik sa' tò

ie' kué, etá ie' e' iéka sa' tã kanò kî tã sa' míyal ká kiè Mitilene ee. ¹⁵Tã sa' michoë. Bule es tã sa' tkami ká kiè Quío, e' wöshäë. E' bule es tã sa' demi wé kanò irirke kiè Samos ee. E' bule es tã sa' míã Mileto. ¹⁶Pablo shkakmi bet dò Jerusalén Pentecostés kèwö tkò'uk, e' kuékî sa' mineyal es. Pablo kè e' wöklö'wak taië Asia, e' kuékî ie' kè dè' Éfeso.

Pablo kapaké Skèkèpa Jesús icha erule tso' Éfeso e' wökirpa tã

¹⁷Pablo tso' Mileto e' tò Skèkèpa Jesús icha erule tso' Éfeso e' wökirpa tsuk patké ñi dapa'uk ie' tã. ¹⁸Mik idebiturak, etã Pablo tò iché iarak:

—Wes ye' sené a' shuá ye' tsá dè'bitu Asia e'tami, e' jcher buaë a' wa. ¹⁹Eré judiowak ileritseke ye' tsaiök e' ye' rreweke taië, eré kekraë ye' e' wöawa diöshet tã Skèkèpa Jesús kanè uk ye' bak a' shuá ië wa ì wa. ²⁰Ñies a' wa ijcher tò ttè buaë a' kimoie, ese kè blènewa ye' wa yès a' yökî. Ese wa ye' bak a' wöbla'uk sulitane wörkî, ñies u a u a. ²¹Ye' bak ichök wö yèsyèsè wa judiowak a ena pè' kè dör judiowak esepa a: 'A' ké er mane'uk Skèköl a. A' ké erblök Skèkèpa Jesús mik mokjë.' ²²I'ñe ye' mitke Jerusalén. Ye' ittse tò es Wiköl Batse'r kî ikiane. Kè ye' wa ijcher wes ye' wèmirakitö ee. ²³Ká wa'ñe wé ye' dè'ule ee Wiköl Batse'r tò ye' a icheke: 'be' wötërdaë, be' weirdaë siarë,' e' è jcher ye' wa. ²⁴Ye' a tã ye' ttèwa ö ye' tso' ttsé'ka, kè e' kî ye' tkine. Kanè me' ye' a Skèkèpa Jesús tò, e' è ewakwa ye' éna er bua' wa. Kanè e' dör Skèköl er buaë chöke siã, e' ttè buaë pakök.

²⁵I' blúie Skèköl tso' e' tté pakéyö a' a. I'ñe ye' wa ijcher buaë tò a' ulitane kè tò ye' suepaiane. ²⁶E' kuékî i'ñe tã yö ichè a' a mokjë tò a' wépa kè tsatkène, e' tã kè ye' iane iwiie. ²⁷I' kiane kanewè Skèköl kî, e' tté pakéyö a' a se. Kè ye' wa ttè wéne blènewa yès a' yökî. ²⁸E' kuékî a' e' kkö'nú. Ñies Wiköl Batse'r tò a' tkè'ka Skèköl ichapa erule e'pa wökirpaie ikkö'nukrak, e' kuékî ie'pa kkö'nú buaë a' tò. Ie'pa to'ttsã Skèköl tò iwák pé wa. ²⁹Ye' wa ijcher tò mik ye' míã e' ukuökî tã pè' döraë s'yamipa eukwa wes chichi sulusi tò iyiwak ewèwa es. ³⁰Ñies a' shuá welepa e' kōrakã s'wöbla'uk kache tté wa as s'yamipa erblé Jesús mik e'pa mi' ie'pa è itökî. ³¹A' tso' erkî. A' éna ianú tò duas mañal, ñiwe nañewe, kekraë ye' bak a' ulitane pattök eköl eköl ië wa ì wa.

³²Es ye' tò a' méat Skèköl ulà a. Ñies a' méatyö Skèköl er buaë chöke se' a e' tté a. Ie' wa diché ta' a' er diché kî ioie. Ñies ie' wa diché ta' ì kos buaë moie a' a wes ikablè' imuk ie' icha batse'r esepa a es. ³³Kè ye' wa yi inuköl ena yi datsi' kkeyëule yès. ³⁴Erè a' wa ijcher buaë tò ye' kè bak senuk yi ulà mik. E' skéie ye' kaneblè' ye' wák ulà ' wa e' kkö'noie. Ñies e' wa ye' tò ye' wapiepa kímé. ³⁵Es ye' bak a' wöbla'uk kekraë tò s'kawötã kaneblök darèrèè wépa kè a kaneblër, esepa kimoie. Kè se' éna ichökwa tò Skèkèpa Jesús wák tò iyè': "Se' tò ikakmè e' dör ibua'ie se' a, kè dör ikaktsè."

³⁶Mik Pablo tté one, etá ie' e' tkéwā kuchē kī tā ittē Skēkōl tā ie'pa ulitane tā. ³⁷Ie'pa ulitane tso' e' chōkāt Pablo a iūke taijē tā ie'pa tō ipaklō'wēmī iwōalattsēmi. ³⁸Pablo tō ichétke ie'pa a: “A' kè tō ye' suepaiane.” E' tō ie'pa eriauwé taijē. E' ukuōkī tā ie'pa mīā iñalemuk dō wé kanò irirke eē.

Pablo mīā Jerusalén

21 ¹Mik sa' tō sa' yamipa méat, etá sa' e' iéka kanò a. Sa' míyal yēsýsē ká kiè Cos eē. E' bule es tā sa' míyal ká kiè Rodas eē tā sa' míyal ká kiè Pátara eē. ²Etá sa' tō kanò kué Pátara mi'ke ká kiè Fenicia, e' a sa' e' iéka tā sa' míyal. ³Sa' tkami tā sa' tō ká kiè Chipre e' sué, e' atē ulā baklī'kka. Etá sa' mir dō Siria. Dalī mir kanò a e' mekeat Tiro, e' kuēkī sa' demi eē. ⁴Etá Jesús mik erblōkwakpa serke eē, e'pa yulé sa' tō tā ikué sa' tō. Sa' sené ká kul ie'pa ska'. Ie'pa tō iché Pablo a Skēkōl Wikōl wa: “Be' mú kè mi' Jerusalén.” ⁵Erē ká kul tka sa' kī etá sa' e' yéttsane. Ie'pa kos, ilakōlpa ena ila'r, e' yéttsa ie'pa ká a míyal sa' ñalemuk dōmi dayē kkōmik. Eē sa' e' tuléwā kuchē kī ttōk Skēkōl tā. ⁶E' ukuōkī tā sa' e' chéat ie'pa a tā sa' e' iéka kanò a. Etá ie'pa míyalne iu a.

⁷Sa' e' yéttsa Tiro demi ká kiè Tolemaida eē. Sa' tō s'yamipa serke eē e'pa shke'wé. Sa' e' tséat ie'pa ska' ká et. ⁸E' bule es tā sa' e' yéttsane demi klō wa Cesarea. Eē sa' mí Felipe dōr Jesús tté buaē pakōkwak e' u a. Ie' dōr wēpa kul shūkitulebak Jesús ttekōlpa tsá e'pa kīmuk, e' ekōl. Ie' ska' sa' e' tséat. ⁹Ie' ala'r busipa dōka tkēl kam iserdak wēpa tā. Ie'pa kos dōr Skēkōl ttekōlpa. ¹⁰Sa' sené ie' ska' elkeē etá wēm debitū ekōl datse Judea, e' kiè Agabo. Ie' dōr Skēkōl ttekōl. ¹¹Ie' dewā sa' o'mik tā Pablo kipamo klō'wéwaitō. Tā e' wa ie' e' muéwā iklō a ena iulā a tā ichéitō:

—Wikōl Batse'r tō iché: “I' es judiowak tō kipamo i' wák, e' muerawā Jerusalén. Tā imerattsa ie'pa tō pé' kè dōr judiowak, esepa ulā a.”

¹²Mik sa' tō tté e' ttsé, etá sa' ena Cesarea wakpa tso'ñak sa' tā, e'pa ulitane kkōché taijē Pablo a: “Kè be' minuk Jerusalén.” ¹³Erē Pablo tō iūtē:

—Īl kuēkī a' iūke? E' tso' ye' eriauk taijē. Ye' e' méttstatke monukwā, ñies ttēwā Skēkēpa Jesús tté kuēkī Jerusalén.

¹⁴Ie' kè wā sa' ttō iūtēne, e' kuēkī kè sa' wā ì kī yēne ia. Sa' iché:

—As Skēkēpa tō iū wēs ie' kī ikiane es.

¹⁵E' ukuōkī tā sa' dalī ié míyal Jerusalén. ¹⁶Jesús ttōkatapa tso' Cesarea, e'pa wēlepa míyal sa' tā. Ie'pa wā sa' mítser wēm kiè Mnasón, e' u a kapōkrō. Wēm e' datse ká kiè Chipre eē. Ie' dōr wēpa tsá erblē' Jesús mik esepa ekōl.

Pablo mīā Santiago pakök

¹⁷Mik sa' dekā Jerusalén, etá s'yamipa tso' eē, e'pa tō sa' kiéwā buaē, ittsē'nerak buaē. ¹⁸E' bule es tā Pablo mīā sa' tā Santiago pakök. Ñies

Skëképa Jesús icha e'pa wökir kibipa tso'ñak Santiago ska' seraa. ¹⁹Ie' tó ie'pa shkë'wé tã ì kòs wéitò Skëköl batamik, pè' kè dör judiowak, esepa shuà, e' pakéitò ie'pa a yësyësë. ²⁰Mik e' tssé ie'pa tó, etã Skëköl kíkëkarakitò tajë. Ie'pa tó iché iã:

—A yami Pablo, be' isuë buaë tó ìe judiowak döka miles e'pa erblétke Jesús mik. Ie'pa ulitane e' mettsã da'a Moisés ttè dalöiëno e' tsatök. ²¹Ie'pa a iyëne tó be' tó judiowak tso' kã kuã'kì kuã'kì kì, esepa wöbla'weke tó ttè e' olo'yó. Nies ichekerakitò tó be' tó icheke tó ila'r kurke wëpa, esepa tottola kkuölit kè tar. Nies ichekerakitò tó be' tó s'wöbla'weke tó se' judiowak ser e' kè dalöiaria. ²²Ie'pa ulitane wã ijcherdawa tó be' dë'bitu. E' kuekì ì wëmi be' tó ie'pa siwa'blöwowa? ²³Ì cheke sa' tó be' a e' ú. Ìe sa' shuà wëpa tso' tkël kawö me'bak Skëköl a, e' orketke. ²⁴E'pa tsúmi e' tã, tã be' e' batse'ú ie'pa tã. Kòs e' patuë e' pataúbö as ie'pa tsà tótsã manene iwà kkachöie tó kawö me' ie'pa tó Skëköl a e' one. Be' tó iwé es, e' tã judiowak ulitane isuëraë tó ì kòs kì pè' tso' be' chök suluë e' dör kache. Ie'pa tó isuëmi tó Moisés ttè dalöiëno e' dalöieta' be' tó ñies. ²⁵Erë s'yamipa kè dör judiowak, esepa a ì bikeitsé sa' tó e' kitmibak sa' tó yëkkuö kì. E' kì sa' tó ie'pa a iyé' tó ie'pa kè kàne chkè meule íyì diököl tso' dalöië ese a ese katök. Iyiwak pé kè katar. Iyiwak ttëwã kuli' siulekã ese chkà kè katar. Nies ie'pa kè kàne trënuK.

Pablo klö'wëwarakitò Skëköl wé pamik

²⁶Es Pablo e' yéttsã wëpa tkël, e'pa tã. E' bule es tã ie' e' batse'wé ie'pa tã. E' ukuökì tã ie'pa tkawa Skëköl wé a. Eë Pablo tó ibiyó ché tó mik tã ie'pa batse'ne e' diwö ene tã ie'pa íyì meke Skëköl a iwakpa bil ekkë.

²⁷Kawö kul shuà ie'pa tso' batse'ne e' erkewatke etã judiowak welepa datse Asia, e'pa tó Pablo suë Skëköl wé a. Ie'pa tó imalepa shutiwëkã tã imishkarak Pablo kì iklö'wëwarakitò. ²⁸Ie'pa anekarak: “A yamipa, sa' kímú. Wëm i' shköke kã wa'ñe s'wöbla'uk tó se' judiowak ser, e' kè dör buaë. Ie' icherami tó Moisés ttè dalöiëno ena Skëköl wé i' kè dör buaë. Ìñe tã pè' kè dör judiowak esepa welepa debitu ie' wa' ìe Skëköl wé a. E' tó kã i' dör batse'r e' ia'wëkã.”

²⁹Wëm kië Trófimo e' su' ie'pa tó Jerusalén ie' dör Éfeso wak. Ie'pa tó ibikeitsé tó Pablo wã imí Skëköl wé a, e' kuekì ie'pa tó iché es.

³⁰Kã e' wakpa kòs shutinekã debitu tuneule. Tã Pablo klö'wëwarakitò kuëmi u'rki. E' bet Skëköl wé wëkkö ulitane wötëwarakitò. ³¹Ie'pa tó ittekewatke etã ttè de Roma ñippökwakpa eruleë e' comandante a tó Jerusalén wakpa ulitane shutinekã tajë. ³²Etã ie' tó ñippökwakpa dapa'wé ikayuapa tã, etã itunemirak wé pè' daparke eë. Mik pè' tó ñippökwakpa ena icomandante suë, etã ie'pa tó Pablo méat, kè ippèia. ³³Etã comandante debitu, e' tó Pablo klö'wëwã tã imaukwã kè tabechka kichaie bötö wa. E' ukuökì tã ie'pa a ichakéitò: “¿I' dör yi?

¿Ì wambléitö?” ³⁴Erë wëlepa tō iché kuə'kī әнеule, iëltëpa iché kuə'kī әнеule. Tajë ie'pa ərkerak kuə'kī kuə'kī, e' wa kè ishulir, e' kuekī ie' tō itsukmi ké ñippökwapka wé a. ³⁵Pë' éna ie' klö'wəkwə kësik wa, e' kuekī mik idemirak ñippökwapka wé klékata kī, eṭə ñippökwapka tō Pablo batsékami. ³⁶Pë' kōs ərke Pablo itōki: “İttōwa!”

Pablo e' tsətké judiowak wörki

³⁷Mik Pablo dökewəṭke ñippökwapka wé a eṭə ie' tō comandante a iché:

—Kawö mú ña ttök be' ta.

Eṭə comandante tō iüté:

—Ye' kè wə ijcher tō be' ttö griegoie. ³⁸E'ma be' kè dör Egipto wak dë'bitu eköl e' ka'ka ñippök sa' ta e'. Ie' mía ká wé kè yi ku' ee s'ttökwa wakpa ta dōka mil tkëyök (4000).

³⁹Eṭə ie' tō iché ia:

—Au, ye' dör judiowak kune Tarso, ká e' dör ká kibi aṭe Cilicia. Kawö mú ye' a toie ie'pa ta.

⁴⁰Eṭə comandante tō kawö mé ia. Eṭə ie' dur shkë'ka ñippökwapka wé klékata kī ta iulà kkaché pë' tso' taië, e'pa a tō a' siwa'blólur. Mik isiwa'blëwərak, eṭə ie' tté ie'pa ta hebreoie. Ta ichéitö iarak:

22 ¹“A yamipa, a kékëpa, ye' e' tsətköke, e' ttsó.”

²Mik ie'pa tō ittsé tō Pablo ttöke ie'pa ta iwákpa ttö wa, eṭə ie'pa kī siwa'blélur. Ie' tō iché:

³“Ye' dör ñies judiowak wës a' es. Ye' kune' Tarso aṭe Cilicia ee. Erë ye' talane íe Jerusalén. Gamaliel tō ye' yö' yësyësë wës se' ttè dalöiëno kiteat iaiaë e' tō iché es. Këkraë ye' tso'ie Skëköl dalöiök ye' er kōs wa kōs a' ulitane tō idalöieke i'ñe ekkë. ⁴Mik se' wëpa tō Jesús dör Se' ñalə e' tté klö'wé, eṭə esepa tōtiuk ye' bak ttëwə, klö'wëwə, wötëwə s'wōto wé a. Kè ye' tkine tō wëm idir ö alaköl idir. ⁵Ñies sacerdote kibi ena s'kuëblupa ulitane, e'pa tō a' a ichëmi tō e' dör mokijë. Ie'pa tō ye' a yëkkuö me' tsëmi s'yamipa tso' Damasco e'pa a. Yëkkuö e' tō kawö me' ye' a Jesús mik ərblökwapka esepa tsobitu dö Jerusalén we'ikë.

⁶“Erë ye' miria ñalə kī. Diwö de bata a ta ye' dökemitke Damasco tsinet, e' bet ta ì bitëshka ká jaì a bö'wöie e' olo bune taië ye' pamik. ⁷Ee ye' anere iski. Eṭə ittö ttséyö tō iché ña: ‘A Saulo, a Saulo ¿iök be' tō ye' we'ikeke?’ ⁸Eṭə ichakéyö: ‘A Skëképa, ¿be' dör yi?’ Eṭə ie' tō iüté: ‘Ye' dör Jesús Nazaret wak, e' we'ikeke be' tō.’ ⁹Itso'rak ye' ta, e'pa tō bö'wö sué, erë ì yëne ye' a, e' wà kè әне ie'pa éna. ¹⁰Eṭə ye' tō ie' a ichaké: ‘A Skëképa Jesús, ¿ì wëmiyö?’ Tə ie' tō iché ye' a: ‘Be' e' kóka. Be' yú Damasco. Ee ì kōs wëmi be' tō, e' yërdaë be' a.’ ¹¹Bö'wö olo tō ye' wöbla batuwëwə, e' kuekī ye' wapiepa tō ye' ulà iémirak dö Damasco.

¹²“Ee wëm tso' eköl kië Ananías, e' tō Skëköl dalöieke taië. Moisés tté dalöiëno kitule e' dalöiekeitö yësyësë. Judiowak kōs serke Damasco e'pa tō

icheke tō ie' dōr wēm buaē. ¹³Ie' debitu ye' ska' t̄a ye' a iché: 'A yami Saulo, be' wōbla buanú.' E' wōsh̄aē t̄a ye' wōbla buanene iwawēnene Ananías suéyō iwa. ¹⁴E' ukuōki t̄a ie' tō ye' a iché: 'Skēkōl dalōiōk se' yēpa bak k̄a iaiaē, e' tō be' shūkitatbak as ì kiane wē ie' k̄i e' jcher be' wa. Nies be' shūkititō as yi dōr Yēsēsē e' saūbō ena ie' wák t̄tō t̄sōbō. ¹⁵Be' dōraē ie' ttekölie. Ì kos su' be' tō, ì kos t̄sē' be' tō, e' cheraēbō sultane a. ¹⁶I' t̄a kē bō ipanukia. Be' e' kōka. Be' e' wōskuó. Skēkōl a ikió as ì sulu kos wamblébō e' nuí olo'yōitō be' ki.'

¹⁷"Mik ye' dene Jerusalén eta, ye' mía t̄tōk Skēkōl t̄a iwē a, eē ye' tō ì suē kabsueie. ¹⁸Skēkēpa Jesús suéyō t̄a ichéitō ña: 'Be' tō ye' t̄tē pakēmi judiowak a, e' kē klō'wēpa ie'pa tō. E' kuēk̄i be' e' yōt̄sa bet Jerusalén.' ¹⁹Eta ye' iché ia: 'A Skēkēpa, ie'pa wákpa w̄a ijcher tō ye' bak ie'pa ñi dapa'wo wé kos a, be' mik erblōkwakpa, esepa yulōk ppē, wōtēw̄a s'wōto wé a. ²⁰Mik Esteban dōr be' kanē méso bak be' t̄tē pakōk, e' kōtw̄a ie'pa tō, eta ye' tso' eē. E' wēne buaē ye' wa. E' dalewa ye' tso' ie'pa datsi' kkō'nuk.' ²¹Erē ie' tō ye' a iché: 'Be' shkōmitke ñala k̄i. Ye' be' patkeke kamiē pē' kē dōr judiowak esepa a.' "

Pablo at̄e comandante ul̄a a

²²Pablo t̄tōke e' t̄sōk ie'pa tso' buaē, erē mik pē' kē dōr judiowak e' aritséitō, eta ie'pa ñi kēka anuk darērēē: "iWēm ese kē kawōt̄a senukia! ìttōwasō!" ²³Ie'pa arkekarak taiē, t̄a idatsi' wōti'wekerakitō kashuk a, ñies k̄a po uyekerakitō kashuk a kēsik wa. ²⁴E' kuēk̄i comandante tō Pablo tsukmi kē wēshkē ñippōkwakpa wé a t̄a ìppōk kē as itō ichōka ì kuēk̄i pē' wōñarke ie' k̄i taiē. ²⁵Erē mik ie'pa tō Pablo muéwatke ppē t̄tsa'bata daloie wa, eta ie' tō capitán dur eē, e' a ichaké:

—¿A' a kawō mēne wēpa dōr romawak esepa ppōk kam ishulir e' yōki?

²⁶Mik e' t̄sē capitán dur eē e' tō, eta imía icomandante a ibiyó chōk t̄a iché ia:

—¿Wēs be' iwēmi? Wēm e' dōr romawak.

²⁷Eta comandante debitu Pablo ska' t̄a ie' tō ie' a ichaké:

—¿Mok̄i be' dōr romawak?

Pablo iiuté:

—Tó, es idir.

²⁸Eta comandante tō iché:

—Ñies ye' dōr romawak, e' patō'yō inukōl taiē wa.

T̄a Pablo iiuté:

—Erē ye' dōr romawak ye' kune' es e' kuēk̄i.

²⁹Mik ittserakitō, eta ìppōkwakpa tō Pablo méat bēre. Mik comandante wa ijchenewa tō Pablo dōr romawak, eta ie' suane tō iók ie' tō imaukw̄a patkē'.

Pablo e' tsat̄ké judiowak wōkirpa wōrk̄i

³⁰Comandante k̄i ikiane jchenewa mok̄iē tō ì k̄i Pablo kkateke judiowak tō. E' kuēk̄i bule es t̄a ie' tō sacerdotepa wōkirpa ena judiowak

wökir malepa ké e' dapa'ukka. E' ukuöki ta ie' tö Pablo wötsöök patké ta iyéttasitö tsémi duésér ie'pa wörki.

23 ¹Etä Pablo tö ie'pa suéwä krereë iwö ki ta iché iarak:
—A yamipa, ikké ye' senére, etä ye' er kè wä ye' kkatène i ki Skëköl wöä.

²Etä sacerdote kibi kiè Ananías, e' tö, itso'rak Pablo o'mik, e'pa ké Pablo ppök ikkò ki. ³Erë Pablo tö iüté:

—iBe' dör e' ökwak, e' pperaë Skëköl tö! Se be' tkër ye' shulök Moisés ttè dalöiëno e' wa. Erë ñiök ye' ppök kébö? E' wa ttè ñe' dalösewéwä be' tö.

⁴Itso'rak ee, e'pa tö iché Pablo a:

—iBe' tso' Skëköl sacerdote kibi e' chök suluë!

⁵Pablo tö iché:

—A yamipa, ye' kè wä ijcher tö ie' dör sacerdote kibi. Skëköl yëkkuö tö iché: 'Yi tso' s'wökirie, ese kè char suluë.'

⁶Mik Pablo wä ijchenewä tö iwökirpa shäbötspa dör saduceowakpa, shäbötspa dör fariseowakpa, etä ie' tö ie'pa a iché aneule:

—A yamipa, ye' dör fariseowak. Ñies ye' yépa qos dör fariseowakpa. S'duowä shkerkane, e' wä panekeyö kröröë, e' ki a' tso' ye' kkatök.

⁷Mik Pablo tö ttè e' ché, etä fariseowakpa ena saduceowakpa e'pa wöñanemi ñi ki. Etä ie'pa ñi blabatsélor. ⁸Saduceowakpa tö icheke tö s'duowä kè shkertä'kane. Ñies ichekerakitö tö Skëköl biyöchökwakpa kè ta', wimblupa sulusi kè ta'. Erë fariseowakpa tö iyi ekkè qos klö'wé tö itso'. E' kuëki ie'pa ñi blabatsélor. ⁹Ie'pa ulitane arkerak taië. Fariseowakpa dör s'wöbla'uk ttè dalöiëno wa wakpa welepa e' kéka ta ichéraitö:

—Wëm i' kè wä ñi sulu wamblène. Isalema wimblu ö Skëköl biyöchökwak wele utule ie' ta.

¹⁰Erë ie'pa kí shütirkekä taië késik wa, e' kuëki comandante suane dö' Pablo ttèwarakitö. E' kuëki inippökwakpa tsuk patkéitö Pablo yottsä ee tsémi ñippökwakpa wé a.

¹¹E' nañewe ta Skëképa Jesús debitu e' tö Pablo a iché: “Be' er kuü. Wës be' tö ye' tté paké íe Jerusalén es ñies be' kawötä ipakök Roma.”

Judiowak kawö mé ñi a Pablo ttökwa

¹²E' bule es ta judiowak welepa tö kawö mé ñi a Pablo ttökwa. Ie'pa tö ittè mé Skëköl a ttè i' wa: “Kè sa' chköpa, kè sa' di' yöpa dò mik Pablo ttèwä sa' tö etä.” ¹³Wëpa tö ittè mé es, e'pa dökä dabom tkëyök (40).

¹⁴Etä ie'pa míyal sacerdotepa wökirpa ena judiowak kuëblupa, e'pa ska' ta iché iarak:

—Sa' tö ttè me' Skëköl a tö kè sa' chköpa, Pablo kam ttòwä sa' tö e' yöki. E' kè wä one sa' wä, e' ta as Skëköl tö sa' we'ikö. ¹⁵E' kuëki a' ena

s'wökirpa malepa, a' ichó comandante a tö Pablo tsúbitu bule. A' e' ó tö a' kī ie' kiane chakè bua'iewā ishūloie. E' dalewa sa' tso'tke ikīnuk ñāla kī ttèwā kam idò a' ska' e' yōkī.

¹⁶Erè Pablo nauyö wā ijchenewā tā imía ñippökwakpa wé a tā ibiyó méitö Pablo a. ¹⁷Etā Pablo tö capitán kié eköl tā iché ia:

—Duladula i' tsúmi comandante ska'. Ie' wā ilè tso' yēnoie ie' a.

¹⁸Etā capitán e' tö itsémi comandante ska' tā iché ia:

—Pablo tso' wötèule, e' tö ye' kié tā ikkōché ye' a tö duladula i' tsúmi be' ska'. Ie' wā ilè tso' yēnoie be' a.

¹⁹Etā comandante tö iklò'wéwā iulà a tā itsémi bánet. Ee' ie' a ichakéitö:

—¿I cheke be' tö ye' a?

²⁰Ie' tö iché ia:

—Judíowak kawö métké ñi a be' a ichök tö bulepa Pablo tsúmi wé judíowak wökirpa e' dapa'uke ee. Ie'pa e' öke tö Pablo ttè kiane shulé bua'ie ie'pa kī. ²¹Erè ie'pa ttè kè klò'wā. Judíowak wēpa dōka dabom tkéyök (40) kīta, e'pa tso' bléule Pablo panuk. Ie'pa kablé' Skéköl a ttè i' wa: “Kè sa' chkōpa, kè sa' di' yōpa dò mik sa' tö Pablo ttèwā etā.” Ie'pa tso'tke, ima be' icheke, e' è panuk.

²²Etā comandante tö ipatkémine tā iché ia: “Kè yi a ichar tö e' ché be' tö ye' a.”

Pablo patkēmi Judea wökir kié Félix e' ska'

²³Etā comandante tö ikimukwakpa kié bōl tā ichéitö ie'pa a: “Ñippökwakpa mi'ke klò wa esepa klò'ú dōka cien böyök (200). Ñies ñippökwakpa mi'ke kabaio kī esepa shtó dōka dabom kuryök (70). Ñies ñippökwakpa wā kēt mi'ke esepa klò'ú dōka cien böyök (200). Kaṭuine de sulītu (9:00 pm) etā e'pa kos dapa'ú as imi'rak Cesarea.” ²⁴Ñies ichéitö: “Kabaio yuló Pablo tsomi. Itsúmi kkö'nú buaë dōmi s'wökir Félix ska'.” ²⁵Ie'pa tā comandante tö yēkkuö patkēmi mè Félix a. Ikitule yēkkuö kī e' tö iché i' es:

²⁶“A Félix, s'wökir kibi. Ye' dör Claudio Lisias. Yēkkuö i' shtéyö be' a. Be' shké'wéyö. ²⁷Judíowak wökirpa tö wēm i' klō'wā iminerak ittökwa. Erè mik ye' wā ijchenewā tö ie' dör romawak, etā ye' mía ye' ñippökwakpa tā tā itsatkée sa' tö. ²⁸Ye' kī ikiane jchenukwā tö i kī ie'pa tö ikkateke. E' kuēkī itsémiyö judíowak wökirpa wörkī. ²⁹Ie'pa tö ikkaté ie'pa ttè dalöiēno kitule, ese kī. Erè kè ye' wā i sulu kune ie' kī ittowaie ö iwōtoie s'wōto wé a. ³⁰Erè ye' wā ijchenewā tö judíowak wēlepa kawö mé ñi a ittowaie, e' kuēkī ye' tö ipatkébitu be' a. Ñies ye' tö ichétke ikkatökwakpa a tö i kī ie'pa éna ikkatak, e' chó be' wōshäe.”

³¹Etā ñippökwakpa wā Pablo mítser nañewe wēs ie'pa a ikéwö mène es. Ie'pa demi ká kiè Antípatris ee. ³²Bule es tā ñippökwakpa dami klò wa, e' èltēpa biteane ñippökwakpa wé a. Etā ieltēpa dami kabaio kī, e'pa wā Pablo mítser. ³³Mik ie'pa demirak Cesarea ee, etā ie'pa tō yēkkuö mé iwökir kibi a. Ñies Pablo méitörak ia. ³⁴Iwökir kibi tō yēkkuö sué one etā ie' tō Pablo a ichaké: “¿Wé be' datse?” Mik ie' wā ijchenewa tō idatse Cilicia, ³⁵etā iché ia:
—Mik be' kkatökwakpa debitu etā be' ttè ttseraëyö.

Etā ie' tō Pablo wötökwa patké s'woto wé tso' u bérie yö' blu' Herodes tō ká e' wökirpa a e' a. Ee iwötéwarakitö.

Pablo e' tsatké Félix wörki

24 ¹Ká de skel etā sacerdote kibi kiè Ananías, e' demi Cesarea judiowak kuēblupa welepa tā Pablo kkatök. Ñies wēm eköl kiè Tértulo, e' de ie'pa wā ie'pa ttekölíe Pablo kkatök Félix a. ²Mik Pablo debitu etā Tértulo tō ikkatémi. Ie' tō Félix a iché:

A kékēpa s'wökir kibi, be' ttè dikia ká taiē sa' serke bèrē ñita. Be' erbikò buaē, e' wa be' tō sa' wakpa kímé taiē. E' kuēkī sa' tō wéstela chē be' a. ³A Félix, kékēpa taiē, be' tō sa' kímēke taiē, e' kuēkī kekraē ká ulitane kī sa' tō wéstela chē taiē be' a. ⁴Kè ye' éna be' kawö chöwak taiē, erē be' we'ikèyö, sa' ttò ttsö bērbēr è er bua' wa. ⁵Sa' wā ijchenewa tō wēm i' dör pē' suluē. Ie' shkōke ká wa'ñe judiowak shutiuk ñi kī as ñi blabatsölor. Ie' dör Jesús Nazaret wak e' klépa eruleē e' wökir eköl. ⁶⁻⁷Ñies ie' éna Skéköl wé ia'wakka náie. E' kuēkī sa' tō iklö'wéwa.^c ⁸Be' wák a ie' chakirmi, es be' wā ijchermi tō i kī sa' tō ikkateke, e' dör mokijē.

⁹Judiowak tso' ee, e'pa ulitane tō Pablo kkteke ñittsē. ¹⁰Etā Félix tō ie' a kawö mé ttoie tā ie' tō iché:

—Ye' wā ijcher tō ká iaiaē be' dör ká i' wakpa ttè shulökwak. E' kuēkī ye' ttsé'ne buaē e' tsatkök be' wörki. ¹¹Be' wák wā ijchermi tō ye' dē'rōka Jerusalén Skéköl dalöiök, e' kī ká detke dabom eyök kī böt (12). ¹²Ie'pa kè wā ye' kune yi tā ñi chök. Ie'pa kè wā ye' sune pē' shutiukka Skéköl wé a, ñies judiowak ñi dapa'wo wé malepa a, ñies Jerusalén kos a. ¹³Ï kos kī ie'pa tō ye' kkteke, e' kè yërpa ie'pa a yēsüsē be' a. ¹⁴Erē ye' tō be' a iché tō Jesús dör ñala chökle, e' tté wa ye' tso' sa' yépa bak ká iaiaē e'pa Kéköl dalöiök. Ie'pa tō iché tō ttè e' kè dör buaē. Erē ñies i kos kitatbak yēkkuö kī Moisés ena Skéköl ttekölpa tō, e' klö'wé ye' tō. ¹⁵Ñies ye' erblöke Skéköl mik wēs ie'pa es tō se' yēsüsē ena se' suluē duowa e' shkerdakane. ¹⁶E' kuēkī kekraē ye' e' chöke senuk buaē Skéköl wōa ena sulitane wōa as kè ye' er tō ye' kkatö i kī.

^c 24.6-8 Yēkkuö kitule ká iaiaē welepa tō ttè i' kī méka ttè i' wa: Sa' kī ikiane shulē wēs sa' ttè dalöiēno tō iché es. 7 Erē shkēkīpa wökir kibi kiè Lisias, e' debitu tā iyēttsa sa' ulā a kēsik wa. 8 Ie' tō sa' a iché tō Pablo kkatökwakpa kawōtā ikkatök be' wörki.

17“Ye' mìnē sené duas tajē kè dè'iā ie, e' ukuök̄i t̄a ye' dene ie ye' wakpa shuā inuköl kakmuk s'siarēpa a. Nies ye' dene íyi muk Skèköl a idalöioie. 18E' kanēuk ye' tso' Skèköl wé a e' dalewa ye' sué ie'pa tō. Ye' e' batse'wétke wes sa' tte kitule tō iché es. Eē pè' kè ku' tajē. Kè yi shut̄ineka. 19Erè judiowak welepa datse Asia, e'pa tso' eē. E'pa éna ye' kkatak ilè k̄i, e' t̄a warma ie'pa kawōt̄a shkōkrō ie ye' kkatök. 20Ie'pa kè shkacrō, e' t̄a as ie itso'rak e'pa tō ichō tō ì sulu kué ie'pa tō ye' k̄i mik ye' dè' e' tsat̄kōk judiowak wōkirpa wōrk̄i eta. 21Erè mik ye' bak ie'pa wōrk̄i, eta tte i' è yè' ye' tō aneule: 'S'duowa e' shkerkane e' klō'wéyō, e' k̄i a' tso' ye' kkatök i'ñe.' ”

22Jesús dōr ñala chōkle e' tte jchertke buaé Félix wa. E' kuek̄i mik ì ché Pablo tō, e' t̄sētō t̄a ie' kè k̄i tte i' kianeiā t̄sè. Ie' iché ie'pa a:

—Mik comandante kiè Lisias, e' de, e' wa ye' tō a' tte shulè.

23Eta Félix tō capitán eköl ké Pablo wōtōkwane s'wōto wé a, erè ichētō ia:

—Ikkō'nú er bua' wa wes kè s'wōtēule es. Kawō mú ie' a as iyamipa bitu ikané uk.

24Bōkk̄i es t̄a Félix debitune ilaköl kiè Drusila e' t̄a. E' dōr judiowak. Félix tō Pablo tsuk patké. Pablo tō s'kawōt̄a erblök Jesucristo è mik e' wà paké Félix a. E' t̄sōk ie' tso'. 25Erè mik Pablo tō sene yēsēsē ena e' kkō'nè sene sulu yōk̄i ena s'shulir aishkuō t̄a e' wà paké, eta e' tō Félix tkiwēwa. Ie' tō iché Pablo a:

—Be' yúne. Mik ye' kawō kune e' wa ye' tō be' kiène.

26Nies Félix tō ipaneke tō Pablo mú tō inuköl watkè ia iomine bër, e' kuek̄i ie' tō Pablo kiekerō kekraè ttök ie' t̄a. 27Es itka dô duas bōk. E' ukuök̄i t̄a Félix kè kanēblōiā s'wōkirie. Ie' skéie wēm kiè Porcio Festo, e' de s'wōkirie. Félix at̄ak buaé judiowak t̄a, e' kuek̄i Pablo méatitō wōtēule s'wōto wé a.

Pablo e' tsat̄ké Festo wōrk̄i

25 1Festo demi Cesarea kanēblök s'wōkirie e' k̄i k̄a de mañat t̄a imiā Jerusalén. 2Eē t̄a sacerdotepa wōkirpa ena judiowak wēpa kibipa, e'pa tō Pablo kkaté Festo a. 3Ie'pa tō ikié ie' a: “Sa' k̄imú er bua' wa. Kawō mú Pablo tsōbitu ie Jerusalén.” E' dōr Pablo ttowa ñala k̄i. 4Erè Festo tō iūtē:

—Pablo tso' Cesarea wōtēulewa s'wōto wé a. Eē ye' mi'ke kukuie. 5Ì sulu wamblé ie' tō, e' t̄a as a' wōkirpa mi' ye' t̄a Cesarea ie' kkatök eē.

6Festo sené Jerusalén k̄a pākōl (8) k̄a dabom (10) e' ulatök t̄a imiane Cesarea. E' bule es t̄a ie' e' tkékā ikula' k̄i tte shulo wé a. Eta Pablo tsuk patkētō shulè. 7Mik Pablo dēwa, eta judiowak datse Festo t̄a Jerusalén, e'pa dēwa ie' o'mik t̄a ikkaté íyi sulué tajē ese k̄i. Erè ie'pa kè a iwōklōnuk yēs tō e' dōr mok̄i. 8E' ukuök̄i t̄a Pablo tté e' tsat̄koie. Ie' tō iché ia:

—Ye' kè wà ì sulu wamblène yès judiowak ttè dalöiëno k_i, ñies Skëköl wé k_i, ñies Roma wökir kibi e' t_a. Ekkëpa kè yëule ye' wà suluë.

⁹Erë Festo at_ak buaë judiowak t_a, e' kuëk_i ie' t_o Pablo a ichaké:

—¿Be' shkak Jerusalén as ye' t_o be' shulò eë?

¹⁰Ie' t_o iüté:

—Au. Ye' tso'tke Roma wökir kibi e' ttè shulo wé a. Íe a' kawöta ye' shulök. Be' wà ijcher buaë t_o ye' kè wà ì sulu wamblëule judiowak t_a.

¹¹Erë ilè sulu wambléyö, ese kué a' t_o, e' k_i ye' kawöta ttèw_a, e' t_a ye' ttöw_a. Erë ì kos k_i ie'pa t_o ye' k_kateke, e' kè yëne, e' t_a kè yi kawöta ye' mukts_a ie'pa ulà a. E' kuëk_i ye' t_o ikié t_o Roma wökir kibi as e' wák t_o ye' shulò^d

¹²Et_a Festo tté ipattökwakpa t_a et_a ichéitö Pablo a:

—Buaë be' ikiétke t_o Roma wökir kibi t_o be' shulò. E' kuëk_i ye' t_o be' patkekemi Roma as ie' be' shulò.

Festo t_o Pablo tté paké blu' Agripa a

¹³Ká tka wëkkè alè e' ukuök_i t_a blu' kiè Agripa e' demi Cesarea ikutà kiè Berenice e' t_a Festo tkënek_a k_a wökirie e' kèwö tkö'uk. ¹⁴Ie'pa e' tséat k_a taië. E' dalewa Festo t_o ì tköke Pablo t_a e' paké blu' Agripa a: Ie' t_o iché ia:

—Íe wëm tso' eköl méat Félix t_o wötëule s'wöto wé a. ¹⁵Mik ye' bak Jerusalén, et_a sacerdotepa wökirpa ena judiowak kuëblupa, e'pa debitu wëm e' kkatök ye' a. Ye' a ikiérakitö as ye' iwömütts_a ttèw_a. ¹⁶Ye' t_o ie'pa iüté t_o romawak wökirpa kè yi tteta'w_a, kam ie' tsatkö ikkatökwakpa t_a ñi wösh_aé e' yök_i. ¹⁷E' kuëk_i mik ie'pa debitu íe, et_a kè ye' kawö chöone. E' bule es t_a ye' e' tkéka ye' kula' k_i ttè shulo wé a t_a wëm e' tsuk patkéyö. ¹⁸Erë mik ikkatökwakpa debitu, et_a ie'pa kè w_a ikkatëne íy_i sulu k_i wës ye' ibikeits es. ¹⁹Ie'pa t_o ikkaté wës ie'pa Skëköl dalöieke ese k_i. Ñies wëm kötew_a kiè Jesús, e' ché Pablo t_o t_o itso' ttsë'ka, ese è k_i ie'pa t_o ikkaté. ²⁰Ye' kè w_a ijcher wës yö ttè e' wè, e' kuëk_i ye' t_o Pablo a ichaké: “¿Be' shkak Jerusalén as eë be' shulir ttè i' k_i?” ²¹Erë ie' ikié t_o as se' wökir kibi t_o ishulò. E' kuëk_i ye' t_o ikéwö mé t_o as itkër wötëule dö mik ye' t_o ipatkekemi et_a.

²²Et_a Agripa t_o iché Festo a:

—Ye' éna wëm e' ttò ttsak ñies.

T_a Festo t_o iüté:

—Bule bö ittseraë.

²³Bule es t_a Agripa ena Berenice, e'pa debitu, tkaw_a u a shkörami wës kéké taië es. Ñippökwakpa wökirpa ena k_a e' kékëpa dalöiërt_a taië, esepa debitu ie'pa t_a ñies. Et_a Festo t_o Pablo tsuk patké ²⁴t_a ichéitö:

^d25.11 Pablo döromawak e' kuëk_i ie' a kawö t_a ikiök Roma wökir kibi a t_o e' t_o ishulò. Roma wökirpa tsitsir kè a iwöklönuk.

—A blu' Agripa ena kékëpa ulitane tso' íe se' ta, íe wëm dur eköl kiè Pablo. Judiowak kòs tò ie' kcateke ye' a Jerusalén ñies íe Cesarea. Ie'pa kè shtrirta'wà ye' a ikiök aneule tò ikéwö múttşa ttëwà. ²⁵Erè ye' a ta ie' kè wà ì wamblène ì kî yò ittökwa ipatkëmi. Erè ie' wák tò ikié aş Roma wökir kibi tò ishulò. E' kuëki ye' tò ibikeitsbak patkëmi eë. ²⁶Erè kè ì kune ye' wà shtëmi yëkkuö kî mëmi s'wökir kibi a ikkatoie. A Agripa, e' kuëki ye' wà idebitü a' wörki, bua'ie be' wörki, as be' ichakò. Ima be' ichè, e' ukuöki ta iyëkkuö shtëmiyö. ²⁷¿Wes ye' tò yi patkemimi shulè kè wayëule tò ì kî ikkatërke?

Pablo e' tsatké blu' Agripa wörki

26 ¹E' ukuöki ta Agripa tò Pablo a iché:
—Be' ttó e' tsatkoie.

Età Pablo ulà kékà ta ittëmitke i' es: ²⁻³“A blu' taië Agripa. Se' judiowak ser, e' jcher buaë be' wà. Ñies ttè i' kî sa' ñi chöke, e' jcher buaë be' wà. E' kuëki i'ñe ta ye' ttsë'ne buaë e' tsatkök be' wörki ì kòs kî judiowak tò ye' kcateke, e' yöki. Es ikiéyö be' a tò ye' ttò ttsó enaë.

⁴“Se' wakpa kòs wà ijcher buaë tò wes ye' ser ye' kaska' ena Jerusalén mik ye' bak duladula età. ⁵Ñies ie'pa wà ijcher buaë tò kekraë ye' dör fariseowak. Ese wakpa e' tiuke Skëköl ttè dikia yësyësë se' wakpa malepa tsata. Ie'pa kî ikiane, e' ta ie'pa tò ichëmi tò mokî ye' dör fariseowak. ⁶Skëköl kablè' se' yépa bak ká iaiaë e'pa a tò s'duowà e' shkerdakane, e' wà panekeyö mokî, e' kî ie'pa tso' ye' kkatök i'ñe ta. ⁷Se' dör Israel aleripa e' ditséwöpa dökà dabom eyök kî böi (12), e'pa tò iwà paneke ñies er mokî wa. E' kuëki ie'pa tò Skëköl dalöie e' wakanewekerakitö ñië nañeë kekraë. A blu' Agripa, s'duowà shkerdakane, e' panekeyö wes se' wakpa malepa es, e' ta ì kî ie'pa tso' ye' kkatök? ⁸¿Ì kuëki a' ibikeitseke tò s'duowà e' kè shkenukkane Skëköl a?

⁹“Ye' wák bak ibikeitsök tò ye' kawötà ì kòs or ye' a e' uk Jesús Nazaret wak e' ttè wöklö'woie. ¹⁰Es ye' tò iwamblè' Jerusalén. Sacerdotepa wökirpa tò ye' a kawö me' iwambloie. S'batse'rpa taië wötë'wà ye' tò s'woto wé a. Kè dör e' è, ñies mik ie'pa ttekerakitö, età ye' a ta e' dör buaë. ¹¹Taië ie'pa we'ikyö se' ñi dapa'wö wé ulitane a ie'pa koie ie'pa erblò Jesús mik e' olo'yök. Ye' kësik blè' ie'pa kî taië. Ye' tò ie'pa tötë'rö tkörö ká bár kî we'ikè.

¹²“Sacerdotepa wökirpa tò ye' a kawö me' ena ye' patkè' ese wamblök Damasco, e' wakanéuk ye' mirwà. ¹³Erè, a blu', ñalà kî dibata a ta ká jaì a ye' tò ì sué bö'wöie e' tkökà diwö olo tsata. Bö'wö e' olo bune ye' pamik ena imirwarak ye' ta e'pa pamik ñies. ¹⁴Sa' kòs anere iski ta ittò ttséyö e' tò iché ña hebreoie: ‘A Saulo, a Saulo, ¿íók be' ye' we'ikeke? Ì sulu wamblekebö ye' kî e' wa be' wák e' mukettsà we'ikè wes iyiwak kè shkak ppèsò kal wa es.’ ¹⁵Ye' tò ie' a ichaké: ‘A Skëkëpa, ¿be' dör yi?’ Ie'

ye' iüté: 'Ye' dör Jesús, e' we'ikekebö. ¹⁶Erë be' e' duókā. Ye' e' kkaché be' a be' patkoie kaneblok ye' a. Ì kōs suébö i'ñe ena ì kōs kkacheraëyö be' a, e' pakerabö sulitane a. ¹⁷Ye' tō be' patkeraë be' yamipa a ena pè' kè dör judiowak esepa a. Ye' tō be' tsatkeraë ie'pa ulā a. ¹⁸Ye' tō be' patkeraë ie'pa wōā kā ñi'uk as ishkōrak Skëköl ta kā ñi a, kè ku'ia klöulewā stui a Satanās ulā a; ñies as inu' olo'yardak iki as idōrak Skëköl icha batse' e'pa kīe ierblérak ye' mik e' wa.'

¹⁹“A blu' Agripa, ì yēne ña kā jai a e' wawéyö. ²⁰Jesús tté buaë tsá pakéyö Damasco wakpa a, e' ukuökī ta yō ipaké Jerusalén wakpa a ñies kā malè tso' Judea e' kōs wakpa a. Ñies ipakéyö pè' kè dör judiowak esepa a. Ye' tō ie'pa kōs patté: “A' er mane'ú Skëköl a. A' senú buaë yēsýsë ikkachoie tō mokī a' er mane'wétke ie' a.” ²¹E' kuekī se' yamipa judiowak e'pa tō ye' klō'wā Skëköl wé a ttèwā. ²²Erë dō ikkè ta Skëköl tō ye' kímé, e' kuekī ye' tso'ia ie' tté pakök sulitane a, s'dalöier'ta' taië esepa a, ñies se' èsepa a. Ì yè'atbak Skëköl ttekölpa ena Moisés, e'pa tō tō itkōraë, e' è pakekeyö. Kè ye' wā tté ku'a'kī pakane. ²³Ie'pa tō iyè'at tō wé pairine'bitū idi' wa s'blúie e' kawōtā ttèwā. E' ukuökī ta ie' shkerdakane keweie sulitane yökī, ta s'tsatko tté pakeraëitō judiowak a ena kā ulitane wakpa a. Ttè e' dör wēs bö'wö es se' er ñi'woie.”

Pablo tō Agripa shkeñé erblök Jesús mik

²⁴Es Pablo e' tsatköke e' shūā Festo tō iché ie' a aneule:

—iA Pablo, be' alíneka! Be' e' yué yëkkuö wa taië, e' tō be' alíwéka.

²⁵Erë ie' iüté:

—A kéképa Festo. Ye' kè alíneka. Ì chéyö e' kè dör alípa ttè, e' dör ttè mokī. ²⁶Se blu' Agripa tkér. Ie' wā ttè ikkè suule buaë. E' kuekī kè ye' tkine ttök ie' wörkī. Íyi ikkè kōs kè wamblène bléulewā. E' kuekī ye' wā ijcher tō ie' wā íyi ikkè jcher buaë. ²⁷A blu' taië Agripa, ye' wā ijcher buaë tō be' tō ì yè'atbak Skëköl ttekölpa tō, e' kló'wé.

²⁸Agripa tō iüté:

—Kè be' ibikeitsök tō be' ye' kèmi e' mane'uk Cristo kléie i' ta.

²⁹Pablo tō iché:

—I' ta ö i' ukuökī ta, erë Skëköl mú kī ikiar tō be' ena a' kōs tso' i'ñe ye' ttō tso'k, e'pa mú dör wēs ye' es, erë kè moulewā tabechka kicha wa wēs ye' es.

^{30,31}Etā blu' ena s'wökir kibi ena Berenice ena kōs itulur ee, e'pa ulitane e' kékā míyal bānet ttök ñita Pablo tté kī. Ie'pa tō iché ñi a:

—Wēm i' kè wā ì sulu wamblène ì kī ittèwasö, warma kè ie' kawōtā wötèwā.

³²Etā Agripa tō iché Festo a:

—Wēm i' kè tō ichópa: 'ye' patkómi Roma wökir kibi a shulè', e'ma sö ièmmi.

Pablo patkémirakitö Roma

27 ¹Mik ie'pa tö ibikeitsétke tö sa' patkekemi Italia, etä Pablo ena pè' skà tso' wötëule, e'pa méraakitö wëm eköl kiè Julio e' ulà a. Wëm e' dör ñippökwaqpa eruleë kiè Emperador Icha, e' capitán. ²Etä sa' e' iéka kanò a. Kanò e' datse ká kiè Adramitio ee michoë Asia wé kanò irirke dayë kkömik ese a. Wëm kiè Aristarco, e' tso'ñak sa' tã ñies. Ie' datse Tesalónica atë Macedonia ee. ³Bule es tã sa' demi Sidón. Julio tö Pablo sué er bua' wa. Ie' tö iémi s'yamipa serke ee, e'pa pakök as ì kiane ie' kì e' mù ie'pa tö ie' a. ⁴Sa' e' yéttsa Sidón mir wówí, erë siwa' bitsírke darërëë wöiá. E' kuekì sa' míyal dayë nane kiè Chipre e' kke wé siwa' kè bitsírku' tajë e' éka. ⁵Sa' tkami Cilicia ena Panfilia demi Mira atë Licia ee.

⁶Etä ee capitán tö kanò datse Alejandría, e' kué etö. E' mi'ke Italia. Ee sa' e' mane'wé kanò e' etö a tã sa' míyal. ⁷Siwa' kuekì sa' mirwa kanò kì enaë, kanè tajë wa. Ká böt ö ká mañat alè etä sa' demi ká kiè Cnido wöshaë. Siwa' bitsírkeia sa' kke, e' kuekì sa' tkami Salmona wöshaë tã sa' tkami dayë nane kiè Creta e' wishet. ⁸Sa' mí kanò kì dayë kkò è wa kanè tajë wa. Etä sa' demi ká kiè Buenos Puertos (kiè e' wà kiane chè wé kanò irirke buaë), e' atë tsinet ká kiè Lasea ee.

⁹Sa' kì kawö chó tajë tã yuëdiö dewatke. E' këska' tã kè se' a shkanukia dayë kì dö' ì sulu tkò s'tã. E' kuekì Pablo tö ipattérak:

¹⁰—A kékëpa, yö isué tö se' mirwa i' etä ì sulu tkömi. Kanò i' ena dali i', e' weirwami, ñies dö' se' wákpa duödur.

¹¹Erë capitán kè wã Pablo ttö iütëne. Ie' tö kanò wák ena kanò ñakökwaqpa wökir, e'pa ttö iüté. ¹²Wé ie'pa kanò irine e' kè dör buaë yuëdiö tkò'woie. E' kuekì kanò wakpa kibiiepa tö ibikeitseke tö se' mú dòmi Fenice yuëdiö tkò'uk ee, e' dör bua'ie. Ká e' atë dayë nane kiè Creta ee. Eë dayë atë noroeste ena sudoeste.

Siwa' bitsírke tajë dayë kì

¹³Etä siwa' datse sur kke, e' bitsínemitke bërëbërë. Ie'pa tö ibikeitsè tö se' tkömimi, e' kuekì ie'pa e' yéttsa míyal Creta dayë kkò è mik kanò kì. ¹⁴E' ukuökì bet tã sèrkë bitsíneka tajë datse nordeste kke, e' tërke kanò mik. ¹⁵E' tö kanò uyémi. Sa' kè a kanò wöklöneia siwa' kke. E' kuekì sa' tö iémi as siwa' wã imítser sa' tã. ¹⁶Sa' tkami dayë nane tsitsir kiè Cauda, e' tsikka, wé kè siwa' bitsírku' darërë shütë ee. Sa' kaneblé darërëë, e' wa sa' tö kanóla tso' s'tsatkoie e' muéwã buaë as kè imi'a dayë a. ¹⁷E' ukuökì tã ie'pa tö kanò kibi etö kì payuéwã buaë tsa' wa. Ie'pa suane dö' kanò tkërka tsa'wö tso' tajë kiè Sirte, e' kì. E' kuekì ie'pa tö datsi' ukuö tso' kanò shkówoie, e' iéwã dayë a kanò wökló'woie as imi' enaë. Tã ie'pa tö iémi as siwa' wã imi'. ¹⁸Bule es tã siwa' bitsírkeia tajë, e' kuekì ie'pa tö

dalì damirak iwà kanò a, e' tuléttsami dayè a. ¹⁹Böiki es tã ie'pa tō iyi tajë tso' kanò shkōwoie, e' kibiie tuléttsa dayè a iwákpa ulà wa. ²⁰Ká tka tajë etã diwö kè wëneia bèkwö kè wëneia. Sèrkè tajë tērkeia sa' kī. E' kuekī sa' tō ibikeitsé tō sa' duòlurdaë, kè sa' tsatkërpaia.

²¹Sa' tka kã tajë kè chkaule. E' kuekī Pablo e' kèkã ie'pa tso' kos e' shua tã ichéitō:

—A kèkèpa, a' tō ye' ttò ttsópa, e'ma kè se' e' yënetsa Creta ena ì sulu tka se' tã, e' kè bak se' tã. Ñies kè se' iyi weinewa. ²²Erè ì'ñe tã a' er kuú. Kè yi duòpawa. Erè kanò è weirwami. ²³Enia nañewe Skèköl dör ye' blú dalöieke ye' tō, e' tō ibiyöchökwak patké ye' ska', ²⁴e' tō ye' a' iché: 'A Pablo, kè be' suanukia. Be' kawötã shkökrö Roma wökir kibi e' ska'. Skèköl er buaë ché be' a. E' kuekī pè' kos tso' be' tã kanò a, e'pa tsatkeraeitō.' ²⁵A kèkèpa, e' kuekī a' er kuú. Ye' erblöke Skèköl mik. Ye' wã ijcher buaë tō ì kos tköraë wes Skèköl biyöchökwak tō ye' a' iché es. ²⁶Erè siwã' tō se' patkeraë dò kã wele dayè kkömik.

²⁷Dayè kiè Adriático e' kī sa' dami siwã' wã wì'kè io'kè. E' kī kã de domingo bötö e' nañewe kã shaböts etã kanò ñakökwakpa éna iane tō sa' döketke kã sí kī. ²⁸Ie'pa tō dayè shu ma'wé tō wekké idir döttsa iski tã ide metro dökã dabom mañayök kī teröl (36). E' ukuökī tã wì'kie iskã ma'wénerakitö tã ide metro dabom böyök kī kul (27). ²⁹Ie'pa suane dö' ák tso' blubluë ese mik kanò tēr, e' kuekī tabechka tso' kanò wöklö'woie e' émirakitö tkél kanò ñakka dayè shua. Tã ikiérakitö Skèköl a' tō sa' kímú kã ñirke e' dalewa. ³⁰Erè kanò ñakökwakpa tō ibikeitsé: se' tköyalmi as se' e' tsatkö. E' kuekī ie'pa tō kanóla éwami dayè a. Ie'pa e' é tō ie'pa mí tabechka tso' kanò wöklö'woie, e' ökmi kanò wökka dayè shua. ³¹Erè ì weke ie'pa tō e' biyó ché Pablo tō ñippökwaipa a' ena capitán a. Ie' tō iché:

—Ie'pa tkayal, e' tã a' kè tsatkërpa.

³²Etã ñippökwaipa tō kanóla e' ttsé télor tã iémirak dayè a.

³³Kã ñirketke etã Pablo tō ie'pa ulitane a' iché:

—Ilè ñú. A' tso' ipanuk tō ì tkömi, e' kī domingo de bötö e' dalewa kè ì ñane a' wã yës. ³⁴A' keyö ilè ñuk. A' e' tsatkak, e' tã a' kawötã ilè ñuk. Kè a' weirpa yës. ³⁵Pablo tté one, etã pan klö'wéitö et, tã wéstela chéitö Skèköl a. Sulitane wörkī iblatéitö tã ie' wák tō itsá ñé. ³⁶Etã e' tō imalepa erkiöwé tã ichkérak ñies. ³⁷Sa' dökã cien böyök kī dabom kuryök kī teröl (276) seraã. ³⁸Ie'pa chké one kos ie'pa kī kiane ekké tã dalì éyök atë e' tuléttsarakitö dayè a' as kanò at öböbla. Dalì e' dör trigowö.

Kanò jchénane

³⁹Kã ñine tã kanò ñakökwakpa kè wã dayè kkò suule. Erè ie'pa tō isué tō ttsa'wö buaë ulat tēr kanò iklokã. E' kuekī ie'pa tō ibikeitsétke tō

kanò ma'ùsò klèkà eē. ⁴⁰Età iyi tso' kanò wöklö'woie, e' ttsé télor ie'pa tò émi dayè a. Età kaltak tso' kanò ñakoie, e' wötsélor ie'pa tò. E' ukuökì tã datsi'kuò skékarakitò kanò wökka tã idökemitke dayè kkömik. ⁴¹Erè tsa'wò tkèrkà dayè dikia, e' kì kanò tkène kuj. Tã kanò wökka bunewa tsa'wò a, kè yènettsaia. E' dalewa dayè tërke kanò ñakka e' tò kanò tskélor taië.

⁴²Wépa mir klöulewà e'pa kiane ñippökwakpa kì ttélur as kè itköyal ùkule. ⁴³Erè capitán éna Pablo tsatkak, e' kuèkì ie' kè wà ikéwò mène ittökulur. Ie' tò iché: “Wépa ukuo, e'pa e' ppólur kewe dayè a as e'pa döttsà ká sí kì. ⁴⁴As imalepa mi' kanò tak kì.” Es sa' ulitane dettsà ká sí kì buaë.

Pablo sené si' mañat ká kiè Malta ee

28 ¹Mik sa' dettsà età sa' wà ijchewewà tò ká e' kiè Malta. ²Ká e' wakpa tò sa' kiéwà buaë seraa. Kase suluè ena kalì yërke, e' kuèkì bö' batsékarakitò taië tã sa' kiérakitò bö' baiklök. ³Età Pablo tò bö' ulatska shtë, e' tuleke bö' a. E' wöshæ tã tkabè sulusi e' yéttssà bö'ba yökì, e' tò Pablo kuéwà iulà kkue a, kè èwa. ⁴Mik ká e' wakpa tò isué tò tkabè moar Pablo ulà mik, età ichérakitò ñi a: “Wèm i' wà s'kötulewà alè. Eré dayè a itsatkène, erè s'shulökwak tso' ká jaì a e' kè wà kawö mène ia as iser.”

⁵Erè Pablo ulà wöppé tã tkabè anewa bö' a. Kè wes Pablo dè'. ⁶Wèkkè Pablo ièrkekà ò wèkkè Pablo duömiwà etkème, e' panuk ie'pa tso' seraa. Erè ie'pa tò ipané taië. Mik ie'pa tò isué tò kè ì bak ie' tã, età ie'pa ibikeitséne kuà'kì. Ie'pa tò ichémi tò Pablo dör kèköl wele.

⁷Eē tsinet ká tso', e' dör Malta wökir kibi kiè Publio, e' icha. Ie' tò sa' kiéwà ena sa' sué buaë dò ká mañat. ⁸Tã Publio yé, e' duöke duè dalölö wà ena ishütërke taië. E' ie' teme'r. Età Pablo mía iweblök tã ie' tò ikié S'yé a tã iulà mékà ikì tã ibua'wéneitò. ⁹E' ukuökì tã imalepa kirirke tso' ká e' a, e'pa kos debitu tã ibuanerak ñies. ¹⁰E' kuèkì ká e' wakpa tò iyi kakké sa' a taië. Mik sa' mitkene kanò kì tã ì kos kiane sa' kì shkoie, e' kakké ie'pa tò sa' a.

Pablo demi Roma

¹¹Sa' sené ká e' a si' mañat tã sa' e' iéne kanò iëtö a. Eē kanò e' tò yuèdiö tköo'. E' datse Alejandría. Kanò e' kiè ie'pa kèkölpa dalöiekerakitò dör klò e'pa kiè wa. ¹²Sa' míyal kanò e' kì ká kiè Siracusa eē. Eē sa' sené ká mañat. ¹³E' ukuökì tã sa' míyal ká kiè Regio eē. E' bule es tã sa' e' yélur Regio a. Siwà' bitsírke buaë datse sur kke, e' wa ká böt tã sa' demi Pozzuoli wé kanò irirke eē. ¹⁴Eē sa' tò s'yamipa welepa kué. Ie'pa tò sa' ké e' tsukat ie'pa tã domingo etö. Bata ekkè tã sa' demi Roma. ¹⁵S'yamipa tso' Roma, e'pa wà ijchertke tò sa' datse. E' kuèkì ie'pa de sa' ñaletsuk dò

wé dalì wé tso' tajë kiekerakitö Apio eë. Ñies ie'pa skà de sa' ñaletsuk ká kiè S'kaporö Wé Mañat eë. Mik Pablo tö ie'pa sué tã wëstela chéitö Skëköl a tã ittse'neka buaë. ¹⁶Mik sa' demi Roma, etã Roma wökirpa tö ie' ké senuk u etkue a ekörla, erë ishkëki méarakitö eköl Pablo kk'ö'nuk.

Pablo tö Jesús tté paké Roma

¹⁷Pablo demi Roma, e' kî ká de mañat, etã ie' tö judiowak wökirpa tso' Roma, e'pa kiök patkè. Mik ie'pa e' dapa'wéka ie' ska' tã ie' tö iché iarak:

—A yamipa judiowak, kè ye' wã ì sulu wamblène se' wakpa kî. Ñies kè ye' wã ì sulu wamblène se' yépa bak ká iaiaë e'pa sene e' kî. Erë ye' tso' Jerusalén e' me'ttsarakitö Roma wakpa ulà a. ¹⁸Roma wakpa tö ye' ichaké iskië, erë kè ie'pa wã ì sulu kune ye' kî ye' ttowaie. E' kuekî ie'pa éna ye' akmi. ¹⁹Erë judiowak kè kî ikiane tö ye' èmi ie'pa tö. E' kuekî ye' kawötã ikiök tö ye' patkó Roma wökir kibi a as ie' tö ye' shulò. Erë ye' kè wã ì tã' se' judiowak kkatoie. ²⁰Ì paneke se' dör Israel aleripa e'pa tö, e' kuekî ye' tkër íe moule. Ñies e' kuekî ye' tö a' kiök patké a' suojie ena ttoie a' tã.

²¹Ie'pa tö iché ia:

—Judea wakpa kè wã yëkkuò patkéule sa' a be' choie yës. Ñies sa' yamipa datse Judea, e'pa kè wã ì sulu yëule sa' a be' kî. ²²Sa' wã ijcher tö ttè pa'alí i' pakè be' tö e' cheke suluë sulitane tö ká wa'ñie. E' kuekî sa' kî ikiane ttsè tö çíma be' tö ibikeitseke?

²³Ie'pa tö kawö skà mé ñi a kapakoie. Mik e' kéwö de, etã ie'pa dapanekã tajë Pablo ska'. Ie' tö ì blúie Skëköl tso' e' tté paké bla'mi dò tsáí. Ì kit Moisés ena Skëköl ttekölpa tö yëkkuò kî e' wa ie' tö ie'pa pablé tajë as ie'pa tö iklö'ù tö Jesús dör wé pairine'bitü idi' wa s'blúie e'. ²⁴Ie'pa welepa tö tté paké Pablo tö, e' klö'wé. Erë welepa kè wã iklö'one. ²⁵Ie'pa kè wã ibikeitse ñikkëë, e' kuekî imítkerak erë Pablo tö ttè i' bata ché iarak:

—Ì yë' Wiköl Batse'r tö a' yépa bak iaiaë, e'pa a, itteköl bak kiè Isaías e' wa, e' dör moki. Skëköl tö iché ia:

²⁶'Be' yú tã ichó ká i' wakpa a.

A' tö ittseraë je', erë kè a' éna iwà anak.

A' tö iwebleraë je', erë kè a' tö isuepa.

²⁷Es ie'pa dör, ie'pa wökir suluë, e' kuekî.

Ie'pa tö ikukuò wötéwã as kè iwattsër.

Ie'pa tö iwöbla tsimiwéwã as kè iwawër.

Ie'pa kè éna iwà anak.

Ie'pa kè shkakne ye' ska' as ye' tö ibua'üne.^e

Es Isaías tö iyë'at. ²⁸⁻²⁹A' wã ijchenú tö i' ukuökî tã Skëköl tö s'tsatkè e' tté tso'tke pakè pè' kè dör judiowak esepa a. Ie'pa e' tö iklö'weraë.

^e 28.26-27 Isaías 6.9-10

³⁰Pablo e' tséat duas bök wa'ñe wé u patuekeitö eé. Sulitane mi'ke ie' weblök tã eé ie' tö ikiéwã. ³¹Ie' tso'ie ì blúie Skéköl tso' e' tté pakök ena s'wöbla'uk Skékëpa Jesucristo tté wa. Kè yi wã ie' wöklöone. Kè yi wã ie' tsirione yës.